

萬 有 文 庫

第 二 集 七 百 種

王 雲 五 主 編

敬 業 堂 詩 集

附 續 集

(三)

查 慎 行 撰

商 務 印 書 館 發 行



敬業堂詩集
附續集
(三)
查慎行撰

國學基本叢書

敬業堂詩集卷十二

橘社集

起庚午秋
終十二月

橘社在洞庭東山之麓。劉氏取以名園。秋冬間假館於此。與書局諸同人唱酬不少。嚆城張漢瞻爲鏤刻于吳中者。非足本也。

將赴洞庭書局雨中與徐淮江別二首

一領西風季子裘。亂砧聲裏又殘秋。人間尙有君憐我。每過南湖作少留。
小港平橋宛轉通。船頭一片採菱風。孤燈十載江湖雨。腸斷瀟瀟此夜中。

曉發胥口

半浮半沒樹頭樹。乍合乍離山外山。借取日光磨一鏡。吳孃船上看烟鬢。

渡太湖晚至東山

秋水如膏滑上船。峭帆衝破五湖烟。豈知地少雲多處。別有橙黃橘綠天。枕簟欲清他夜夢。杖藜行結好山緣。詩人愛入雞豚峒。橫烟鼻處雞豚社。范石湖遊東山詩中句。只欠躬耕十畝田。

山居詩次大司寇徐公原韻三首

得從林屋賦閒居。勝駕還朝四望車。萬頃波濤憑檻外。一天風雨落帆初。龍威寂莫重搜字。笠澤叢殘舊著書。便與伊川同擊壤。何妨問答到樵漁。

公歸海內重儒宗。不數瑯琊邴曼容。霜晚黃分湖岸稻。烟朝翠掃寺門松。晴來片片雲盤鶴。雨過條條磻飲龍。見說莫釐峰絕頂。時陪五老握青筇。

落托生涯最善愁。慙來我亦欲忘憂。淋漓命酒長連夕。次第看花已過秋。四壁書多仍萬卷。五湖人少但扁舟。西山勝概差能說。興到還期爛熯遊。

張漢瞻有喜余至山中之什次原韵奉荅

啣尾船開古渡頭。櫂聲導我向中流。似曾有約來同日。不比無聊賦獨遊。坐擁畫屏長對榻。時同寓行逢精舍必登樓。因君撥觸聯吟興。豈可湖山少唱酬。

同徐敬可吳西齋張漢瞻遊翠峰寺和漢瞻韵

陰雲解駁日光穿。行盡松門始見天。旛影自飄空翠外。樵歌時出斷碑前。經樓晝靜孤鐘發。井石痕深萬綆牽。我欲問龍遠乞水。與君洗眼對殘編。寺後有龍井。爲雪竇禪師故蹟。

遠翠閣和漢瞻韵

處士留陳迹。闕爲陳眉公所建。軒窗背嶺開。練光鋪几席。烟氣濕亭臺。林僻僧宜少。天晴鶴未迴。共拚吟遣日。無

事定重來。

微香閣次敬可韻

薜徑碧侵遊子屐。楓林紅上羽人衣。一聲清磬落何處。坐看香烟成翠微。

二峯和漢瞻韻

儼與莫釐並。所爭惟一拳。未應甘出袴。且喜得隨肩。潮湧東隅日。雲垂北面天。短筇如健僕。扶上最高巔。

登莫釐峰二首和漢瞻

青天七十二芙蓉。個是芙蓉第一峯。吳越有山多作案。東南無水不朝宗。盪空日氣消飛蜃。拔地風聲穩臥龍。曾記岳陽樓畔望。肯教雲夢芥吾胸。

百層風磴盤旋上。大似鞦韆乍解條。放眼不知何處盡。置身直覺此峯高。沈沈海浦黃雲岸。點點吳帆白鷺濤。未免傍人嗤好事。重陽已過興仍豪。時重九後四日。

敝雲樓次顧丈景范韻

堵牆高下列丹楓。平視茫茫但碧空。地迥最宜千尺上。景奇獨占一山東。湖光夜閃疑飛電。磴道秋垂似偃虹。多媿元龍豪氣在。每聞清嘯發樓中。

姜西溟繼赴北闈今仍下第作詩招之

散是飛蓬聚是萍。可憐南北總飄零。一名於爾何輕重。雙眼從人自醉醒。沙路離離鴉接翅。霜天矯矯雁開翎。此愁除有詩能豁。亟買歸舸下洞庭。

題劉氏東樓

連山正缺西南角。合有高樓面太湖。不許遊人誇目力。淡雲濃日兩模糊。

出雲篇和西齋

山以東得名。羅列非一嶺。兒孫丈人行。屈首殊未肯。今晨天忽雲。晴色變滄洞。蒸蒸氣浮盎。冒冒烟上井。衆峯處囊中。刻露錐出穎。一峯獨埋沒。有物踞其頂。陽烏從東升。對射却無影。林寒不受照。萬象淒以冷。大風西北來。作力一何猛。奔逃脫鱗甲。破碎寧復整。正賴湖腹寬。吐吞在俄頃。山人耳目炫。夢嚙喚初醒。重看莫釐高。乃若裘挈領。

送田間先生歸桐城兼寄高丹植明府

滿篋詩文手自編。秋風攜上皖江船。氣吞湖海豪猶昔。老閱滄桑骨已仙。愁裏豈堪論往事。先生詩集中有與先君子

長干酬答詩

部中容易著高賢。馳書早報樅陽令。薄少時應致俸錢。

菊

隨分沿溪細作行。開時何必定重陽。畦丁自愛無他種。橘柚連山一例黃。

山樓曉起

枕上秋風疑有雨。覺來已是日高時。拓窗窸窣墮黃葉。蒼鼠驚人竄別枝。

晚窗卽目

變態多從咫尺看。只爭濃淡淺深間。斜陽已落月未上。烟外數峯如遠山。

木芙蓉索漢瞻和

烏桕微丹鴨腳黃。爭將病葉領秋光。後時猶作好顏色。咲爾一枝紅拒霜。

自題放鴨圖小影後四首

偶煩妙手寫吳綾。未必扁舟興便乘。一咲披圖還作識。此來真箇住松陵。

淺水蘆根唼唼聞。背篷汾尾雪紛紛。湖中別有東西鴨。飛向遙天莫亂羣。

奇絕佳名屬兩山。新詩多著畫圖間。放船不怕人爭路。自占儂家第一灣。

不用低欄照水紅。一竿活計趁樵風。江湖老伴憐渠在。踏浪長隨卯角翁。

裏頭

食橘二首

樹樹垂垂顆顆勻。山家生計不愁貧。若教朱實仍包貢。那得分甘到野人。
洞庭貢橘。唐宋時有之。至明始罷。瞿佑宗吉詩有玉食無緣進。

上方
之句

小園一百二十樹。摧壞年來成橘薪。每到霜前悲手澤。可堪客裏又嘗新。西園橘栽先人手植也。已冬寒悉皆凍斃故及之。

漢瞻自洞庭先歸詩以志別卽次見贈舊韻

兼旬索句添窮忙。草根唧唧蟲鳴霜。尙慙皮陸作唱和。敢與李杜爭光芒。君詩盡納三萬派。山骨巉巉波洋洋。登壇欲來執牛耳。取徑故險迴羊腸。林深霧黯蓄幽氣。虹見雨霽開晴光。吟從舌端作倔強。寫向紙面生低昂。稍嫌工遲似司馬。容我唉傲林泉旁。憶初弭棹同臥起。明朝聯臂登高岡。穿松踏石困俛仰。攀躋中道多徊徨。奇峯忽拔二千尺。快劍磨出蓮花鏘。聳身側足狂叫絕。生平奇境得未嘗。三湘七澤舊雖到。却溯洲渚攀孤芳。黃金荒臺感燕士。畫棟高閣悲滕王。十年浪走癡已極。游蹤脫略失故鄉。星埃大咲一回首。攝衣纔謁三高堂。所嗟筋力就疲憊。漸遣興趣成頽唐。眼前又當搖落候。兼葭露白秋蒼蒼。不知此中有何樂。對爾意氣還飛揚。男兒生涯志未豁。善刀合學庖丁藏。百觚醉汲隣叟甕。一枕倦寄高僧房。得道在先成佛後。茲理反覆天應償。逢人但拜孟東野。去我獨惜張文昌。扶筇縹緲有夙約。與漢瞻約游西山未果肯計盎底無餘糧。風波衝冒總爲此。子今束書我亦將。行當長謠蒼黃竹。不爾妙曲賡紅桑。鬱鬱誰能耐離索。空樓夜雨思連床。年來萬事經眼見。窮達竟分姜與湯。不分窮約姜與湯漢瞻舊句也謂西溪西厓舊遊如夢那可說。祇有末路堪評量。名山業豈異人事。慎勿屑屑耽詞章。

夜坐有懷張漢瞻吳西齋子相繼別去

山谷天早寒。經檐白日速。夜長耿無寐。愛此一寸燭。展卷乍沈吟。開軒屢躑躅。我唱和者誰。淒其感幽獨。別時秋林下。錦纈黃映綠。幾日不上樓。敗葉忽已禿。悲風颯然起。槭槭響枯木。靜覺流光移。暗傷懷抱觸。小僮強解事。隣釀貰新熟。酒罷還夢君。湖心浪如屋。

重登莫釐峰望吳興諸山

吳會諸峰繞作環。荆溪百瀆瀉成灣。西南遠景新收得。一髮螺青是弁山。

從渡水橋步行至武山小憩吳氏園亭十四韻

過橋纔半里。空闊得平原。野艇筇簪渡。斜陽穉稭村。晚來魚論斗。吳志云。吳俗以斗論魚。二斤半爲一斗。僻處犬依樊。歲稔松醪賤。秋辭社鼓喧。草根驚雉起。洞庭志。東山有雉而無兔。西山有兔而無雉。木末見鷗翻。面面帆移岸。家家水到門。泉清能止渴。山淺易尋源。又接攀躋路。重窺種植園。冒衣橙刺密。耀眼橘頭繁。舊葉荷傾沼。新泥菊上盆。苔滋行每滑。石好坐能溫。隔竹傳壺箭。隨花倚畫軒。何須問生理。卽此是仙源。遠色蒼然合。歸途月有痕。

欲往豐圻看楓葉爲雨阻

山中築居如築城。往往人家背山住。連街接巷比通闕。雖有林巒無曠趣。傲雲樓東鴨腳木。亂葉成堆稍通路。此中合着杜門人。一月出遊凡幾度。我生夙嗜久撥棄。祇有吟情剩如故。頗聞人說豐圻勝。況有丹

楓照秋暮。魚蝦市遠。風不鯉。橘柚園深。香作霧。朝來折柬約溪友。預飭晨炊治遊具。住山復作遊山人。此事寧防天亦妬。初看鬢鬣雲似墨。忽聽淋漓雨如注。客言萬事難逆料。投足無端動關數。豈知勇怯總由人。老嫻逡巡坐自誤。憶當涉世氣鹵莽。浪走風塵飽霜露。衝泥驢背不自惜。到此翻令限跬步。天工作意不肯晴。明日披蓑杖藜去。

大雨同胡拙明閣百詩登湖樓

大聲拔湖洪。飛上巨鯨背。歎空作猛雨。倒射怒百倍。萬木助一喧。掀騰走羣怪。樓孤若搖動。勢已岌岌殆。雲頭排窗來。山影忽在外。目存思欲絕。境變奇乃最。我詩苦難工。傑句應有待。

順風渡湖瞬息抵胥口

匹練掣柁痕。虛弓曠帆勢。不知小榜迅。但見青山逝。孤塔表靈岳。卓針辨湖澨。須臾忽到岸。轟轟在天際。虎丘晚泊。

山淺橋平水一隈。幾株紅樹寺門開。從看小景如盆盎。新向湖天放眼回。

拔白詩并序

昔蘇子由有白髮。近二十年。虔州道人王正彥。教令拔去。以真水火養之。從其言。數月而白髮不出。因作詩自言拔白之驗。余今年忽有白髭二莖。攬鏡鑷去。且三月矣。竟不復生。喜事有偶合者。因用其意。

作詩一章。然養生家言。僕固不解也。

人生正庭樹。官骸乃皮膚。樹有花與葉。人有髮與鬚。花葉本翬榮。鬚髮那不枯。我今過四十。貌作山澤臞。憂患煎心神。奔馳瘁形軀。早衰理則爾。何用長吁嗟。雙鬢久星星。見慣習與俱。白髭忽新變。刺眼生躊躇。我欲燃使斷。苦吟徒自愚。我欲媚後生。染之非丈夫。不如竟拔去。誰能忍斯須。初若蠹蝕葉。幾片離根枝。又若耘除稂。良苗漸蘇蘇。爾來九十日。萌蘖喜絕無。養生素乏術。寸田任榛蕪。何當劓黃精。白髮併掃除。

朱雪鴻移居詩和梨洲先生

蘧廬天地總羈縲。爪跡何煩苦印泥。招隱莫分山大小。卜居難定灑東西。一舟最穩裝書重。四壁初安待客題。終勝梁鴻依廡下。年年井臼累山妻。

雪夜發玉峯數日前沈昭嗣呂山瀏顧書宣先往洞庭作詩寄之

落木灣頭雪灑燈。臥聞漁子尙牽罾。寒光潑被夜如月。野水割船冬始冰。風逆不知何日到。山高宜及此時登。湖天霽色詩兼畫。待我舟中酒二升。

從橫塘晚至木瀆舟中寒甚

西北風狂野氣昏。船窗擁火取微溫。殘陽正墮塔邊寺。薄雪未消湖外村。木盡脫時喧鳥雀。稻成堆處散雞豚。可憐歲晚不歸客。對景躊躇思故園。

雪後曉渡太湖

黃蘆吹斷黑頭風。寒日初生血樣紅。一片湖山新着色。萬螺浮白碧壺中。

次韻荅趙蒙泉閩中見懷之作

得喪年來已貫經。忽披佳句又心驚。計疎更事多成悔。身賤依人自覺輕。壺口欲從敲後缺。劍鐔猶發扣時鳴。來詩有先生豈以不平鳴句短檠牆角差難棄。賴是看書眼尙明。

王令詒自閩歸出示途中見寄二章次韻奉荅

船頭船尾榕陰綠。城北城南荔子紅。懊惱此中多賦別。勝遊從古幾人同。右荅南浦見寄

自攜驢券出都城。草草裝隨短策橫。失路歸添遊子淚。加餐書荷遠人情。愁隨越鳥方南向。懶趁邊鴻又北征。不用苦教詩激楚。漫天風雨正秋聲。右荅晚泊見懷

送山瀏自洞庭歸塘西兼寄張介山陸厚容金子由諸子

無多唱和留君集。來往真如相避然。一葉驚回三載夢。兩萍漂散五湖天。新書著罷從人笑。善病同時得婦憐。山瀏聞嫂夫人抱痾已亦致疾好向橋西呼酒伴。放狂作達過殘年。

雲石菴和書宣韻

一徑入雙塢。菴在大塢小塢兩山間遙從澗道求。泉枯行汲遠。竹密得窗幽。日氣通停午。濤聲捲上頭。踞高真得勢。

矮屋也如樓。

白龍泉和沈昭嗣韻

半嶺通湖眼。閒僧護井湄。自能清徹底。何用砌成池。鳥道尋難到。龍湫怒或移。不知風雨候。可有氣如絲。

來鶴樓和韻

樓址爲某姓葬地。

舊日松楸廢。何年笙鶴來。樵人憐葬域。山鬼避香臺。峰勢重重合。湖光澹澹開。步虛人罕到。猜是小蓬萊。

題書宣小影

十萬青鸞尾搖竹。映得詩人髮毛綠。此中可少三間屋。竹西三月桃花紅。前村後村烟濛濛。此中可少一扇篷。遠勢兼收隔江塔。指圖山也。與君作詩論畫法。借君門前來放鴨。

書宣以藥酒一罌見餉賦謝

北風夜半收鳴鼉。冷光浸日湖不波。對門老樹盡僵立。枝顛斗大鵲作窠。山人畏寒臥復起。排籤十指無人呵。雲間陳翁山農好事者。乞與方法招詩魔。酒材難致藥料貴。正苦羞澁囊無他。感君餉我分一罌。何異良劑投沈痾。甕城新開香繞鼻。瀉以碧椀承紅螺。甘分沆瀣光琥珀。村醞不數黃如鵝。卯時小酌午未醒。挾纒續乍回陽和。蓬蓬入腦聲自覺。粥粥浮面顏微酡。枯腸一洗枵藥出。老眼亂瞥昏花過。肩高尙吟薄薄酒。耳熱漫作烏烏歌。井湄效箴吟揚子。春色可賦煩東坡。犀首達生坐無事。袁絲遣日知亡何。有生得

此亦過分。況敢嗜好窮搜羅。偶將一醉累良友。亟饋莫必惠已多。預愁餅馨唇吻燥。挹漿那得翻天河。
書宣次韻見荅。復倒用前韻作一章。邀余繼和。時書宣將歸揚州。兼以贈別。

君才如漢江淮河。駕天輸浪豈患多。坐批百家目炯炯。行貯四庫胸羅羅。詞源獨聘曹植富。餘地不量繼者何。金丸脫手最輕捷。快馬直下胭脂坡。朝來赫蹏急傳示。白雪竟壓巴人歌。我時解鞍息蹇足。臥看縱轡奔騰過。吟情欲探酒力發。小戶一盞熏顏酡。平生有作每倔強。音調太急絃難和。醉來反嫌天地窄。局促未免愁籠鵝。團團陳跡走循磨。眩眩纈眼光旋螺。爾來檢點稍知悔。思以勺水湔前痾。可憐故態時復作。形雖近放心靡他。人生有情會有癖。湛詩麴蘖俱成魔。何如牢守昔賢戒。不吟不醉從嘲呵。逝將嗇養全晚計。野蠶簇繭蜂藏窠。子今勇決仍過我。氣盛不怕江翻波。臨行舉杯懣口業。拔劍倚斫生蛟鼉。

以藥酒分餉唐實君吳西齋再疊倒韻索和

鴟夷罅腹鼠飲河。就中滿貯得幾多。玻璃萬頃吸不盡。霜風吹淺如碧羅。詩人氣僉言語大。鑄琢造化將誰何。婁東二生我同調。得第厭上金鑿坡。竭來忘分更莫逆。銅斗許和寒郊歌。湖心淺山住隔巷。衝凍踏月頻經過。所慙才分非爾敵。頰面未飲長先酡。愁腸酒肺互撐拄。正賴藥味相調和。長瓶分餉良有以。願奢似挾山陰鵝。鷓鴣聊足注半杓。鸚鵡恰好浮雙螺。便從唐侯促佳句。實君許題放鶴圖詩尙未至更祝吳子獨微痾。時西齋屬微疾號嗽當筵誰是主。剝啄扣戶人非他。林麈木客盡逃避。氣豪橫欲駢羣魔。此間差無俗物擾。尙有

亭長能相呵。懷哉歲暮盍歸去。坐看日夕雞棲窠。小槽溜溜聽壓蔗。饑涎亂湧珠跳波。床頭一壺堪醉倒。不知門外傳更罍。

題鄒毅仁書劍圖

學書差足記姓名。學劍無過一人敵。英雄竟以成敗論。二語千年供指摘。我持此論君勿疑。潦倒粗言身所歷。方當出遊氣盛壯。逸足誰堪受羈勒。有文曾弔弔戰場。有力能誇控鳴鏑。蹉跎祖述難着鞭。爛熳陳琳徒草檄。收身十載赴場屋。往往雄風避雌霓。眼看騏驥盡先登。驚鈍悲嘶仍皂櫪。天涯行旅慣黑瘦。世上男兒多白哲。讀書擊劍兩無成。鄧禹唉人終寂寂。子才去我固十倍。射扎穿楊準懸的。胡爲垂翅亦攤襪。予美誰侑叩有鷗。三年奏牘困方朔。五十吟詩唉高適。馬應換妾刀贈人。龜手如何學耕田。薄田可耕池可釣。良耜粳粳竿籊籊。還君此畫一展然。寒盡知年不須曆。

梁溪馬碧滄索題桐山草堂

吟徧峯頭又水涯。九龍歸夢隔烟霞。期君早種十年樹。待我來看三月華。藥錄欲傳須手著。琴材若中有人誇。不然斗大成何用。萬里丹山客是家。諺云梧桐大如斗。主人出外走。

題鄒舜五采蓴圖卷子次陳眉公舊韻

敏舫聲動吳歌起。沙戶生涯雜魚米。此中有蓴誰識之。埋沒蒼烟白蘋裏。湖波太淡無鹽豉。葉自青青莖

自紫脆如雪藕滑春冰。異產寧教鑿紈綺。紅鱸四腮差可配。二老朝來動食指。弄潮踏浪去何憂。占斷湖心一片秋。百年好事留詩畫。從此流傳到武丘。人間網利多堪慮。純擔年年入城去。未應澤畔少清流。却與貪夫供七箸。太湖中產蓴。前此未之聞也。天啓壬戌秋。武山鄒舜五與陳眉公始採而食之。眉公因繪圖以紀其事。

發東山至石湖舟中大雪與蒙泉雪園分韻

忍別東山去。依依尙有緣。雲沈上方塔。雪重石湖船。密坐可無酒。敝裘終勝絛。范村留故宅。欲訪問誰邊。

宋范致能居此地。名范村。

雪夜泊胥門與蒙泉抵足臥

野泊五湖東。迷漫雪滿空。水明千雉白。人靜一燈紅。亂櫂雞聲外。輕寒酒力中。殘年歸夢闊。惆悵兩心同。

雪後至閶門換船

北風吹樓臺。白日雪打面。閶門十萬戶。咫尺不可辨。歸舟一葉輕。欲與嚴寒戰。所欣吳中稔。酒價冬來賤。我裘雖云敝。一醉煖堪戀。尙有無褐人。忍饑冒霜霰。

吳門橋阻凍

白日淡無色。北風吹作陰。浪增冰力厚。橋插凍痕深。已近故鄉路。偏傷獨客心。是日蒙泉歸嚶城。隣船如比屋。兒女盡吳音。

入胥門訪薛孝穆不值留詩示之兼簡許陽谷錢玉友

風止澤腹堅。篙輕不可鑿。短篷壓頭臥。竟作三日惡。賈客聚連檣。荒灣比村落。人羣自歡笑。而我無處著。遂訪薛逢居。衝風入南郭。初來殊奮迅。欲去轉寂寞。窮途所向昧。妄冀朋友樂。錢許初北歸。合并有成約。十日前玉友陽谷自燕中返虞山期於吳門相晤亦爲冰雪所阻參辰在咫尺。矧乃道里各。天寒歲徧臘。何以慰離索。興盡返孤舟。獨吟還獨酌。

打冰詞

寒光射川如浴鐵。千艘萬艘陷頑石。鑿山通道古有之。河伯憑堅蟻難穴。官船自倚人力強。冰椎亂擊船兩傍。船頭乍開船尾結。去岸却泊河中央。篙師唉謂官勿爾。世路升沈總如此。若將人力與天爭。倒捲天河應瀉水。

阻冰七日始得發舟

筮易玩其占。七日當解凍。朝來覘風色。東面柳初弄。天行既來復。人力漸可用。南船鑿冰來。銀浦作流汞。小僮報奇事。水活鱗甲動。老夫亦欣然。私喜言幸中。披衣促解纜。一啖破愁夢。梢梢啣尾行。線路爭一縫。虎齒截兩涯。倚棹誰敢縱。遲遲計尺寸。去去逐儕衆。到家庶有期。春麥尙及種。茆檐曝初旭。宿火煨老葑。旅食饜風霜。何如抱飯甕。作詩當箴銘。悔往聊自諷。

夜泊平望驛橋下

振柁開吳江。收帆宿平望。環橋橫吾前。天勢墮空曠。或言虹下飲。比擬猶未當。分明半輪月。初吐碧波上。風定川不波。上下巧相況。小舟入圓鏡。光景互摩盪。夜寒人語稀。獨此發孤唱。

敬業堂詩集卷十三

勸酬集盡辛未
一年

己未以後衣食奔走。與德尹出入如相避。庚午偪臘。歸自具區。德尹適從洛中旋里。除夕酌酒相勞。蓋十二年無此樂矣。爰相約爲杜門計。盡辛未一年。凡得詩如干首。

元夕同顧伊人張昆詒集徐敬思宅分得燈字

自到君家飲量增。也教小戶罄三升。笙歌院隔新翻曲。書畫屏開巧樣燈。知有清光終讓月。可無佳句冷如冰。誇張節物誠多事。誰似詩人范致能。范石湖有上元紀吳下節物三十二韻

崑山一名玉峯。周圍二里許。似累石而成者。唐張祜孟郊有詩。與蓋嶼所畫山圖同。留慧聚寺中。向有石刻。宋皇祐中王半山以舒州倅。至縣相水利。登山閱二公詩。次韻和之。時稱四絕。淳熙中。寺燬於火。自唐以來。名流題咏。及楊惠之所塑毗沙門天王像。或云張愛兒所作李後主所書榜額。一掃無餘。今準提閣壁間。石刻三公詩。乃後人補刻。非故物也。正月十六日。同張昆詒盧素公登山感懷往蹟。爲詳考本末。并系以詩。

吳中園圃愛假山。家家畫藁樵荆關。此山本真翻似假。怪石疊起孤城間。奇峯尤在西南頰。縹緲玲瓏還

戍削遊人仰視一綫天。信有孤雲生兩角。幾輩留題盛昔賢。曾聞摹勒載名篇。崑岡烈火精盡。何物能爲金石堅。人間假合夫何有。差是令名堪不朽。我詩寫意直取真。嗤點還須防衆口。

德尹四十初度二首同潤木作

四十平頭齒未頽。誰教辛苦逐風埃。祝君此日無多語。正要飛騰暮景來。少陵詩四十明朝過飛騰暮景斜

蒲柳桑榆各老成。一杯相屬話生平。十年多少回頭事。我是蘇家白髮兄。用東坡壽子由詩中語

題又微姪投壺圖小照

五經一笥咲老韶。長養侍兒如許嬌。卷衣風裏聽傳箭。近前爭賭蓮花驍。

初夏園居十二絕句

人言瘦地差宜竹。隣舍曾分一本栽。尺八梢溝攔不斷。狂鞭撓過菜畦來。

牡丹不稱種村莊。開到春殘盡野芳。椿棘補籬成片段。丁香香過木香香。

亭臺廢後變溝塍。欲置茅齋力未能。大抵爲園多借景。別家高樹挂朱藤。

方池一畝萍初合。四月中旬未有蛙。簇簇銀針齊上水。綠楊影動散魚花。

莎軟鋪茵纔沒膝。樹圓擁繖正遮頭。如花流過碧池去。忽聽一聲黃栗留。詩疏黃鳥黃栗留也或謂之黃栗留

長年因病醫方熟。小草隨時藥料增。趁取連朝好風日。帶花收晒鷺絲藤。

閏年留竹苦防蠹。辰日種瓜須早澆。愛花更作晚秋計。老瓦盆邊分菊苗。
鷺粟着子米囊小。蠶豆褪花皂莢成。莫欺老圃不工畫。小碎詩篇如寫生。
去秋梧子收不盡。旋向根邊兩葉生。保得主人長閉戶。四三年便看陰成。
自蟠老榦自抽條。長養仙家枸杞苗。不似茗華難獨立。附他喬木號凌霄。
鳴聲上下羽交交。雀巖初安樹一梢。啼殺斑鳩生計拙。將雛時節定爭巢。
頭眠已過二眠新。蠶候參差雜四隣。一月往來渾斷絕。隔離時見采桑人。

橘薪

生意千頭盡。園租五畝荒。子孫貧敢計。奴婢價誰償。入室鉤衣破。爲薪刺眼傷。更愁秋冷澹。屋角少青黃。

新竹

插槿三年與作樊。又添客土護深根。主人愛竹老成癖。看笋出林如子孫。二月得長孫名與祖故及之。

布幔和德尹二首

細竹輕竿稍出檐。空庭得蔭比松杉。賽他畫舫齋中臥。平展江心一面帆。
背日開簾更覺涼。午陰屋角滿微光。呼兒勤掃蜘蛛網。方便花時蝶過牆。

梅雨連旬河流暴漲偶同德尹泛村舩入菖蒲港

雨急溝渠漲怒生。再添一尺與橋平。無端驚起江湖夢。聽作船頭放插聲。

雨後

便從一雨望豐年。大抵人情慰目前。我比老農還計短。只貪今夜夜涼眠。

衰至

中年事事防衰至。不獨侵尋感歲華。誤去黑鬚因鑷白。旋揩昏眼又生花。顏唐老境詩無格。汗漫遊踪累有家。合是歸時歸亦得。趁收麥豆種胡麻。

庭前草花與德尹分韻四首

輕刀勻剪翠葱龍。別圃移來土最鬆。累爾纏緜附枯竹。屋低庭小不栽松。女蘿小兒稱長老。稱翁。比似花冠約略同。消得閒人閒處看。可憐小草亦爭雄。雞冠羣羣紅白隔窗紗。么鳳飛來鬢髮鴉。老眼自看還自咲。種花猶種女兒花。鳳仙

位置盜盆手自親。暑風香透色如銀。整歸我已家如客。還與南花作主人。

茉莉。張叔敏呼爲遠客。范石湖詩。南花宜夏。夏不禁涼。

夢中得絕句似小遊仙詩醒而錄之

東海東頭拾火珠。抱來徑寸豈論銖。兒童莫逐黃金彈。咲向扶桑打赤烏。

舟曉次德尹韻三首

螢尾孤光合復開。灣頭風急却飛回。菰蒲深處一枝檣。搖入漁人夢裏來。
狂蛙鬧雨羣千百。遠火疑星點兩三。忽聽雞鳴鐘渡水。有人家處有茅菴。

次韵荅陸柱瀾見訪

旅塵狂走十年餘。每到還家歎瑟居。髮變一頭俄向老。草荒三徑只如初。傷心短筴經時泪。外舅射山先生已下世。
覆手貧交屈指疎。多謝新詩猶念舊。可能懷抱對君抒。

程西村以如圃詩索和次原韵

人境何曾礙結廬。一椽朴茂似園居。耨荒自作披榛賦。得法新傳種樹書。老圃閒談真可聽。比隣初約莫教虛。笑他亭館多何益。無福能消鼠壤蔬。

七夕同德尹潤木作禁用故實

眼中七度如梳月。又帶桐陰入小樓。懊惱一天星似火。閏年今夕未交秋。

茨菰見唐人詩。如白香山云。渠荒新葉長。慈姑朱放云。茨菰葉爛別西灣。劉夢得云。菰葉風開綠剪刀。未有及其花者。余盆池偶種一窠。立秋後忽發細葢。每節叢生。花開純白色。如玉蝶梅差小。頗有清香。因作一首。以補詩家之缺。

舊葉復新葉。碧莖忽抽芽。誰將綠剪刀。剪出白玉花。水邊有秋意。涼蝶來西家。

惠研谿庶常從京邸寄到吳超士見懷詩四章次韻奉酬並簡研谿

故人隔座呼同舍。花底移樽醉小樓。

余初識超士於研谿館舍

散作兩萍漂水面。遠煩尺鯉到沙頭。狂名自悔迹難穩。

歸志差堅挽不留。一窖黃塵殘夢外。爲君牽動十年愁。

飄瓦虛舟豈有因。誰當入爨惜勞薪。潛形那避含沙射。沈璧何來按劍噴。

來詩言及己已秋飲酒得罪事故云

桂樹叢荒招

隱伴。楊花風墮倦遊人。白衣蒼狗須臾事。醉眼看來分外新。

黃羊枰上守枯碁。訝許人間獨亢眉。一戒早開元亮酒。半年遲蒼暢當詩。迴腸徑路梯空險。徹骨冰霜造

物慈。羸對村童開口笑。竿頭新作釣漁師。

臥聽門前剝啄聲。書來猶勸束裝行。貧逢閏歲增薪米。病過新秋減送迎。涼雨半窗初到竹。碧蓴千里正

宜羹。也應世味多忘却。除是難忘故舊情。

種菊詩示克建克承兩兒時余將往潞城

擾擾十三載。孤蹤混泥沙。及歸翻苦閒。何以銷年華。種菊亦偶爾。惜此徑寸芽。春苗不分栽。秋至焉得花。

惡草既親鋤。清泉亦手灌。却將四體勤。覲博兩目翫。舍之忽將去。唉別東籬伴。根是老人培。花從汝曹看。

夜初涼

人靜覺夜涼。書帷傍清檝。不忍陷秋蟲。吹燈還就月。

濫城之遊未果作詩示德尹兼荅朱恒齋太守

貧賤胡可居。無端兩憔悴。侵尋歎末路。鹵莽悔初志。豈無骨肉恩。聚少別苦易。分馳十年外。廬舍任榛刺。殘冬偶同歸。草草如旅次。杜門得半載。村巷傳異事。不知相見驩。中有思親淚。兩櫪猶在堂。牛眠指何地。堪輿及日相。時俗多拘忌。吾寧葬吾親。忍規子孫計。所嗟艱物力。動輒故人累。潯陽賢使君。清俸煩遠致。有生迫孤露。久矣衆所棄。誰能念窮交。尙舉麥舟義。當之恐過分。一感再三媿。佳招況踰期。恒齋來札約余季夏至濫城。欲往未得遂。我貧荷見諒。應并諒此意。鴻雁滿江湖。詩成特先寄。

題馬漁村行路難小影

狂瀾打頭山壓面。跼踖乾坤縈一綫。我行畏路知路難。談虎還防君色變。君家門前池水清。對門山與樓簷平。此中徑路坦於掌。作底胸次添崢嶸。畫師寫圖如有託。洗耳聽琴差不惡。可憐冰雪七條絃。千萬勿彈蟾捕蟬。

送楊次也入都並簡尊甫太史公二首

八座重親未白頭。角巾里第最風流。孫枝本是階庭秀。顰睨看他又出遊。

石渠天祿近何如。欲讀應無未見書。

用黃香傳中語。

但約南舩多載酒。對難官燭看銀魚。時崑木嫂夫人薨北上故及之。

交情到爾凡三世。得路憐余共一心。重向別中留望眼。別愁終淺望終深。

竹溪書屋爲又微聲山兩姪賦三首

竹栢陰交槐柳陰。疎籬一帶棘除針。自從新改橋邊路。大費花時曲折尋。

記得當時卯角遊。書聲愛聽出林丘。兩家前輩多凋謝。又對兒孫感白頭。
石丈兄與先君子情好最密。每過裕菴。余兄弟未嘗不隨行也。

夕火晨香共一龕。閒隨清磬出花南。居人盡識藏書處。碧蘚蒼藤白石菴。
用李公擇事。

沈稼村太史招飲耿巖草堂

十里秋光雨洗新。稻花香路淨無塵。門依曲沼難通櫂。居近東家愛得隣。却對杯杓寬禮數。每聽談論長精神。回看宦海波濤闊。轉羨收帆到岸人。

墟墟舟中口占同德尹作二首

水面浮漚的的圓。采菱歌出采蓮船。此歌賴是吳兒唱。若是吳孃更可憐。
樹低草沒一叢叢。曉日橫生白蕩風。拍岸水痕高一尺。布帆抄路稻田中。

嚶城孫愷似編修欲行善於其鄉竟遭吏議今方罷官就訊吳中相遇感憤成詩

蒼狗如雲極可哀。危機翻自詔恩來。家承忠孝身尤重。禍起衣冠勢易摧。善不可爲寧論惡。人皆欲殺我憐才。乾坤直似蝸廬窄。懷抱除非醉始開。

胥門曉發

月落日未升。大星明一箇。舟人貪早起。客子便晨臥。忽聞水氣腥。知有漁榔過。

長水塘夜泊

高隸接長橋。橋形落蠖蝮。市喧夜微息。犬吠船猶動。可憐一川月。細碎如潑汞。忍負好秋光。推篷兀殘夢。

庭桂初開隣人有來乞花者

吳閩十日遊。歸櫂及秋仲。入門視庭桂。破蕾暗香動。常時花最早。七夕露華重。苦怪今年遲。曾經上年凍。西風不吾私。吹散香滿街。頗有好事翁。叩戶乞清供。披衣揖使入。手折寧煩送。譬如此根株。本自隣家種。我生無長物。有者皆可共。配花稱主人。毋乃被嘲弄。

豆棚爲風雨所壞

平生乏鮮肥。肉食非所慕。偶然營口腹。蓄念計必誤。春種瓜豆苗。愛養比孩孺。插竹就茆檐。縛繩使之固。初看弱蔓引。漸喜衆葉布。絲瓜夏蚤結。落蒂甘於瓠。蘊豆開獨遲。白花待秋露。及茲綠垂莢。採摘在晨暮。夜來風雨狂。傾倒莫支柱。老饕自安分。物理庶可悟。托名得蛾眉。本草白蘊豆一名蛾眉豆吁嗟難免妬。

題高錫純羽士畫像

猛虎入羣牙爪悍。衆蛇齧索懸石斷。平生却咲費長房。學道工夫纔及半。葛陂拄杖辭壺公。隨身霹靂搜蛟龍。道人有道兀不動。心在一輪圓鏡中。後又題云圓月當空光生何處撥開雲霧請師全露

八月十五夜與德尹桂庭對酌二首

半年門逕草芊眠。除草開場爲月圓。月正當頭花照眼。此花原是月中仙。

昨日方愁雨打扉。夜來不料有清輝。可憐萬事盡如此。居者別家行者歸。時潤木編留邑中

看來南北東西月。只與今宵一樣圓。却對團圓感離別。人生能幾十三年。

東田看稻

雲氣散如濤。秋田罷桔槔。漲痕侵岸闊。稗草比禾高。米卜豐年賤。農憐瘠土勞。預期營一醉。歸去滌新槽。

沈孟澤索題小照二首

桐陰寬罩一方苔。流水聲中洗耳來。若是補圖須補竹。琴材已具少簫材。

神理真傳老畫師。毫端躍躍動須眉。人間別有膏肓病。看取先生袖手時。沈精于醫

聞村家打稻聲

鵲豆籬邊捫腹行。惰游筋力負歸耕。自慙飽喫豐年飯。閒聽隣家打稻聲。

九日寄諸弟湖上

如此秋光悵不同。湖天無雨又無風。白蘋未改空洲綠。烏柏長先萬木紅。好事誰還能送酒。浪遊吾轉悔飄蓬。兩峯綠淺登高會。懶到今年似蟄蟲。

重陽後二日雨霽行園

兩尖家門山登陟。昨乃阻曉晴。已過節。興盡力難努。我衰萬事廢。所樂在蔬圃。早菘種旬日。行列紛可數。蟲來蝕其苗。饕餮猛於虎。一寒爲掃除。正賴夜來雨。宿根發餘潤。新葉換翠羽。池西木芙蓉。紅白相媚嫵。下有二寸魚。花影嚼復吐。何來兩鷓鴣。雙翅勇自鼓。公然啣魚去。飽食不避主。可憐病橘林。凍裂上年土。坐視千絹荒。官稅私莫補。天心有傾覆。肯諒貧家苦。物理苟不齊。吾寧守終窶。

鞭笞

雨後竹走鞭。鈴鐺瘦相引。小僮撥土裂。剗取如拾菌。烹之媚盤餐。下箸吾未忍。寸鞭何足惜。惜者來年笋。

收芋

芋肥莖葉長。芋瘦莖葉短。率以鹵莽報。吾願良易滿。年豐百物登。磊落光堆盤。其魁蹲如鷗。小亦伏殼卵。

立冬

節候攙暮秋。初陰猶未壯。南檐白日影。入室已一丈。門簾布差密。窗紙油逾亮。坐看佛前香。無風烟縷上。頻年遠行役。浮氣逐塵埃。裘茸插兩手。故與嚴威抗。如今矮屋中。尙欲設屏障。寧非老將至。嗜好改前尙。興到聊復吟。都忘往來相。

落葉詩五首和趙漁玉范用賓

靜中初有聲。策策起林薄。俄聞響簷瓦。急點疑雨作。開門日滿庭。始悟風隕籀。徐行踏殘葉。仰見巢枝鵲。鵲噪一何喜。鴉鳴一何惡。客緒本無端。誰禁對搖落。

好景忽潛移。丹黃換青綠。丹黃亦隨盡。假以絢吾目。失蔭無密林。蔀家有豐屋。嚴霜挾時令。顛顛非一族。何殊百萬師。委甲填坑谷。

摧壞寧自主。出林竟如狂。初來聚堆阜。倏忽還飛揚。不妨穿我籬。慎莫打我窗。籬穿可徐補。窗破風滿牀。春花得人憐。飄蕩尙苦遽。天公肯汝惜。狼籍等敗絮。從來擇庇羣。多在成蹊處。君看西家葉。又過東家去。荒居環雜木。最怕冬來風。如駕一芥舟。震撼驚濤中。幸賴杜陵老。前月已耳聾。人生有聞見。榮悴方無窮。

欲遊雲岫不果戲示德尹

吾鄉鷹窠頂。陡起東海邊。飛鳥到山止。東南水浮天。常聞十月交。登臨得奇觀。天文直角氏。日月行同躔。憑高視倒景。長在寅卯間。初生兆一魄。摩盪蛟龍淵。須臾一綫紅。迸出白玉盤。晝然劈作兩。對射光相穿。白者忽潛形。孤輪躍紅丸。是名爲合璧。故事山僧傳。山僧老白頭。歲歲居山巔。目擊凡幾箇。流傳徧人寰。嗟我與吾子。好奇結前緣。足跡半九州。所到窮山川。如何名勝地。近失耳目前。昨聞大阮介菴語。便思陟嶺。帆朝來復逡巡。相對亦可憐。勝遊無近遠。人苦不得閒。既閒或少伴。得伴長無錢。乃知意興豪。必及少壯年。一慵百事廢。豈獨登山然。

題曹希文被蘭圖

噴水澆花曉尙寒。試憑纖手摘來看。神仙舊是瑤臺伴。再到人間合夢蘭。

後落葉詩三首

衆葉四散飛。鸞鷗亦暫停。枯叢剩數點。有如塊粘萍。又如將曙天。尙帶三五星。烏雀聚疎影。夕陽到空亭。時還墮一片。夢化蘧蘧形。

向榮旣欣欣。黃落亦槭槭。却將傍觀意。爲爾生分別。何如兩相忘。造化本無迹。山僧撥葉至。或嫌門徑窄。吾嬾不出門。門前任堆積。

我吟落葉詩。如與落葉語。年年走關塞。搖蕩愁見汝。馬頭聲蕭蕭。打面風帶雨。吳霜點兩鬢。歸作故林主。故林豈無春。過眼同逆旅。後時感獨立。孰是歲寒侶。

題高江村先生泛槎圖小影次韻

葛陂龍化杖如仙。欲捲銀河瀉作泉。除是先生能鎮定。波濤人海正粘天。

雪中呂山劉見過

去年別君處。吳中正連陰。雪花大如席。開船太湖心。今年君過我。海天又寒凝。去聲輕冰觸篙破。清脆聲可聽。一年復一年。能禁幾回老。與君迫暮景。爲別常恨早。我有一斗酒。可以禦北風。酒熟挽不留。問胡太匆。

匆君言既相見，興盡我當去。正如上番來，彼此兩不遇。去冬山澗過里中，余留洞庭未返。

曹希文以端硯詩四章索和卽疊原韻

溪光如眼綠潭潭，洗髓何辭一再三。碧落數星瞻夜斗，冰綃半尺剪春蠶。料分琥珀知難並，匣配琉璃定不慙。三十六鱗煩寄取，好磨濃墨寫雲藍。用段柯古詩古事。

紫雲一角割天南，秀色猶看帶嶺嵐。束峽波濤時一湧，濕毫風雨潤長含。來疑甃社光吞月，去恐延津勢躍潭。神物自來須善保，有求容易遂虞曇。時有欲得宋齋執法硯者故及之。

巖洞烟霞笑未揮，欲隨翡翠竟巢南。筆因興到詩情淡，嗜與年深石性諳。圭璧方圓形總肖，龍蛇蟠攫力誰堪。兩都賓主如相見，淬瑩才鋒出健談。

雅好雖多不厭貪，眼中似爾亦奇憨。一生自許癡無偶，兩手從誇硯必三。古人以貪多者爲兩手三硯，希文蓄石最富故云。俗論掃空和氏癖，瓣香爭識米家菴。新宮銘草誰先就，仙掌摩挲與細探。

食齋

朝來食指無端動，走覓隣園又一奇。薄雪乍消青冒土，滿籃香薺未花時。

冬夜宿古衡山先奉政公祠下感賦

路滑冰堅賴短筇，到來支枕榻纔容。透窗燭影寒於月，拏雪松枝健比龍。老屋將傾傷世澤，墓田久廢媿

春農十年塵夢憑呼覺。金粟山頭一杵鐘。

除夕示德尹潤木信菴四首

前夜雷霆了不驚。

三日前大雷電

靜中擾擾惜羣生。一村野犬多狂走。多事隣家爆竹聲。

山妻椎髻子頭蓬。布褐隨宜稱老翁。特與孫雛破年例。抱來膝上換青紅。

從前筆墨粗償債。削藁存來得幾何。剛是今年無可汰。應酬詩少唱酬多。

村巷無雞漏板遲。漫漫長夜夜何其。野人預辦朝眠熟。怕作新年日蝕詩。明年元旦日食

敬業堂詩集卷十四

潞城集起壬申正月盡七月

庚午春朱恆齋由刑部郎出守九江。枉書見招。踰年始往踐約。既爲輯廬山志。復遂廬山之游。賢地主之。貺我良厚矣。

禾中與德尹別

四海皆兄弟。何人似卯君。也知年向老。不合手頻分。夜夢留殘月。春帆感斷雲。得歸吾早決。負土共成墳。
時方計先人葬事

吳江留別張弘蘧庶常

南風激船如釋箭。片帆曉發平湖縣。百六十里半日程。第四橋邊一相見。開懷各話別中事。蒼狗浮雲凡幾變。三年善病君差強。君但憂貧不憂賤。我今落魄仍江湖。明朝又欲西辭吳。酌君之酒與君別。楊花拂頭髮。雙雪。

夾浦橋阻風

夾浦橋南客棹孤。雨聲連夜洗平蕪。東風吹淺吳江水。半作春潮漲太湖。

山塘晚霽

最好停橈近酒家。放晴天氣日初斜。盆梅謝後蘭芽茁。正月蜂聲未鬧花。

曉渡西沅回望宜興縣郭

櫓聲西入蝦籠嘴。波面微微過沅風。濃日吐烟烟吐樹。浮圖一角是城東。蝦籠嘴西沅港名。

高淳

縣小無城郭。橋長卽水門。魚蝦鯉作市。鵝鴨鬧如村。曲曲橋隨岸。叢叢柳抱園。漸知江路近。盈縮視潮痕。

渡蕪湖關

兩槳前頭水勢寬。曉風吹得敵裘寒。漸空杼軸憐民困。老閱波濤信路難。此去罟師聊作伴。從來瀧吏必

嘲官。

時官勅爲津吏所阻。

篋中一卷彈箏集。忍對江山制泪看。自此西上皆已未夏秋間與先兄縉荒同遊地也。彈箏集兄紀游篇名。

荻港人家杏花

輕舸細雨江村路。過眼東風見杏花。略似小車逢綺陌。不知紅豔屬誰家。

雨中過銅陵

沙尾沿流曲作堤。青山一半吐城低。洲空亂雁爭歸北。路轉千帆盡向西。正剪渡時風乍漲。最含烟處柳初齊。客程已厭連朝雨。不要春鳩更苦啼。

雨後望九華山

橫看不與側看同。九朵芙蓉並插空。去鳥已衝殘雨沒。歸雲忽漏夕陽紅。劈開華掌層層翠。使盡湘帆面面風。終是詩人言語大。攜來直欲置壺中。東坡名仇池石爲壺中九華。

荷葉洲對雪

在大通對岸。

梅根浦口風尤緊。荷葉洲前雪正濃。兩岸曉雲深似墨。一條春水健如龍。唐羅隱曾卜居九華山下梅根浦。按圖經江水歷李陽河經梅自九華山麓出江卽此也。

雪晴池陽舟中

曉行池陽路。霽景豁清美。江南江北山。照影同一水。半衝殘雪白。半插斷霞紫。眼前有奇句。只在空濛裏。我嬾吟未成。風吹櫂歌起。

大風至劉婆磯

江豚忽掉頭。微動青玻璃。俄看黑雲起。遙指天南陲。須臾墜我前。橫截江兩涯。拔江噴作雨。白日潛光輝。初疑鰲山傾。又若鱷窟移。舉舟向空擲。綆斷誰能縈。長年束手嘆。有力不得施。而我于中流。高枕故咏詩。明知怖無益。聊復忍少時。男兒可憐蟲。造物終見慈。旣濟乃思痛。嗒焉中心脾。投文訴江神。略陳危苦辭。水從西南來。風亦西南吹。誰歟激使怒。若是不可磯。自我涉江湖。十三年于茲。南浮及北渡。履險間有之。

此胡太酷烈。性命輕嶮巖。仕宦涉江來。揚帆若揚鬢。船尾點畫鼓。船頭插黃旗。大賈涉江來。滿載居贏奇。放溜如放馬。控縱從人馳。我船何所載。載書載鴟夷。壓浪一葉輕。疾行固其宜。如何強弓彎。寸進恒苦遲。神于我乎薄。厚彼寧獨私。咄哉窮旅人。初受俗眼嗤。擲揄到五鬼。漸漸伺路岐。惟神實正直。倚賴相扶持。今朝大戲劇。漂泊將誰依。禱罷似有感。撫枕魂依稀。神來入我夢。責我大有詞。風水渙成文。變化豈汝知。滔天初濫觴。至險出坦迤。汝以耳目料。何異握管窺。汝又好遠遊。遠遊計終癡。萬里走從軍。還家仍布衣。十年就場屋。逐衆趨京師。人皆取巍科。二黜名獨遺。謂宜自揣量。息影甘荆扉。茲來非宦遊。又非競刀錐。皇皇義奚取。放浪形骸爲。汝居頗有園。園中頗有池。好風皺池面。浮花舞漣漪。此豈有驚波。來溷汝息機。汝自捨之出。去安而卽危。不聞南山躋。下有季女饑。不見東海畔。中有踏浪兒。兩者聽自取。決擇休然疑。叩頭謝江神。痼疾神所治。大夢喚初覺。行當早旋歸。

題權陽旅壁

噩夢驚回路已賒。艸艸船上槽伊鴉。青山繞屋無修竹。山皆頑石不產竹紅袖當壚有杏花。野渡漸生沿岸火。春流未沒去年沙。綠楊影裏初弦月。人隔烟江正望家。

田間先生聞余至自青山命駕來會喜賦

春風弭楫向權陽。舊約多年不敢忘。先生在都下。送余南歸詩。有秋到皖江尋舊好。可能一問白頭來之句。四海平交無行輩。兩朝軼事在

文章從知老境難爲客。誰與先生特置鄉。一片青山高插漢。巋然真似魯靈光。

花朝晴示僧道楷

初日烘雲碎作霞。討春人競出江涯。老來不喜閒桃李。別約山僧看菜花。

自樅陽至楊樹灣道中卽目

併日春光鬪物華。馬頭胡蝶太夭斜。誰知駭綠紛紅候。還有春風未放花。義津橋外見碧桃一樹猶未放花。

三角潭

春禽交交鳴綠楊。征夫辨色早束裝。前行十里霧未醒。驢尾秃速驢耳長。朦朧人語遙喚渡。約略村落開微陽。烟光兩岸溪一曲。樹影四匝潭中央。菜畦麥隴桃李徑。高間紅白低青黃。新鵝野鴨好毛羽。拍拍飛出沿方塘。田家之樂樂何限。頓令過客忘他鄉。只愁霧重天欲雨。橫策又上黃茅岡。

桐城謁左忠毅公祠

祠在縣治東數十步。

歷歷三朝事。他時髮指冠。賢人當橫決。國勢必摧殘。俎豆新楹肅。乾坤正氣完。如何鄉後輩。偏有孔都官。謂懷寧也。

過田間先生山居相留信宿出示藏山集再賦二詩博和

層巒俯瞰萬松梢。中有高人舊結茅。自入鹿門詩一變。竟馴龍性易初爻。雲盤遠勢鴉翻陣。花作新泥燕

補巢未免累翁雞黍約。往還原不拒貧交。

比似仙源那易尋。避人畢竟要山深。誰教鶴怨猿啼客。來聽鸞歌鳳舞音。語雜談諧皆典故。老傳著述豈初心。好看龍馬精神健。東武時爲抱膝吟。

三江口苦雨

那利磯頭雨殺風。千檣烟氣濕濛濛。楚天低壓平蕪外。何處青山認皖公。

大雪渡馬當

臥看穿雲日色黃。起聞鯨吼北風狂。新詩也得江神助。雪打春帆渡馬當。

順風揚帆時閉目靜聽如空山梵唄殊有會心

破浪風前萬鼓鳴。喧囂原向靜中生。無心只作深山聽。一樹松濤起梵聲。

與九江太守朱恒齋

一麾暫出領名邦。九疊屏山九派江。正喜爲郎猶未老。早聞治行已無雙。謳歌滿境鶡音革。軒冕巡城虎氣降。時有虎至郊外。君移文城。陸神一發燈之。依舊官居精典籍。只多鈴卒晝敲梆。

二虎歌 并序

壬申正月。有兩虎闌入九江西門外龍開河。傷一人。已而逸去。市人惴惴恐其復至。朱恒齋太守。齋戒

爲責躬文。翌日大會屬員於城隍廟。卽漢將軍灌嬰。及宋大夫祠下。漢九江守宋均。既焚牒告神。則命虞人挾弓矢火器。窮追之。期于必獲。越五日殪其一。至是盡殲焉。黃質黑章。猙獰可怖。聚而觀者數千人。咸謂使君至

誠感神。能力除民害也。適余至九江。目覩其事。作歌以俟采風者。

潞城連山猛獸多。兩虎突入龍開河。腥風倏倏日杲杲。白晝市上無人過。使君視民如赤子。威鳳生儀麟有趾。豪強斂戢盜賊清。爾獨何爲至於此。灌將軍廟宋公祠。能捍大患則祀之。撞鐘伐鼓會僚佐。第一先焚責已辭。與神後先俱守土。政拙慚余不如古。愛其父祖及子孫。忍昇孱人飽虓虎。明朝大獵城南闔。毛風血雨迷荆榛。特開一面縱雉兔。死不當罪傷吾仁。須臾虎自林中出。小者先擒大者逸。雖擒一虎戕一人。其勢公然兩相敵。此時伐罪更有名。合圍再往大掩羣。潮州鱷魚必盡殺。不信請讀昌黎文。虞人眼疾如鷺鳥。餘勇登崖鬪牙爪。咆哮一聲山忽裂。火箭飛空碎其腦。黑章黃質毛斑斑。旗杠壓肩奏凱還。猶防作力斷急縛。血色併出雙睛間。道傍觀者爭太息。自古神功扶正直。百年兇暴一朝除。此事知公有陰德。江邊戶戶皆椎牛。從此山無樵采憂。詩成大咲冠纓絕。我正欲作匡廬遊。

廬山之遊未果呂灌園有詩索和

峩峩指雲峯。拔地幾千丈。仙靈晦高跡。元氣棲蒼莽。朝來雲抹腰。露頂氣一爽。蓮花本無蒂。蒸出仙人掌。拂鏡眼雙明。扶烟鳥孤往。勿嗟遊未到。遐矚寓心賞。但恐身入山。依然結塵想。

西門之役既連斃二虎矣後五日復獲虎子二呂灌園作後二虎歌再次其韻

虞人入山官吏賀。擣穴成擒無小大。盡將醜類肆市朝。不許兇雛草間臥。去如烈火歸如風。覆巢破卵五日中。獻肩獻糞來接武。貫蝨精神用強弩。擔頭縛作春筍斑。一一奇毛入官府。餘威假托雖有徒。不聞王政寬無辜。賊吾民者殺無赦。別有淵藪容逃逋。弱食頗分強者肉。倚伏機難論禍福。春行秋令公所憐。陰雨隨車洗餘毒。時日大雨以寬濟猛在酌宜。潁川有鳳方來儀。殺胎豈惟禁獵戶。竭澤兼欲防漁師。庶幾百物稱蕃息。童子仁心使君德。我爲此語非養好。若是兇豪須斂跡。

楊花同恒齋賦

散作輕埃滾作團。不成花片但漫漫。春如短夢初離影。人在東風正倚欄。微雨乍粘還有態。柔條欲戀已無端。祇應老眼憐輕薄。長自摩挲霧裏看。

初聞黃鸝次灌園韻

一聲流過小窻前。去國關心又一年。圓入客吟同宛轉。熟聞鄉語倍纏綿。畫樓脉脉通春夢。碧樹茸茸暮曉烟。爲是好音須愛惜。自憐終勝受人憐。

同呂灌園鄒仙來諸君遊甘棠湖登烟水亭次壁間舊韻

長烟濛濛春澹澹。草色波光晴颭灩。廬山翠掃兩角雲。倒瀉杯中青一片。舊開小閣壓紋縠。時見飛帆掣

流電背部人如燕雀稀。點沙舟與鳧鷺亂。地偏絲管曲嘈雜。市遠塵囂風截斷。可憐俗眼競喧湫。誰肯清遊期汗漫。同時數子興不淺。佳句澄鮮分謝練。莫辭勝境日日往。預恐萍跡紛紛散。何當春酒變成湖。醉過鶯花三月半。東坡送劉景文詩云。春酒一變甘棠湖。自注云。景文卜居九江。近甘棠湖。卽此地。

琵琶亭次宋郭明復舊韻

春江帶城沙嘴白。弓勢彎環抱新月。我來縱棹半日遊。敗意眼前無一物。吟詩直入老僧家。小技忽癢難搔爬。分明有句和不得。古調豈叶箏琵琶。先生不作誰與語。白日茫茫變風雨。男兒失路雖可憐。何至紅顏相爾汝。與公相去又千年。依舊荒城無管絃。掃空題壁孤亭在。唉指門前浪拍天。

江州雜咏四首

依舊江關俯麗譙。居人指點說天橋。明太祖破江州事。戰迴左蠡軍容壯。鑿斷殘岡霸氣銷。東門外有天子堂。相傳劉誠意惡陳友諒。

都此得勝地。故鑿之。鎮將南朝偏跋扈。部兵西楚最輕剽。指左良玉。自從血洗孤城後。九派空回寂莫潮。

天文容易掃機槍。隣郡猶傳戍鼓鳴。戊辰夏。楚盜破武昌。黃州。鴉鵲自朝英布廟。此門外。九江王廟。至今血食。魚龍曾擾灌嬰城。紛

紛設險寧論地。往往時危獨被兵。按史。自北宋以來。凡四屠城。四十三年休養力。不知何福享承平。

峭削峯巒北面當。雲頭一半割南康。高僧舊入遺民社。世業誰留佚老堂。三劫烽烟埋洞壑。百年文物遞

滄桑。名山志在真難續。或有奇蹤墮渺茫。時余方輯廬山志。

別開官署射亭傍。一角頽城壓短墻。螺髻浮青虛劍匣。府署正對雙劍峯。宋乾道中蜀人唐立方。雒媒平綠展球場。舩稀小步初移市。客上高樓必望鄉。樂天詩。三百年來。庾樓上。曾經添得黃蘆侵岸闊。舊遊回

首獨神傷。余己未壬戌。兩經此郡。

余作江州雜詩灌園既垂和。續為潯陽行。感慨淋漓。讀之使我心惻。因推本其意。再成長律四十韻。首言風土。次序東晉以後。迨明初。一一竊據事。終於寧南乙酉之禍。此州被亂情形。始末略備。休養生聚。其在斯時乎。並邀恒齋太守同賦。

鼓角悲涼地。山川要害城。一州當孔道。萬里控江程。近楚風猶悍。吞吳氣未平。鳧鷖飛易散。魚鮪竄多驚。戶少移恒業。田饒廢力畊。兒童知矢石。婦女識旗旌。不諒流離苦。翻疑性命輕。舊文徵史冊。殘局愴棋枰。置郡名長易。秦為九江郡。漢屬吳國。三國初屬武昌。後置潯陽郡。晉改江州。梁移九封王面或驚。謂英布。大

都當用武。未有不稱兵。建業朝廷小。潯陽肘腋并。中原方轉鬪。南服暫維寧。草草圖王計。寥寥伐叛聲。奸雄雖反覆。使相必忠貞。間倚屏藩重。頻扶鼎鼐傾。晉永昌中。陶侃領江州。平王敦。咸和中。溫嶠義兵。由潯

嶼洲。梁承聖中。陳霸先以艱虞經剝連。成敗付閒評。是物關天授。伊誰敢力爭。每聞稱僭竊。旋見就擒烹。江州刺史。定侯景之亂。宋泰始元。徽中。晉安王。子助。桂陽王。休範。梁天監中。刺史陳伯之。俱以江州反。未幾就平。南宋建炎中。李成陷江州。為張峻。岳飛所敗。元至正二十年。陳友諒以江州為都。國號漢。改元大義。尋戰死。昨者

民何罪。今來憤尙盈。以下專指左勤王須奉檄。犯闕爾無名。灞上隨兒戲。涸中咲客迎。崇禎甲申。良玉避

遊擊胡以寧鈞致之住關廂一年已而返武昌至乙酉春監軍御史黃澍僞將軍停鎧仗辨士絕冠纓柳
藏太子詔召良玉入攻馬士英良玉信之遂於三月二十七日移兵至九江將軍停鎧仗辨士絕冠纓柳
亭爲良玉幕客勿戢兵燬火搜牢地盡阮初良玉發武昌挾楚督袁繼成以往至是與繼成標將郝二擢
事具吳梅村集連營九江城外四月初四日遂縱兵焚掠殺男女二十餘萬擢
殘鋒太酷屠戮禍交櫻漂血長溝赤燒空烈焰晴押綱連萬艦宋曹翰居江州取廬山東林鐵羅漢五白
捲甲拔諸營作俑歸曹翰江州屠城自翰始前此未有也貪狼甚李成卽宋建炎中反賊天誅旋幸伏兵發九江良玉殺氣驟難
清落籍銷灰劫招魂異死生若非敷大澤何以起疲氓牙蘗枝初發勾尖草乍萌及時資愛養太守賴廉
明冷署依雙劍峯名顏垣寄一楹涉園除瓦礫課僕種蕪菁耗折空餅粟支吾折腳鐙官貧仍逆旅吏隱亦
柴荆曉雨排衙坐春田露冕行設施看次第氣象卜豐亨蟋蟀還農俗琵琶遣宦情篇成聊紀實大雅待
君賡

石鐘山

鄱陽吞天來噴薄南出口江流不能敵抵北乃東走懸崖峙西灣水勢掃如帚孤城艮其背外捍賴兩肘
靈區聚神奸石狀雜研醜平鋪理橫截旁罅中劈剖熊羆饑攫人奇鬼起援手峯窠掛篙眼鳥卵破壘缶
一一皆下垂中空無一有有時應鞞鞞照影見星斗忽然風喧唳聲作蒲牢吼年深追蠹壤兼恐石斷紐
惜哉坡公記石刻泐已久蘇公石鐘山記書刻于南鐘石上明正統己巳石裂仆於水今失其處矣茫茫宇宙間孰是真不朽

月夜自湖口泛舟還湓城同恒齋太守賦

空江夜東注。月光似俱流。舉頭看青天。水去月自留。移帆忽西向。月又隨我舟。而月豈有心。適與吾目謀。澄觀得靜趣。含景無停休。不辭川路長。獲此清夜遊。遠樹小池口。孤鐘鎖江樓。須臾燈燭光。候騎迎沙頭。誰知太守樂。夢亦同鳧鷗。

春晴曲效溫飛卿體

朝陽透簷鵲聲喜。烟外遊絲風綽起。馬拂花鬢驕欲嘶。招招酒旆垂楊裏。蕉衫笏屐稀出城。上樓曉看南山晴。平春遠綠望不到。一幅錦機新織成。江聲剪斷尋芳徑。九派澄光鑄明鏡。柳花散作千點萍。日夜東流知水性。

三月十七夜與恒齋月下論詩

庾公樓外月。飛光上雲崖。此時兩相對。此景良自佳。我挾山野性。尋君到衙齋。不棄貧賤交。酬唱晨夕偕。脫略分雖忘。終不雜恢諧。所商在文字。虛受非擊排。縱論古與今。瀉胸走江淮。力欲追正始。旁喧厭淫哇。向來風騷流。汎濫無津涯。可傳必有故。長松出樊柴。明明正變途。花葉殊根莖。須求作者意。勿使本分乖。新詩壓時賢。高朗洵少儕。當與古爭勝。拾級已得階。人言簿書煩。正坐乏雅懷。君懷皎如月。塵霧其能埋。

魚苗船

幾片紅旗報販鮮。魚苗百斛楚人船。憐他性命如針細。也與官家辦稅錢。

曉晴咏恒齋庭下芭蕉

放晴天色愛清朝。閒赴風前翠袖招。忽見主人窗下綠。始知夜雨爲芭蕉。杜牧詩。主人窗外有芭蕉。

九江向無鱗魚網戶。忽獲一尾以饋太守。晚餐分噉作三絕句。

鱖魚子鱗賤如毛。何物能令市價高。從此湓城添水產。白頭春浪出銀刀。

四月家鄉記飽餐。朝來指動豈無端。似防遠客歌彈鋏。破例相隨過鴨欄。鱖魚不過鴨欄驛。以魚隨潮上。潮到小孤輒回也。

三百錢償一尾鰈。擊鮮原不累民間。可知太守清如水。豈在懸魚絕往還。

署庭蓄錦雞。且一年朝來忽飛去。恒齋有詩屬和。

爲爾無端惜剪刀。養成六翮竟如逃。啄餘香稻新拋粒。收得雕籠舊落毛。羣入家雞終不亂。飛隨野鶴便能高。人間是處多羅畢。文繡深林好自韜。

明日吏人以錦雞來視之。卽昨逸去者。再作一首。

勿論城市異山林。性在終知去意深。誤啟樊籠驚遠舉。特憐毛羽募生擒。舊曾相識緣文彩。待爾重來伴苦吟。從遣周防是誰過。主人初不起猜心。

初夏坐烟水亭望廬山二首

一奩明鏡插芙蓉。積雨初晴翠靄濃。萬疊好山看未足。又添雲勢作奇峯。

分明寫入畫圖工。倒影看來上下同。忽失水中山一半。浪紋吹皺日高風。

余方輯廬山志擬入山訪舊蹟頻爲雨阻恒齋有作和之

日日開軒對翠氛。勝遊偏阻鹿麋羣。不愁溢浦長多雨。但恐匡山化作雲。紀事欲真須眼見。異書難使信傳聞。一條柳標從僧乞。可要籃輿累使君。

芭蕉恒齋再索和

一葉復一葉。自然成綠陰。後先如有序。舒卷豈無心。漸覺空庭窄。能添曲徑深。野人新得句。題罷亦長吟。夜夢入廬山。桃花滿谷一僧指。云此杏林也。因誦樂天遊大林寺絕句。夢中了了醒。而以詩紀之。卽用白韻。

指點仙家手自栽。桃花却傍杏林開。眼前一咲真成幻。公是身遊我夢來。午酒初醒

兀兀醺醺坐日斜。爽神全賴閩林茶。三竿砌竹搖風影。一箭盆蘭得氣花。夢枕易消非實境。丹爐難轉是年華。江城節物關何事。催得遊人獨憶家。

生日書感

落拓差堪比牧之。江湖曾費十年詩。早衰鬚髮非無故。暗減心情只自知。酒盞每逃狂客坐。杖藜將赴老

僧期尙慚習氣除難盡。間與人爭劫後棋。

梅雨二十二韻和灌園

五月潯陽雨。蛟龍正鬱蟠。地浮三楚闊。雲納九江寬。暴漲搖城郭。餘波溢井榦。鄱湖連浩淼。廬阜失巒岈。鳴鶴翻依樹。飛魚不上竿。及時陰已動。退位火疑殘。天氣昏連曉。人情暖易寒。蚊飛偏攪書。蛙鬧故侵官。舊縷蛛穿網。新泥蠹築壇。竹皮流薄粉。桐乳墜輕丸。蕉翠宜沈綠。榴紅信渥丹。濕螢光燄短。菀鵲羽毛乾。柳壞蟻螬匿。墻空蜥蜴鑽。案蠅沿硯水。穴鼠嚼盆蘭。物理尋常見。詩聯貼妥難。爐香縈几席。徽黜上衣冠。不出拋書屨。無聊却扇紈。老嫌書幌暗。病覺布衾單。冰簟涼貪睡。琴絃緩廢彈。入舟同寂莫。着屐試蹒跚。直欲登樓去。還從倚檻看。空濛雖變態。縹緲必奇觀。寓居近在庾樓下。而不得登。故云。

雨中廬山僧書至

社裏何時著少文。書來猶未斷聲聞。千峯濕翠隨行脚。帶雨開緘一屋雲。

階除積水課力疏下流放之射圃隙地

尺寸階前地。無源本易盈。只應兼土濁。那得入江清。曲折隨人意。高低驗物情。下流荒圃在。吾枕厭蛙鳴。

曉吟

江聲入戶竹風急。樹影過牕山月斜。誰共此時留此景。殘更煞後未啼鴉。

次灌園潯陽唱和賦感見贈二十四韻

大火方司令，餘威未解嚴。夕陽明杲杲，殘雨過囊囊。書少渾難借，棋低又懶拈。移時看燕乳，隨意聽魚噏。圃廢閒誰治，江喧近可嫌。談諧須得伴，興會賴相兼。洗甕晨浮蟻，推窗夜候蟾。學禪根器鈍，鬪韻筆鋒銛。鄉信燈空卜，歸期夢代占。山中俄換葛，野服待分緜。我氣貧旋挫，君懷老益謙。悲歌鬪變壯，醉語誤疑譫。鴻爪泥長印，蛛絲羽易黏。勝遊宗炳畫，往事季心鉗。灌園爲吳江大司馬之子甲申以後因亂破家止沸吹壘冷，焚枯過劫炎。乾坤全晚節，畊鑿合窮欄。君有別業在玉屏山中爛熳三秋菊，崢嶸百歲枿。以閒聊送老，所得詎爲廉。幸舍猶彈鋏，成都想下簾。商聲流石齒，仙氣入霜髯。高浪晴湖闊，奇雲夏岫添。掉頭隨去住，放跡等飛潛。澗壑終難返，塵埃久屬厭。天涯同拙滯，吟罷寸心慙。

江漲八韻

頗怪連宵雨，重雲尙合圍。忽聞溢浦水，已上庾樓磯。急鼓爭趨陣，高舂怒發機。九龍多被譴，萬馬孰能韉。魚健衝人過，鷗輕踏浪飛。淘沙原自濁，流惡想尤肥。幸勿侵三版，還防沒半扉。村橋新漲好，吾欲放船歸。

余所居名橫漲橋

晚晴

曉愁暴漲與堤平，意外斜陽得晚晴。小閣放教雙燕出，高梧忽帶一蟬鳴。便思對酒難消暑，若要看山合

上城狼籍殘雲飛不盡。江空留作斷霞明。

連日苦雨江勢轉盛。聞小池口一帶已成巨浸。感賦。

見說黃梅縣。連朝浸渺瀰。雨中隄盡壞。江口地尤卑。農事侵饑溺。天心望轉移。可憐關隴旱。竭澤正斯時。

午後有人自廬山來云。昨日白龍潭起蛟。故水暴漲。

瀑布聲中雨瀉檐。洪流百道走城南。山橋衝斷探樵路。歸報夜來龍洗潭。廬山大雨驟至。人謂龍洗潭。

曉霽望南昌歸信

十日荒城聽雨聲。壞墻前後露株楹。蛇因亂草當階臥。蝸是空坳積水生。喜動眉間看曉色。夢于枕上算離程。故應乾鵲知人意。已報歸期又報晴。

桐陰和灌園

積雨晴來暑倍加。午陰端愛片時遮。展開疎簾三間屋。掃過空庭半月花。清露欲流濃作乳。碧天初洗澹無霞。如何葉底留蟬蛻。長聽高吟在別家。

試奕次灌園韻

澹墨行疎紙。畫枰兩人隱。几亦忘情。總饒老手通盤算。只似兒曹鬪草贏。角上紛紛排陣蟻。睫前擾擾過飛蟲。莫嗤當局同游戲。得失心空始不爭。

夜熱不成寐聞秋蟲聲

循環造化機。陽壯陰已伏。不知昆蟲智。何以先草木。我亦化中人。投閒如病鹿。日長貪午枕。夜睡焉能熟。賴是心寡營。未妨羣動觸。徘徊風露下。太火西流速。須臾雞三號。細響猶斷續。誰能將此意。寫入玲瓏曲。
樂天玲瓏曲云。黃雞催曉。卯時鳴。白日催年。酉時沒。

一草亭後補築土墻同灌園越秀賦

缺後方思補。誰防未雨時。大都勞版築。不過當樊籬。儉與茆亭配。低於菜圃宜。墻頭環埤堦。留看一帆移。
墻北面
環城堦

月夜得南昌消息知恒齋歸期猶未定

客來依地主。主去客翻留。萬事盡如此。一官難自由。日長愁過夏。夜靜漸知秋。若上滕王閣。休忘庾亮樓。

蟬蛻和灌園韻

不應已蛻尚名蟬。彈指難留過去緣。枯比老僧初入定。輕如羽客乍登仙。誰云解脫非生理。始信飛鳴是後天。從此螳螂無攬意。機心不上七條絃。

除草

病暍貪微涼。空庭方夜坐。蚊雷來茂草。一唱千萬和。誰能忍痒肌。委身飼羣餓。可憐蜘蛛巧。布網僅如磨。

暗飛餘地多。祇觸凡幾個。老夫爲暫避。奇計出高臥。除惡務其源。攻先窟穴破。披衣早我起。刈草僕晨課。一聞奏刀聲。快若風雨過。非云迹盡掃。但使勢少挫。滋蔓或養奸。斯言可喻大。

灌園用瓷盆盪水浮以花片畜魚苗其中作案頭清玩索余賦之戲成二絕句

詩翁六十如兒戲。一勺分江几案間。少片壺中九華石。湖口李正臣蓄異石名壺中九華東坡山谷皆有詩配他剩水作殘山。

魚吹花瓣亦生瀾。水擊鵬飛一樣寬。下得南華新注脚。藕絲針孔是奇觀。

露坐待月

城頭待月月未出。一綫飛光曳長白。明朝有客渡湖來。湖面應添落星石。

苦旱

積雨乃祈晴。久晴迺望雨。如何望雨意。止在驅炎暑。難將田野情。一概例官府。江流空浩浩。不救稂與黍。南山昨日雲。竚待商羊舞。狂飈忽捲散。吹井作乾土。朝來禱龍祠。會衆伐大鼓。此邦歲早穫。隣郡給商賈。六月合嘗新。過時恐無補。可憐關中旱。移粟累晉楚。糧船從東來。輓送力接武。時方輓運入楚漕艘家家募丁壯。日候江潒。寧知餽運人。自迫忍饑苦。天心莽難測。含痛向誰語。

起最早

竹亭宜早起。獨自繞廊行。漸覺月光淡。不知天色明。草長兼露重。庭曠得風輕。牆缺廬山好。峯峰似染成。

冒風渡湖口

湖欲與江合。江猶吞吐間。浪頭千點白。一點是鞋山。

立秋夜彭澤舟中

斗柄轉城頭。江聲健入秋。若逢明月夜。應作小孤遊。水柵依茆屋。風帆帶荻洲。半年遷客夢。星露警扁舟。

雨後登彭澤北山佛閣

眼界江天闊。登臨卽大觀。雲根連地拔。山勢讓成寬。路險苔偏滑。風涼汗易乾。夕陽紅欲墮。好是猶凭欄。

彭澤縣雨中望小孤山

龍城望小孤。巖樹近可數。何來雲一片。遮斷蘆花渚。遠勢入微茫。彭郎磯外雨。

龍城彭澤驛名。

七月初三夜

七月初三月。如弓未上弦。涼風彭澤柳。遠火望江船。不作披衣坐。聊爲枕柁眠。傍人多喚我。辜負早秋天。

時余微疾早臥。

秋暑

大火初流暑未清。長川落日正西傾。氣蒸遠水浮天動。血染殘霞照夜明。蟋蟀豈知催雨意。兼葭只慣報風聲。故鄉消息經時斷。白髮無端一夕生。

發彭澤紀事和恒齋

吳楚西來太驛騷。亂帆啣尾上千艘。戍旗不動方傳箭。秋水初平尙滿槽。樂天詩。江樹豁忽疑遙岸。盡天長不覺遠山高。民間疾苦原難悉。移粟徒煩睿慮勞。

遊下石鐘題山響樓壁

牛羊滿山似可驅。鞭之不動非石乎。懸崖無根乃有株。老幹亂拔千章榆。嵌空樓閣凌紫虛。列仙遠邀山澤臞。落星如漚漂大孤。五老拱揖朝香爐。沙洲鎖斷九江脉。正面全受鄱陽湖。湖波本清如碧驢。下流盡被江所污。是日大風聲拔木。洪濤倒挾雷霆趨。須臾風止平若鋪。細聽林籟鳴笙竽。石鐘非鐘扣亦愚。孰辨清越分涵胡。作詩一咲解者無。四壁自看江山圖。

江聲閣次家聲山壁間舊韻

勿將架構擬人工。百尺高樓萬里風。彭蠡遠帆斜出口。匡廬晴翠淡粘空。涼生欄檻秋先爽。助得江山句轉雄。好是不題名姓在。免教僧費碧紗籠。

王令詒自吳淞至滬城連牀話舊驚聞錢越江學士京邸訃信悲感交集卽事成詩

急雨渡江來。蕭然挾秋氣。清風偕好友。一夕千里至。殘燈照黃昏。梧葉響階砌。荒城忽連榻。此會出不意。可憐窮旅人。一咲天併忌。新歡猶未極。旋隕傷心淚。憶昨客京華。青衫最憔悴。髯公獨好我。不與時並棄。

往往合酒徒。開懷使沈醉。江湖莽回首。已若隔生事。那復承訃音。嗚呼別離地。君頭絲欲換。余齒豁已墜。浮生知幾何。聚散逆難計。吟蛩耿敗壁。達旦兩無寐。

宋中丞牧仲自江西移撫江蘇。邀余入幕。投詩辭之。

此遊本意因廬嶽。半載逡巡未謁公。擬束歸裝向溢口。送移旌節赴江東。空煩使命雲霄上。豈有人才道路中。敢謂山林便野性。倦飛無分借秋風。

同王令詒泛甘棠湖至城南謁陶白祠

艇子打兩槳。剪風如燕梢。白鷺導我前。行行入蘆葦。古祠晝常啟。不待遊人敲。門前十畝田。按碑記云。有田十畝。卽以夏旱土不膠。牛宮柱欹側。旁種苦葉匏。居僧老業農。叱犢犁黃茅。苦云生理拙。歲歲山田饒。入門風氣適。沙水互裹包。湖光隱林杪。山色遮城堦。天然好位置。結構宜檜櫂。緬懷二先生。潛見各一爻。潔身苟有歸。千載應神交。如何斗室中。湫隘隣溷庖。誰能移佛座。勿令名實淆。正室三間。中設大士像。而二公祠反在其左。與僧廚偪處。殊不稱也。

送令詒歸青浦卽次留別原韻

遠別無善地。况乃當溢城。送客不思鄉。此語非人情。鄉心我久發。非緣送君生。輸君後我來。竟復先我行。大江秋滾滾。日氣昏離程。斷雁思舊侶。閒鷗狎新盟。茫茫對歧路。歸計何時成。

敬業堂詩集卷十五

雲霧窟集 壬申八月。

二月杪抵九江。卽擬作匡廬之遊。因循至秋仲。恒齋爲余聚半月糧。遂策杖往。自化城北登山南。下舍鄱口。循麓而歸。凡十餘日。得詩七十首。身在雲霧中。仍恐未識廬山真面目也。

遊廬山道中寄恒齋太守

山行宜寂寞。獨往翻踟躕。一遇同遊人。謂王琴村決起興有餘。頗累賢地主。聚糧辦籃輿。曉來風色好。初日明烟墟。千巖排空來。勢若掖以趨。但聞空翠裏。竹樹聲疎疎。我今心力衰。事事不迨初。預愁無傑句。何以酌匡廬。

經周濂溪先生廢祠

尼山大聖人。重去父母邦。人情非得已。孰肯違故常。先生少而孤。依舅居丹陽。母歿卽葬此。後乃官南康。官貧久不歸。遷柩於九江。仁心重廬墓。卜築匡山傍。托名寓濂溪。中豈忘故鄉。同時往還輩。無若蘇與黃。猶不諒此意。作詩徒誇揚。我來千載後。拜公謁祠堂。荒畦被秋禾。四野烟茫茫。溢城賢太守。爲政持大綱。度地面三峯。種蓮池中央。煌煌謚告石。舉廢今方將。時恒齋捐俸重創書院願備洒掃人。幸勿揮門墻。

太平宮

北風江上來。吹瓦墮屋角。牛羊入廢觀。古木一鳥啄。問此宅何神。其來已渺邈。肇興自唐代。廟貌遞樸斲。唐開元中封廬山神爲采訪使者。上古神靈封。每視三公爵。東西南北中。嵩岱恒華霍。廬山雖僻左。不得列五岳。傲然踞江湖。氣象頗卓犖。無端加秩祀。屈首受正朔。山靈恐未甘。孰與一丘樂。黃冠那解此。意在崇榱桷。昏昏入醉夢。舉世呼不覺。神來風綽旛。神去雲解駁。下視九萬空。紛紛蝸與鷲。

東林寺

連山袞袞來。陡起山門前。頑空被偪塞。失却東南天。石稜瘦筋露。礪道枯綆懸。不知何峯水。流作溪橋泉。入門尋斷碑。古蹟想白蓮。同時十八人。縛律如坐禪。飲酒不入社。淵明豈非仙。

題遠公影堂後冰壺泉

影落空堂不記年。依然冰雪照蒼顏。定嫌人世江湖濁。莫放清流更出山。

宗雷禪師索贈

荔枝塔古名僧少。誰是堂中十九賢。好乞謝公池畔水。爲師重長一枝蓮。

題東林方丈

浮嵐疊翠偪崔嵬。三面周遮一面開。我欲向西添小閣。盡邀九十九峯來。株嶺一帶在寺西。若置一閣。名九十九峯。亦絕勝也。

三咲堂書阮亭先生題壁後先生題志云乙丑新正四日同里阮亭王某奉命祭告南海過東林
三咲堂觀故友東癡先生題詩爲之憮然詩載南海集中

聽雨軒中昨曾宿。虎溪橋東今又過。謝靈運屐去已久。蘇子瞻詩留不多。兩袖攙雲獨惆悵。一燈照壁猶吟哦。沙彌竊聽傳怪事。大咲此客如風魔。

西林寺贈魯宗上人

夕陽在西林。孤塔支青天。中有六朝寺。鬪古不鬪妍。樹頭一朵雲。渡水俄爲烟。老僧送客罷。倚樹聽涼蟬。
遺愛寺小憩

侍御遺踪已久蕪。盤盤樵路極縈紆。萬竿藏塢初迷寺。一笕分泉直到廚。勝地乍來忘過客。衰年漸欲信浮屠。木樨香裏逢僧話。舊事三生記得無。

香爐峯下尋香山草堂故址

古寺折而南。一峯蠹香爐。北有草堂址。荒榛穴鼯鼯。白公真天人。咲傲凌中區。本挾烟霞性。歷遊仕宦塗。當其卜築時。意已忘羈孤。人生營菟裘。寧必皆故廬。等是有興廢。此中別賢愚。

上化城

懸崖多烈風。石縫樹不長。怪此獨雄拔。枝枝蔽穹蒼。路轉倍蕭森。古陰暗虛廊。鳥巢不敢寄。一一皆下翔。

我亦難久留。毛孔森開張。翻思風雨會。快受六月涼。

由關門石步行十里登大林峯

此來爲遊遨。忽迫失足慮。中情一怵怯。進退兩失據。隕雲如奔逃。片片掠面去。霞標尙天半。欲到苦難遽。松根絡崩巖。怒石虎蹲踞。隨身賴竹杖。將伯倘予助。移時陟層顛。鸞鶴似可御。眼前少行輩。坐長丈人倨。登頓方自茲。休矜最高處。

講經臺次昌黎遊青龍寺韻

城中望山如握管。寸碧抽簷目光短。罡風掣我絕頂來。地少雲多鋪滿滿。一條江水拖細綫。四面天形罩圓傘。鶴經枯樹或墮翎。龍去空潭不貽卵。何人結茆荒山顛。米罄齋廚爨長斷。豈惟米罄水亦竭。兼值今年連月旱。秋陽炙背汗透衣。客到苦催供茗盃。老禪對客大嗚噉。指說茲遊太荒誕。休誇筋力尙有餘。應慮頽年行莫纂。陸機賦。傷頽年之莫纂。偶然饑渴所不免。前路茫茫預難算。資生破寺例乞食。此去深山漸無伴。雨襟風帽好自擔。垢腳鰲顏向誰澣。奔馳不定覺客忙。應接無端累我懶。白頭住山年六十。投老安心就閒散。芒鞋不踏戶外塵。坐看嶽崎化平坦。遠公歿後經臺廢。世外名僧近尤罕。談天高論久寥寥。一聽清言真款款。此來得此吾有幸。大似冬寒變暄暖。好奇歷險亦何爲。語不在多微中窅。浮情一半爲芟除。相別出門行步緩。

推車嶺

奮身出絕險，深入得平地。玩情忘安危，履險識難易。憑高試北望，來路直如棄。枯株盡僵仆，樵採遠莫致。野火歲燒林，虎狼何處避。前山有厲禁，僧律嚴於帥。漸入翠微天，濛濛雜烟氣。自此至天池，皆禁山矣。

大林寺問上人茅齋

盤烟下層霄，山骨微負土。陰陰日光澹，漠漠風氣古。寶樹壓橋低，一溪環菜圃。香山舊吟地，花徑兼宿莽。白樂天曾於此四月看桃花，其地猶名花徑。廢寺亦荒涼，半間用茅補。孤清耐久坐，客至何必主。林靜無匿聲，虛簷應樵斧。

洪武御碑歌

昇仙臺前白玉碑，柱石擎攬龍之而。鴻文載在御製集，初不假手詞臣爲。我來靡娑一再讀，顛者蹤跡大可疑。憶昔元人失其鹿，羣雄角逐爭驅馳。濠州布衣人未識，芒碭雲氣常隨之。金陵一朝定九鼎，六合不足煩鞭笞。是時楚兵最剽悍，不自量力來交綏。國家將興有先兆，天遣來告貞元期。明明天眼識王氣，故以險怪驚愚蚩。英君往往謀略秘，計大不許尋常窺。亦如田單破燕騎，神道設教尊軍師。不然茲事乃近誕，小數何足誇權奇。白旄一麾江漢靖，軍前長揖從此辭。留侯自伴赤松去，穀城空立黃石祠。天池之高巍巍，竹林仙馭杳莫追。鶴歸倘記石華表，世代已逐滄桑移。百年雨露在山澤，惟有松栢參天枝。

循佛手崖觀竹林寺石刻至訪仙亭

何年鑿渾沌。洞戶啓虛牝。瞰空飛瓏璣。萬古疑不隕。泉蒸濕氣成。一一結芝菌。其西勢陡絕。難以尋丈準。天窄忽倒垂。地豁平野盡。寸人不點目。寸樹如束笋。遠視入毫芒。俯身迫窮窘。傍崖嵌樓閣。側背削蒼隼。青鸞十萬隻。掉尾掃欄楯。竹林疑有無。仙者蹟久泯。短生寄長世。局躋良足憫。如何不自廣。蟠螭同蟻蚓。御風倘可行。吾意欲遠引。

天池寺

西跨馬鞍脊。東拊五老背。廣袤四十里。南北兩交會。地界畫雲霞。岡形走杉檜。架空營紺宇。巨麗一山最。佛皆鑄金爲。殿用鐵瓦蓋。象筵及法供。半出尙方賚。玻璃百盞燈。光燭楚天外。鳴鐘集萬指。部牒領司會。音當時曠蕩恩。池水亦潏霈。神仙事渺茫。崇飾毋已太。爾來漸凋耗。隙影過塊塏。殘僧四五人。被衲嬾結帶。天池旱亦涸。磴道入蔚蒼。獨客來登臨。嗒焉發深慨。窮陰蓄邃谷。瑟瑟響秋籟。

聖燈巖

見說文殊谷。神燈照夜明。山僧從未見。高臥過三更。

趙忠定公廢祠在天池塔傍

丞相塔前塔爲韓侂胄所建。故俗呼丞相塔。丞相祠。千秋與廢偏同時。我來弔古一惆悵。青史賢奸僧不知。

緞封寺瞻赤腳塔

自從蛟拔門前樹。水氣猶腥一派泉。萬瓦盡隨飛雨去。孤鐘空向廢堂懸。三年前寺傍起蛟以百數殿瓦悉爲所掣惟存屋柱而已泥
金塔縫風吹裂。映竹窻櫺日射穿。不用琳宮更巍煥。御碑原自配羣仙。赤脚僧天池四仙之一也

下擲筆峯渡將軍河抵黃龍寺觀明慈聖太后所賜紫衣經幢及元人十八羅漢畫像

危峯拔奇峭。插漢秋崢嶸。下走數千尺。此身疑被阬。溪流寬且長。潭影黝而清。飛泉濺我領。過山猶水聲。漸入漸無蹊。蒼松與雲平。萬枝皆直上。曲木何由萌。入林見精藍。御扁題有明。勅建自神母。豁達開朱甍。一道護藏碑。蛟龍拱函經。架梁垂頻婆。錦繡揚旛旌。新如手未觸。機上初織成。元人留畫圖。用意填丹青。年深彩色退。神氣逾發生。劫火焚天池。赧封亦頽傾。黃龍獨無恙。故物猶充盈。得非深山中。呵禁趨百靈。勿輕現光怪。恐使神鬼驚。

金竹坪

水緩山舒一徑分。叢篁憂翠晚氤氳。秋陰非雨亦非霧。嵐氣似烟還似雲。偃蓋松低從蘚蝕。藏經函古費香熏。內官死後茅菴廢。好事僧稀失舊聞。明萬曆中有太監劉姓結茅於此今菴廢趾存

太乙峯西麓有蘆林亦靜者之居也

誰將半幅江湖景。移置千峯最上頭。撥觸遊人動歸興。蘆花風裏屋如舟。

自含鄱嶺下東行至蚱蜢嶺望大小漢陽諸峯

已近匡南道，紆迴下嶺行。路尋松鼠跡，山占草蟲名。曉露沾衣重，秋風信杖輕。翠屏圍合處，遙指仰天坪。
在漢陽峯上，廬山最高處。

入九疊谷循觀山麻姑崖經屏風壘上一綫天會日暮不及觀三疊泉而返

信書不如無，身歷解其故。好奇輕坦道，冒險犯迷路。廬山載圖經，絕勝因瀑布。三疊尤稱雄，此來期勇赴。尋源既已得，一壑經屢渡。波濤所衝撞，石滑不留步。荒榛或刺眼，蛇虻時挂樹。雲屏橫我前，陰瀨食逾怒。偕行率興盡，深入獨無怖。漸上一綫天，團團失四顧。日光所不到，勃率但烟霧。徘徊問樵夫，道遠日已暮。逡巡半塗廢，老懶坐自誤。悞事豈可常，一悔生百悟。

晚至萬松坪二首

論谷量松不計株，參天一片翠模糊。明朝五老峯頭望，又作蒼雲貼地鋪。

此中舊有高人住，謂聞極上人。遲我來尋五六年。畢竟著書須擇地，人間難得好林泉。

五老峯觀海綿歌

峭帆昔上鄱陽船，我與五老曾周旋。兩塵相隔骨不仙，蹉跎負約十四年。近來稍知厭世纏，筋力大不如從前。扶行須杖坐要筇，絕境敢與人爭先。山神手握造化權，走入南極分炎躔。鞭羊欲從後者鞭，假以半日登高緣。風清氣爽秋景妍，芙蓉千丈開娟娟。長江帶沙黃可憐，湖光爭洗顏色鮮。背負碧落蓋地圓，尺

吳寸楚飛鳥邊。初看白縷生棲賢。樹杪薄冒兜羅繇。移時騰湧覆八埏。四傍六幕一氣連。滔滔滾滾浩浩然。渾沌何處分坤乾。近身扁石履一拳。性命危寄不測淵。陽烏抵撲光條穿。饑蛟倒吸無留涎。以山還山川自川。五老依舊排一巔。來如幅巾裹華顛。去如解衣袒兩肩。酒星明明飛上天。人間那得留青蓮。此時此景幻莫傳。頃刻變滅隨雲烟。

青蓮谷青蓮寺

饑鷹入山猛如虎。掠過松梢攫飛鼠。林深谷暗人更稀。橋斷溪橫道多阻。忽逢大石刻三字。快若同遊獲徒侶。前行依舊路茫茫。太白書堂在何許。三間破屋佛委地。一帶頽垣草沒礎。獨來高咏廬山謠。白日軒軒欲輕舉。屏風疊與五老對。想像先生舊遊所。石梁卽是三疊泉。此景分明在詩語。後來著書好穿鑿。衆論紛爭吾不與。太白廬山謠有屏風九疊雲錦張。銀河倒掛三石梁之句。元李洞言三石梁在開先寺西。竹林寺之幻境。衆說紛然。莫知所指。今三疊泉在九疊屏之左。水勢三折而下。如銀河之掛石梁。與太白詩句正相脗合。非此外別有三石梁也。後人必欲求其地以實之。失之鑿矣。古仙不作誰正之。悵望秋雲久延竚。

徧遊鈴岡嶺下諸禪室

山僧住山久。不道深山好。山下每相逢。山中跡如掃。禪居旣寂寂。過客亦草草。林荒鳥語斷。葉落寒氣早。物外識閒情。誰能耐枯槁。

早發萬松坪

昨登五老峯，足力鬪輕矯。亂投茆舍宿，睡美不知曉。豈惟廢鐘魚，林寂少棲鳥。起來見晨旭，殘月猶雲表。山谷催早涼，陰多晴恐少。迨茲好天氣，我興殊未了。

峒口下山

匡南古道誰開闢，懸溜垂絲通一脈。劣容半足百八盤，直注雙眸五千尺。靈區再上苦不易，步步別山多可惜。舉頭却望昨所經，似到蓬萊今被謫。

從萬壽寺經百花園

草烟竹靄午霏霏，行盡懸崖接翠微。過夏客餐嘗筍去，隔林僧擔賣茶歸。穠花繞砌晴添豔，乳水流田土漸肥。自覺向南風候暖，早秋時節尙生衣。

淨戒精舍懷天然澹歸二禪師時二公俱下世矣

萬枝修竹一龕燈，山外青山又幾層。有此林巒應著我，無多文物半依僧。香前蠹辟繙經案，鉢底龍眠拄壁藤。紫桂巖前人不見，秋風猶記別南能。往與澹公別於家黃門伯如園中

三峽橋

陟山須到顛，尋水須到源。我從泉源來，送汝歸山根。上流九十九，併力同作喧。前行經玉淵，盡爲潭所吞。

既吞不勝受。含雪空中歎。急峽跨飛橋。約束遏其奔。一條天矯龍。中有跌斷痕。挾此萬古怒。轟轟爭一門。遊人不敢立。足底防瀾翻。松風吹細雨。到寺將黃昏。

棲賢寺阻雨示角子禪師

七尖峯埋烟一塢。五老神情皆下俯。攜來杖頂昨日雲。洒作燈前夜來雨。石頭路滑不可行。遊人早起祈天晴。禪翁勸我且喫飯。同向空堂坐水聲。

雨後再至玉淵潭觀水勢

着屐重來又一奇。飛流十丈躍龍池。不知雨點添多少。跳沫粗於白鷺鷥。

白鶴觀舊有唐道士劉混成手植杉東坡先生嘗獨遊聞碁聲於古松流水間卽其處也

古觀荒荒冷翠交。一渠新漲浸堂坳。雨眠亂草移蟲窟。風折枯枝帶鶴巢。旛影不飄經院靜。棋聲久散石牀拋。三山路僻人稀到。頭白黃冠自結茆。

白鹿洞書院紀事四首

古洞盤旋路欲封。到門無樹不喬松。陰森前後三重殿。突兀西南五老峯。兵火縱教仇典籍。蟲魚何敢蝕

蛟龍。書院中有御賜十三經二十一史及御書二額。雖陽岳麓全荒棄。留得宮牆儼辟雍。書院舊名廬山國子監

九原可作心相許。千古淵源只數公。大事商量何草草。當時位置太匆匆。祠荒勿復論分合。道在終須辨

異同。祀典也。應煩早定。莫令禮樂。唉淹中。

前賢餘澤最分明。立法雖良視奉行。幸爾流風綿歷代。猶從朔望集諸生。學田籍去官支俸。觀德亭荒士
好名。此日終南非捷徑。溪山何負讀書聲。

松顛紅鶴早歸來。卓爾山前半草萊。題扁已更新歲月。看碑猶辨舊亭臺。無端講院人人設。何怪儒風日
日頹。傳語後來須慎重。此間容易着英才。萬曆己卯。張江陵禁革書院。先是常有紅鶴百十巢。於後山松杪。其年忽去。越三年仍來巢。書院隨議復。

鹿眠場

山人陳迹久荒唐。石洞新移近講堂。叮囑年年秋草沒。兒童偏指鹿眠場。白鹿石洞。明南康守王濬壘石爲之。在彝倫堂後。非故處也。

左翼山武侯祠

舊來忠節祠何處。丞相新堂獨改營。洞中舊有忠節祠。合祀武侯靖節。今祠廢。靖節神位移入朱子門人之列。若是此中多序爵。故應無地置
淵明。

循貫道溪南北觀朱文公題志諸石刻

我留鹿洞訪古蹟。夜以繼日勤搜羅。穹碑無數作林立。大半劊刻時人多。蛇蟠蚓結互相雜。頭目眩瞀猶
摩挲。先生姓字如日月。照耀宇宙開山河。生平衣履皆可敬。矧乃手澤存巖阿。溪邊巨石見題字。小者徑
尺大。擘窠自然運用合古法。小技不算隸與科。水洶土饒殺節角。元氣尙自盤蛟鼉。誰能撫取置殿壁。細

辨點畫無差訛。嗚呼所見毋乃小。金石非壽道不磨。

次韻答白鹿洞生周辰臣並簡學博鄭子充副講徐履青

吾生苦失學。悔往思補來。一經未精通。賦命多遭迴。覲顏扣名區。洞戶呀然開。登堂挾浮氣。靜者恐見猜。此來爲求友。庶幾遇奇才。之子杜門處。塔前長蒼苔。昔年充國寶。羣彥多追陪。脫身出京洛。振步凌崔嵬。爲儒務其醇。好勇知所裁。士方處貧賤。有識羞良媒。詞章技尤卑。小草殊根荑。讀書不聞道。枯朽安足摧。古來名師儒。所以重草萊。

出白鹿洞經羅漢嶺下至王楊坂

蒼蒼轉一溪。窈窕凡幾曲。烟中見村落。雞犬傍草屋。阡陌交橫從。秔稻雨早熟。謂言岡路盡。豁眼得平陸。涉澗水急流。吾行尙山麓。循流溯此水。來自棲賢谷。想當暴漲時。發石拔老木。兩傍設機碓。日可轉百斛。此法俗不傳。勞勞手春粟。

萬杉寺贈熙怡長老

慶雲峯麓萬杉寺。拓地舊傳天聖中。大書鑿石剩九字。寺中石刻甚多。悉爲僧所踏磨。今惟槐京包帶書龍虎嵐慶九字在寺後石上。古殿跨山連百弓。夕陽沈沈南去鳥。秋氣颯颯西來風。相逢不談戶外事。吾愛老僧雙耳聾。

開先寺

平橋曲。礪氣森森。門鎖空堂。晝轉深。時居僧以斫伐佛印手植松爲當鴨腳葉黃僧罷掃。麝囊花紫客來尋。寺創於南唐時。山中有巖花。色正紫。中宗嘗植于移風殿。名曰紫蓬萊。諸峯瀉瀑層層見。萬木閒蟬步步陰。可惜不容吾借榻。山南第一好禪林。

李中主讀書臺

鶴鳴峯勢倚巉峴。指點南唐舊石壇。畫像影中松葉換。黃山谷開先禪院記。有南唐中主畫像及榻存焉。墨池涸後蘚花乾。累朝題志名空在。衆口傳訛辨最難。俗傳昭明太子書堂者訛。珍重涪翁留片碣。雨淋日炙恐摧殘。石上刻山谷所書七佛偈。

王文成紀功碑

明朝制科號得士。吾鄉前輩尤絕倫。于公王公後先出。往往艱大投其身。朝廷坐收養士報。倉卒定變皆儒臣。正德己卯夏六月。逆濠犯順江湖濱。公然舉兵思向闕。三郡一閔生妖塵。皖口駸駸勢將下。留都岌岌恐震隣。是時海宇正清晏。武備缺略久不振。公方持節撫南贛。似可觀變徐躡連。同仇大義憤所切。守土敢限越與秦。出師必待九重詔。是謂以賊遺君親。飛書插羽聲罪討。攻所不備真如神。自從擣巢及執醜。通計時日纔兼旬。軍門戎首已面縛。天子韎韐方南巡。石頭城南獻馘罷。待命行及明年春。周公東征卻跋蹙。形跡詎可拘忠純。盈庭宵小古亦有。忌者愈衆節愈伸。初心祇期濟國事。豈必畫像圖麒麟。茲山勒銘蓋有故。深刻歲月題庚辰。紀功非夸乃紀實。書法遒勁辭溫醇。首從伐叛敍始末。繼舉神武歸丹宸。

天方嘉靖我邦國。誰其紀者臣守仁。隨征官屬例得列。惜哉名姓今俱湮。讀書臺傍一片石。百四十字磨崖新。逸事吾聞長老說。弘治乙榜凡三人。後來立朝適共事。數本前定非無因。胡發其奸孫殉難。公乃一手回千鈞。弘治五年。吾浙鄉榜。公與胡公世寧。孫公繼同舉。其年場中見三巨人。傳爲異事。及宸濠之變。胡首發其奸。孫以巡撫死難。三人共此事。亦一奇也。煌煌勳業本德性。出遇世會開經綸。質諸百世可無惑。似此理學寧非真。後來輕薄好詆毀。撼樹不過欺愚民。如公表見猶未免。此外何以加冠巾。手磨碑碣發長嘯。白日皎皎懸秋旻。

題聰明泉傍石上

頑童漱清甘。我見謂可惜。我旋被彼啖。浣手向澄碧。人苦不自量。無端分別多。飲牛與洗耳。相去能幾何。

玉峽亭觀瀑

女媧煉石手。年久漏微罅。銀河忽垂天。峯頂劈二華。陰寒透毛髮。觀者初可怕。從來所踞高。一跌必就下。龍歸爭窟宅。思以一戰霸。雷霆震嚴冬。冰雹凜炎夏。衝成井萬丈。避去石三舍。束身峭壁傍。俯視若出跨。相持勢難合。掉尾竟傾瀉。來者競喧囂。逝者已代謝。風林延靜聽。漸遠似分汜。縹縹絲車鳴。泱泱糟床醅。盡平震蕩心。坐以觀物化。

萬竹亭

孤亭避玉峽。一徑幽篁裏。鑿斷籀龍根。石槽方吐水。

五乳峯下望黃巖瀑布

五峯融乳氣流濕。一穴洩雲聲滿空。落日正懸高樹杪。行人却在雨絲中。

歸宗寺次穎濱先生舊韻

遙瞻孤塔近聞鐘。又到金輪第一峯。五老烟霞猶在眼。六朝風景獨留松。寺爲王右軍捨宅。鵝池細合簾泉派。鸞

登右軍閣

右軍高閣俯碧渠。古木漾影交扶疎。迴廊灣環得幽趣。高有飛鳥潛有魚。此間臨池頗自可。我腕有鬼不善書。作詩亦欲題壁去。擲筆一笑成墨豬。

鸞溪

二老風流路未迷。青松名與白蓮齊。若將山水平情較。似覺鸞溪勝虎溪。元豐中周濂溪先生與真淨文禪師於此結青松社人以之比

虎溪云。

寄題簡寂觀十四松

梁時碑記梁沈攸有簡寂觀記。晉時松十四株如十四龍。約汝重來吾不負。好留鱗甲待吟筇。

從栗里渡柴桑橋至鹿子坂訪醉石觀靖節祠

陶公家柴桑。地本接栗里。高賢棲隱處。土物覺清美。風翻紫芋苗。雨綻紅蓮米。平坡樹簇簇。枉渚波瀾瀾。徘徊山東南。何處訪故址。逢人輒問姓。覬遇陶氏子。但見舂角翁。叱牛入烟裏。先生在當日。逃祿如脫屣。至今山下柳。尙識折腰恥。肯令後世名。人人得輕指。聞風感頑懦。卽此可以起。

圓通方丈與杲菴長老夜話

到門山壓樹。冒石水衝橋。古殿防頽塌。閒房取寂寥。齋鐘秋後準。燈盞夜深挑。尋遍峯峯寺。高僧不在遙。月下步入隣菴同杲公

尋山翻苦忙。忽忽度長日。徘徊撫良夜。清景殊未畢。隣僧閉門早。避月不肯出。客來扣柴門。帶月入爾室。空堂琉璃暗。古佛黑如漆。不有好事人。清光爲誰溢。

尋夜話亭一翁二季亭故址皆不得戲示杲公

十里無端枉道來。歐蘇陳蹟委蒿萊。人間好事誰如我。博得圓通一宿迴。

渡石澗橋欲遊石門精舍不果

客從山中來。嵐氣濕巾帽。北尋黃龍潭。南送白水漕。五老峯下澗名讀作去聲石門路非遠。一澗流浩浩。翻以耳目前。

行踪未經踏。吾將賈餘勇。直入窮闔奧。謀及道旁人。競以險惡告。或云林黯黹。或云石鴛鴦。或云夔罔兩。遇者恣凌暴。或云採樵叟。壯年曾一到。白頭每追悔。相戒勿再造。或云天池僧。亦曾宅崖隩。荒寒難久住。

苦舍隨欹倒。爾來更誰繼。奇險敢輕冒。老夫爲踟躇。獨聽奪羣躁。迴思謝康樂。鑿山每開道。當時築精舍。物力豈空耗。不得從之遊。悵然違夙好。

廬山雜咏四首

食豆兼食苗。豆苗瘦如縷。不聞豆花香。惟帶豆葉苦。豆葉菜

老鴉銜茶子。墮石久成樹。何必百花園。峯峯有雲霧。閩林茶亦名雲霧茶

誰遣冒松名。而長三寸許。山頭有蓬鬢。俯視猶傲汝。萬年松

山花合在山。幽谷尋難見。却笑紫蓬萊。愛入移風殿。麝花

遊山歸錢越秀呂灌園出示見送詩戲答二首

一卷新詩吟不盡。歸來只與未遊同。野人胸次無宿物。好景仍在廬山中。千古才難洵不疑。敢將輕薄入文辭。眼空除是東坡老。咲得徐凝瀑布詩。

自題廬山紀遊集後

半生讀書不得力。浪走風塵嗟暮色。名山五岳杳無期。此日匡廬面初識。千秋物象遞顯晦。幾輩閒人肯登陟。謫仙頭白倘歸來。白石清泉聞太息。獨移瘦杖扣石鏡。雙眼快對晴空拭。已知絕境少豺狼。那怕荒蹊犯荆棘。鴉飛不到力有限。龍起無時神莫測。橋邊聽瀑雨淙淙。峯頂看雲松粲粲。三秋忽變候寒暑。半

月畧盡山南北。偶然興至或留題。聊藉微吟豁胸臆。詩成直述目所覩。老矣焉能事文飾。仙靈幽秘苦雕
剔。雲霧蒼茫每深匿。忽達生客一呈露。可惜無才收不得。歸途鹵莽方自嗤。遊況匆忙誰見逼。人間涉歷
多梗滯。祇此一途猶未塞。皇天亦似憫汝窮。恣爾窮探無吝嗇。如何汲汲向城市。若赴嚴程拘漏刻。他年
終伴采芝翁。臨別有言吾敢食。

敬業堂詩集卷十六

客船集 起壬申九月
盡十二月

樂天琵琶行自述遷謫之情。託于送客。而不著其姓字。未必果有其人也。今余與恒齋別。正值楓葉蘆花之候。恒齋官況不異左遷。別後倘有詩見及其母使人疑此客爲烏有子虛乎。

留別恒齋太守次見送原韻

小住衙齋忽半年。河梁只在一尊前。重攜風雨登山屐。又上江湖載酒船。有此別離成我老。無多才調感君憐。蘆花楓葉殘秋路。不聽琵琶亦黯然。

鎖江樓下再與恒齋別

聚散眞無奈。行期已數更。不緣歸路遠。翻遣別愁生。潮到潯陽縮。江過皖口平。戍樓今夜月。相送比君情。

早發湖口縣

山色滿空城。蒼烟帶曉晴。舟人辨風信。關吏候鷄鳴。湖勢三秋減。江流九月清。半年經六度。此度是歸程。初秋與恒齋住舟彭澤。余有七月初三日五律一章。重經此地。屈指六十日矣。聚散之感。愴然入懷。再作一詩。附九江後信。

小縣江天豁。西南月吐鉤。轉頭如昨日。撫景忽殘秋。路改攀巒岸。燈明隔浦舟。烟波三宿夢。猶自戀江州。

舟過大雷岸二首

雲收霧散來時路。奇險初欣過馬當。風日晴和秋澹蕩。江山平遠樹微茫。畫圖側畔移帆影。明鏡中間耀眼光。合與詩家添好句。不然辜負薄遊裝。

荒洲夾岸沉漁蕪。小市臨流颺酒旗。去舫校多來舫少。遠山不動近山移。鷗憐故侶行音杭。相傍雁折斜風字亦奇。一事歸人獨惆悵。匡廬西望已迷離。

夜抵黃石磯

過盡魚罾蟹簞邊。依稀村落在山前。半江烟霧半江月。一隻夜深歸客船。

搭魚詩 有序

沿江捕魚者。碇小船急流中。截竹二尺許。緝而不鈎。繫豕肉作餌。兩人對把一竿。隨放隨收。鱖魚長二三寸者。應手而出。稍緩則吞餌逝矣。日可得數十斤。名曰搭魚。曝乾加紅麴爲鮓。鬻於寧國山中。

昔讀魚具詩。纖悉苦難曉。今來江湖畔。意外駭機巧。竹竿二尺長。芳餌繫其杪。曲鈎渾不用。緝直影隨表。濺濺水聲中。鱗鱗出白小。有如拾蚌蛤。一向盆沼。十不失二三。得心手馴擾。自從罔罟設。水族久莫保。此法古未傳。吁嗟更誰造。庖廚窮口腹。物命例短夭。有情爲惻然。放筴吾忍飽。

早過大通驛

夙霧纔醒後，朝陽未吐間。翠烟遙辨市，紅樹忽移灣。風軟一江水，雲輕九子山。畫家濃淡意，斟酌在荆關。

重登銅陵太白樓

千古奇才一謫仙，當時寂寞後人傳。誰憐我是題詩客，淪落江湖十四年。已未夏，余曾題詩樓上，今尙存。

天門山

北望采石磯，南望蕪湖關。蒼茫裕溪口，豁達天門山。長江萬里來，近海勢逾寬。到此一約束，帖然成安瀾。秋空掃濃綠，兩道蛾眉彎。亦名蛾眉山。弦月帶衆星，盡歸吞吐間。亂帆不自整，散落鷗鳧灘。浮雲本無程，日暮相與還。我行何處泊，前路方漫漫。

采石舟次喜遇介菴叔卽送其游楚

半載家書斷，逢君喜欲狂。細微談近事，安慰當還鄉。別夢吳船隔，征途楚水長。忍辜今夜酒，明日況重陽。

九日三山舟中有懷德尹近得家信聞弟已渡淮

夾岸蘆花作絮飛，鯉魚風急客添衣。從來節物悲遊子，如此江山送落暉。鄉路尙成千里隔，別時原約半年歸。誰能料得貧家事，去住無端與願違。

重泊秦淮二首

袁家鵝鴨薛家羊。不問當墟賣酒娘。懊惱一秋無菊看。楚人船上過重陽。市樓南北酒帘青。市上游人半醉醒。何暇管他亡國事。更將閒泪洒新亭。

金陵早發

東方大星射芒刺。一片江光白如地。去城未遠尙聞鐘。烟柳濛濛六朝寺。

登燕子磯

迴欄步步轉雲汀。若要登高更有亭。淮岸柳條秋尙綠。孝陵松氣遠尤青。城脚日出排鴉陣。天徧江低響雁翎。添得重來多少恨。西風吹帽髮星星。憶與韜荒兄泊舟觀劇屈指十三年矣。

同譚護城給諫飲朱十兄竹垞齋席上分賦

檣燈塔火照城闌。傲屋依然近作鄰。九陌並回三載夢。一官難救五湖貧。飽經世故初心在。畢竟交情老輩真。慚媿爲歡煩二主。買魚配酒餉歸人。

題鄭春薦廬墓圖

舊來宰木已參天。書帶重生丙舍前。多少康成門下士。一時俱廢蓼莪篇。

題朱北山西溪梅花圖卷

一篙寒水平盃綠。松木場西凡幾曲。春頭臘尾萬梢梅。照影橫斜散冰玉。花時一一爲我有。別業西溪曾

卜築廿年不到漸疎蕪。借與隣僧挂瓢宿。上番大雪凍連月。聞道摧殘到松竹。可憐老幹剩槎枒。有似佳人在空谷。對君此畫增健羨。蟠螭龍蛇歸尺幅。欣然意到不留手。偶爾圖成聊寓目。春烟欲動氣葱葱。夜月斜穿光燭燭。略施朱粉紅間白。力挽冰霜骨勝肉。恍如幽夢向溪山。洗盡胸中筆端俗。我今倦遊百事廢。一壑能專良易足。相將同賦歸去來。花氣浮餠酒應熟。

再題霜林秋晚圖卷

長風入林瘦蛟舞。萬葉低昂爭仰俯。劈開玉峽飲晴虹。倒射霜空撒紅雨。中間幾株尤耐霜。濃者得綠淡得黃。與酣渲染出真意。絹素絢爛凝秋光。瀟湘洞庭多變態。放筆知君與神會。披圖莫作咫尺觀。別有蒼茫在圖外。

王令詒過村居小飲限韻各賦二首

十年出求友。時輩方縱橫。與君非苟交。結托重老成。所以我諸弟。事君亦如兄。每聞君造廬。一一皆歡迎。且須惜此意。勿作匆匆行。

溢城得家書。送爾倍惆悵。

初秋與令詒別於九江。

吾舟未東下。吾弟方北嚮。同時忽同歸。

余到家半月。德尹亦歸。

事固未易量。

喜君復見過。此會出非望。所嗟不盡歡。隣喪春不相。

荊州兄方丁太夫人艱故云。

無計獨留君。燈前北風漲。

題陳言揚抱膝圖二首

使君與僕孰英雄。寄托如何不約同。此意沈吟應共惜。半生光景畫圖中。
與君識面從兒穉。不覺形容漸失真。同是庚寅吾獨老。始憐衣上十年塵。余與言揚皆庚寅生。

再題言揚看舞圖

舞袖雖長不自持。歌喉縱好有誰知。賞心或在人情外。看取停歌罷舞時。

維揚談禘初亡兄韜荒塚也今來就婚投詩見贈感賦一首

吾嫂持門戶。吾兄肉已寒。夢爲雲聚散。愁見月團圓。得婿如君少。爲甥似舅難。十年存歿泪。相對不禁彈。

廉讓寄南燭子詩索和戲作一首

曹家二尺紅珊瑚。霞光照耀開座隅。季倫如意不敢擊。變作顆顆勻圓珠。冰霜太寒雪太白。可少丹砂點顏色。綠毛么鳳愛梳翎。尾重身輕飛不得。

斷硯歌寄和姜西溟

姜侯才高同屈宋。往往彈冠讓王貢。舉場老負十上名。史館貧支廿年俸。硯田一片羞自給。略似良農勤
藝種。爲言此石初得時。愛與端瓊稱伯仲。端瓊亦西溟藏硯。每因拂拭誇朋友。未許收藏付僕從。平生不以文滑
稽。滴露研硃事修綜。窮經恥勿草太玄。給札雄堪賦雲夢。不知磨耗幾挺墨。書到成家筆方縱。可憐尤物
難久完。識者何希忌何衆。秦城十五不輕易。博浪一椎翻誤中。有情那免號癡絕。足別荆和抱深痛。唾壺

口缺琴尾焦。唉此依然配清供。作詩聊用解客嘲。屬和無端邀我共。我今所見與君異。嗜好心空色不動。膠聯漆附終有痕。來詩有膠聯漆。陸太聖綴之句。豈比天生本無縫。勸君撥棄勿復道。瓦礫寧當較輕重。君苗焚硯古有諸。持此區區欲安用。

並轡集起癸酉正月盡三月

余以新正束裝北上。德尹初未有出門之約。二月杪。忽相遇于淮上。遂偕翁康飴。嚴定隅。並轡而北。通計一春所作。無過三十餘章。皆行役之詩也。故彙成一編。

春夜飲曾濟蒼宅同徐淮江

春波門外如鈎月。六里長街未上燈。花徑初除三尺雪。雅人相對一壺冰。窮愁老境尤貪酒。樂事新年在得朋。從此兩湖添地主。余向寄徐淮江詩。有兩湖地主惟君在之句。每逢高會約徐陵。

貽笏圖爲徐淮江賦次李武曾韻

徐家手版傳忠襄。曾隨封事攜皂囊。牙花欲開天變候。雷雨白日揆谿堂。堂中書籤三萬軸。一一玳瑁琉璃裝。牀頭置笏床下拜。髣髴排擊舍風霜。自從尙書殉社稷。對命無復王廷揚。問君寶此竟安用。謂是祖德貽縹緲。君家祖德非尋常。日星皎皎懸孤光。百年朝典存手澤。世閱兩代源流長。公侯子孫必復舊。瓜瓞綿邈今方將。鳳雛已得韓冬郎。七歲弄筆吟繞廊。丈夫生兒有如此。用少陵徐卿二子歌中句。對客那得能深藏。塗

鴉畫虎無不可。但是驥性終馴良。乃翁與世不同調。挾筴莫歎亡羊臧。摩挲老眼待他日。爲汝持笏還端詳。

吳門程汝諧乞詩爲節母孫太君壽

古人乞言重名義。今人乞言重勢位。數篇排比達官名。滿幅雷同錦屏字。程生壽母乞我詩。我名微賤世莫知。感生厚意惜不得。但媿窮老無妍辭。區區持贈一言耳。非此母不生此子。我爲此語豈無徵。試問南湖老居士。汝諧出老友盛鶴江之門。故落句及之。

再題東湖弄珠樓壁

滿湖新漲綠如油。五度凭欄記此樓。粉壁有詩僧代掃。青衫無趣客重遊。花邊舊事閒相觸。醉裏風情老漸休。多謝柳條長短意。尙含烟雨拂孤舟。

鄧尉山看梅與譚護城都諫分韻

買帆下吳閫。晨夕風雨對。掀篷喜開霽。決起逐儕輩。明波洗雙眸。遙見峯染黛。橋低榜稍進。竹密步微礙。紆徐入辛墓。梅信行已逮。古榦無醜枝。疎花有餘態。寧知山近遠。漸覺路茫昧。濃日散晨光。千林同一槩。蒸蒸氣浮動。靄靄香奔潰。人聲絲竹聲。多在白雲內。居僧揖冠裳。游女曳環佩。青紅小姪姪。紛若魚同隊。見花嬌不憐。手折髮邊戴。本爲冷澹遊。喧杳性叵耐。翻身暫引避。穿徑出荒穢。前登馬家山。高出萬花背。

境荒人罕到。鑿石初破塊。自然愜幽趣。眞景非粉績。僕本住山人。無端走關塞。故園三百樹。先植記好在。有花不得看。旣出每深悔。此來復何幸。夙願償意外。神交契新賞。老戀割私愛。俗腸旣蠲除。塵面一盪頽。逝將營半畝。斲地把耒耨。君如娛晚計。共買花邊埭。歸田事不難。所要在勇退。惜哉迫行役。各與初心偕。解纜復踟躕。清遊幾時再。

過葉已畦二乘草堂出新刻見示

疊成山勢鑿成窪。位置柴門趁屋斜。小築人皆稱得地。遠來吾不爲看花。舊遊歷歷經心眼。餘論津津溢齒牙。未敢對君談著述。十年衣袖有塵沙。

吳門勞在茲爲余作畫冊

自題佳句寫雲烟。不獨詩仙畫亦仙。筆墨我緣人品重。聲名天許布衣傳。家留林壑藏書屋。君爲洞庭西山人。春在江湖采藥船。老覺塵埃眞少味。相逢猶話住山年。

常熟過錢玉友河亭時玉友亦將入都

薜荔交陰覆短牆。詩人居近苾芻房。俄驚小別成三歲。直訝相逢在故鄉。兒摘畦蔬供午饌。婦藏斗酒佐春觴。祇愁旋被饑驅出。未必家餘住夏糧。

大石山房西城樓閣爲虞山絕勝處

又作西城半日留。短筇筋力試山遊。愛隨雲氣穿仙掌。笑插花枝上佛頭。三面城根三面水。一層樹杪一層樓。人情那得能知足。好景多貪極目收。

留守瞿相國春暉園

不知頽廢自何年。一片傷心到目前。戰後河山非故國。記中花石尙平泉。烟埋平碧迷芳草。血染春紅化杜鵑。狼籍南雲憑檻外。愁看白日下虞淵。

拂水山莊三首

名園未到已神傷。指點雲山入渺茫。老屋尙支秋水閣。墓田新拆耦耕堂。藤陰漠漠餘花紫。梧徑離離夕照黃。猶有游人來買醉。兩湖烟月屬隣莊。滄桑殘局等閒分。野史亭邊日易曛。異代文章歸紀述。盛時裙屐屬傳聞。畫圖夢蝶尋紅豆。書劄焚魚感絳雲。留取舊栽花木在。罷官還說李司勳。松圓爲友河東婦。集裏多編唱和詩。生不並時憐我晚。死無他恨惜公遲。崢嶸恠石苔封洞。曲折虛廊水瀉池。惆悵柳圍今合抱。攀條人去幾何時。

瓜洲大觀樓張見陽郡丞屬題

柳梢城角影參參。烟散桃紅水放藍。到此忽驚身是客。捲簾江北望江南。

秦郵舟中紀事

截斷湖光別作隄。一條荒影亘虹蜺。居民飽食黃河鯉。客飯愁添濁水泥。不解天心何日轉。若論地勢向來低。誰憐禹貢揚州域。急挽東流更向西。

魚溝看桃

一村桃間一村柳。日氣射花紅撲鞍。此事今年真過分。江南江北兩回看。

與德尹同坐騾車戲作二絕句索翁康貽嚴定隅和

淮浦相逢事太奇。小船同載塞同騎。與君便是同功繭。不許人間有路歧。抵足朝朝作臥遊。欠伸一笑兩擡頭。擊殘車壁殊多事。鼠穴前頭夢八驄。

德尹詩有一龕恢恢之句用其意再作一首

別茅菴出已多年。又結津梁道路緣。添個蒲團相對坐。也如行脚也參禪。

從峒嵒騎騾至紅花埠

峒嵒小驛勃姑啼。路入徐州漸向西。若要看花須趁早。防他一雨便成泥。

雨阻紅花埠一日

衝風衝雨衝波浪。瞥眼江湖十載餘。肯信壯心銷便盡。一鞭泥滑怕騎驢。

望蒙山同定隅德尹作

疊翠浮嵐不記重。羣山絡繹走蒼龍。若論舉眼人人識。只有知名一兩峯。

道傍見蠅娘轉丸

不知何意轉成圓。糞壤生涯大可憐。翻似向人誇絕技。一丸突過馬蹄前。

望岱

一朵雲扶一朵蓮。蓮花頂上卽青天。可能膚寸爲霖雨。今是乾封第幾年。

至河間聞彭椒岳量移之信留詩寄之

八載循良吏。初遷本分官。敢云從政易。轉覺致身難。客路雖相左。離愁此暫寬。一春傳旅食。今日爲加餐。

次新城先生壁間韻

餅飪酒店兩三間。塵壁題名記往還。留得和詩人小住。綠楊簷角鳥關關。

曉過趙北口

十里風埃過鄭州。忽開雙眼見清流。綠楊影裏平橋路。數盡漁船數白鷗。

題王赤杼籬豆畫卷二首

豆葉翻翻豆莢肥。檐前蔌蔌草蟲飛。故園秋意忽到眼。一陣野風吹客衣。

沿籬手種兩三塍。引蔓垂梢漸滿棚。生被畫家榆樣去。帶花拗折一枝藤。

送趙子晦之任延津二首

青袍謁選十三年。此去雙鳧便是仙。滿眼簿書非俗物。太行山在印牀前。

車笠相逢兩不猜。湖湘分手又燕臺。參軍一老今頭白。重與郎君贊畫來。謂彭南陔。

次韻酬唐實君喜余入都之作

吹得楊花作雪飛。帝城春事已全非。桐經爨後孤絃絕。鐵化魚來尺素稀。東閣何期今再到。故人長恐見無幾。詩楚茨疏。幾期也。白頭賸爾如新在。縞帶猶堪博紵衣。

附原作

唐孫華

客散梁園墜雨飛。尺書驚見是耶非。鄰房燈火鳴雞杳。岐路雲山候雁稀。飲酒人非攻子美。改名君且學劉幾。長須扣戶吾遙識。蚤晚將迎辦倒衣。

初夏同叔毅定隅霜巖德尹坐一莖菴後香林亭

一窰黃塵沒馬蹄。喜從塵外得招提。出牆僧梵風吹斷。拂面花枝鳥壓低。溝水欲流亭影去。夕陽忽到柳陰西。浮萍落絮同飄散。閒繞空廊覓舊題。己巳秋與竹垞水村兩遊此。

淶水亭與唐實君話舊

鏡裏清光落檻前。水風涼。偈鷺鷺肩。菰蒲放鴨空灘。雨。楊柳騎牛隔浦烟。雙眼乍開疑入畫。一尊相屬話歸田。江湖詞客今星散。冷落池亭近十年。

偶閱楊次也賣花詩戲次原韻五首

先從槐樹斜街過。旋到慈仁寺裏來。淺綠深紅春四季。跨驢騎馬月三回。分明已過早春時。駘蕩風光不自持。大抵人情誇爛熳。斷無人賞未開枝。帶來春色三分土。吹過風頭一閃塵。莫認園丁作園主。種花人是賣花人。白白朱朱漫作堆。舊家亭館記曾栽。閱人最有花兒匠。及見園空長綠苔。草本經年易長成。豐臺美種一時并。當初芍藥原名貴。莫以花多便見輕。

次韻答實君

被褐時方輕。垂綏古有戒。匪材等樗櫟。不熟讓稊稗。感君勿我棄。假館同瀟灑。城隅積水潭。浩汗匯衆派。禾苗綠油油。牕戶明噲噲。棄之爲馬廐。放眼靡所屆。庶幾東閣中。得士稱一快。吁嗟及時事。忿憤疑近隘。各隨出處緣。並守廉隅界。短檠光煜煜。缺月東南挂。對床連夜語。里耳竊聽恠。非無蛙聒噪。亦有鼠黠獐。集泮本好音。飛鴉吾豈解。孤生分衰賤。舊業棄土崩。腰非長揖具。况肯望塵拜。誰能將肺肝。稽怒供裂眦。釣鈞聽曲直。碁局付成敗。似聞逐客議。根觸動機械。時臺中有條議國學生回本籍鄉試者世或指應鷓。吾其避蜂蠶。國家

有大計。草野腕徒搯。言官例毛舉。通病詎能瘥。公卿非不知。相視各噤齟。可憐文廟栢。祇用使馬疥。騷除由廡下。梁木孰支壞。議難決一朝。吞吐苦不嘍。將毋國體傷。識者爲深喟。君詩雖有激。風義實誥誡。布衣何足云。道路未償債。炎埃蔽赤日。六月迫行邁。山田歸及耕。書籍行當賣。勞筋應自息。倦羽非人鍛。得喪心已空。須彌堪納芥。

附原作

唐孫華

名士今幾人。世方以爲戒。良玉溷武夫。嘉禾雜秕稗。君才固卓爾。盛製富揮洒。崇山俯培塿。溟渤吞衆派。魯邦久卑邾。淮陰豈伍噲。長安踏槐花。賓興期已屆。如君得數人。制科誠一快。吏議聞逐客。斯舉亦已隘。如何辟雍中。輒畫鴻溝界。網羅失長鯨。敵笏愁空挂。厲階誠有由。壞事因鬼怪。昔者夸毗子。紛紛逞狡獪。伸喙餘三尺。臨文無半解。惡草等菘菹。微材僅菅蒯。豈有鄉里交。但下倉荒拜。大德忘丘山。小怨結睚眦。射羿弓旋彎。會洎盟屢敗。對譚語設穿。默坐心藏械。螫手類蝮蛇。嗜肌甚蜂蠆。奪利腦競盪。爭門臂各搯。猥險成世風。積疢何由瘥。所以當塗人。疾視久噤齟。驅使歸井閭。淨若除癬疥。高墉惡雀穿。長堤緣蠹壤。世遂嗤空名。畫餅不足嘍。因噎遂廢餐。此事可一喟。君性本冲和。三緘夙自誠。流落坐詩窮。羈棲負酒債。遇合會有時。慎勿嗟行邁。錦段久織成。何處不可賣。虎氣有時騰。鸞翮無長鍛。一名轉瞬成。行看拾地芥。

題陳履仁登車圖小影

手拂雙花五鬣雲。世家文采孰如君。八騶四望尋常事。只要來薊空北羣。

題顧書宣畫册竹筴水仙二種

南去嘗雞墪。北來食松繖。指與紅竹筴。畫中添土產。雞墪產滇南。松繖產勞山。宜興山中有紅竹筴。

老根如蒜頭。大葉如蒜苗。欲抽一寸心。待此冰雪消。

敬業堂詩集卷十七

冗寄集起癸酉四月
盡十二月

不到自怡園三年矣。相國明公聞余至都。復下榻見招。時唐實君亦以謁選北來。樂數晨夕。未幾實君因人遠遊。余旋應秋賦。倖舉京兆。遂爾滯留。自夏歷冬。大約園居之日多。城居之日少。東坡詩語。似爲余設也。

次韻答愷功二首

移牀來對好溪山。只作漁樵共往還。癖愛文人知業慧。未拋卷帙趁官閒。雲垂高幕藤花紫。雨放新梢笋籜斑。若向此中微領會。詩情原在寂寥間。

樹底泉聲竹外山。清暉娛客竟忘還。魚無羨意鈎宜直。碁少爭心局自閒。春去蘋洲風澹澹。雨來花徑土斑斑。畫圖光景分明記。又掃攤書屋半間。時將移寓
自怡園

對雨戲效白樂天體四首

兩岸沙沈樹。千帆浪拍天。長風吹不斷。獨鳥去無邊。白酒標旗濕。紅鱗出網鮮。此時如對雨。最好是江船。
忽聽笙歌起。烟波何處尋。四圍山漸澹。一角日初沈。捲幔通荷氣。停橈隔柳陰。此時如對雨。最好是湖心。

一片秧針綠。村村罷踏車。黃梅多放鴨。鄉人以芒種買新鴨名黃梅鴨翠刺盡鳴蛙。種水牽菱蔓。開門落棟花。此時如對雨。最好是農家。

竹色涼窻戶。泉聲落珮環。不知青嶂合。長在白雲間。翳籠分茶早。櫻衫挂壁閒。此時如對雨。最好是深山。

唐實君作憎蠅詩可補歐陽賦所未備僕不復闢奇戲廣其意得五十韻

吾觀大化內。鼓物同洪鑪。介羽及昆蟲。種類何各殊。搜羅到瑣碎。終非磊落儒。聊爲更僕數。庶用資揶揄。飛者爲蜻蜒。穴者爲螻蛄。在戶爲蠪蝓。在簷爲蜘蛛。微明耿熠燿。背殼潛蟻蝓。薄翅扇蚨蝶。細腰祝蒲盧。螻或鳴於泥。蚓或歌於塗。絡緯織作巧。蠶蜨轉丸愚。螳螂怒當輪。蟋蟀勇負嵎。堆積走負板。腥羶集元駒。與人了無害。聽彼繁有徒。蠮螋險如虻。玄蜂大如壺。鉤卷音拳蠹刃利。針聚蚊雷轟。刺虻有瘁肌。蠶尾有嗜膚。昏昏蝨在禪。趨趨蚤躍襦。偈人雖咄咄。懷毒終區區。惟蠅獨可憎。其來胡爲乎。汝於耳目前。本不關有無。汝狀極醜惡。儻傀粧頭顱。赤幘同一冠。青蒼別形軀。兩翼六其足。公然學讒夫。汝生本臭穢。行與糞壤俱。只合老廁圍。何當闖氈毼。無端附驥尾。馳騁遊莊衢。無端入絹素。點染損畫圖。有時集於爪。學士羣睢盱。有時止於棘。詩人互嗟吁。聲非雞則鳴。例與狗苟呼。此特論大概。未足蔽厥辜。客從長途來。翻漿汗流珠。解衣覬少憩。喘息猶未蘇。汝何太相偁。伺隙窺門樞。我眠晨未起。汝偏攪牀敷。我起頭未櫛。汝又環座隅。我饑進盤餐。汝貪善爲狙。我閒弄筆硯。汝飽成墨猪。汝腴我合瘦。汝衆我則孤。我欲廢飲食。汝方混庖

廚汝于我何尤。抵死相迫。驅營營。惑人聽。有若操契符。貝錦抱萋斐。不祥等狐鳥。懷中三寸璧。點汚生瑕瑜。架上卷書。棄擲消樗蒲。凡此皆汝罪。誅之不勝誅。逝將避汝去。行行復躊躇。我力故難勝。汝情諒應輸。天下正一家。能毋懷此都。乘炎且快意。吾寧忍須臾。

移榻自怡園雨後納涼

水轉橋迴路幾層。此中真可避炎蒸。陰成繞屋三年樹。光吐疎籬半夜燈。明月忽隨殘雨到。微風已作早涼徵。野人慣領田園趣。歸夢翻從借榻增。

重過相國明公園亭四首

名園多在苑東偏。不數樊川及輞川。綺陌東西雲作障。畫橋南北草含烟。鑿開丘壑藏魚鳥。勾勒風光入管絃。何似贊皇行樂地。手栽花木記平泉。
毬場車埒互相通。門徑寬閒五百弓。但覺樓臺隨處湧。不知風月與人同。紫駝臥草平沙外。白馬穿花細雨中。一片近郊農牧地。可容雞犬識新豐。

莫漫閒居比洛濱。猶從泉石見經綸。栽花覘土知肥瘠。種樹因材識苦辛。白傅龍門無俗客。薛宣東閣有奇人。平生齒冷孫弘輩。車廐誰論舊主賓。
相國曾以唐實君
物品上達宸聽

熱客稀逢抵閉關。陪遊吾亦愛投閒。隙中野馬飛揚去。雨後溪雲斷續還。隱几好風來北牖。鈎簾落日在

西山壯心敢擬蘭成賦。芳樹條新感再攀。

浴罷與實君步入水磨作

長日愁經夏。微涼晚似秋。氣蘇風到面。浴罷月當頭。老樹聽蟬立。閒溪領鶴游。飲牛兼洗馬。何處辨清流。

晚食

且喜蚊蠅少。林深几簟涼。飛蛾輕性命。殘燭有光芒。帶草侵衣潤。藤花落酒香。魚蝦供晚食。風物近江鄉。

雨牕遣興示愷功

小雨密復疎。牕虛深更綠。瀟瀟延靜聽。窅窅盡遐矚。抱葉無一蟬。隔林下雙鵲。雞鳴覺村遠。水響知石觸。殘夢有時醒。幽情恍相續。眼前領閒趣。取適聊破俗。華髮脫新梳。輕衫便晚浴。早衰易壯嗜。外垢非內辱。思營五畝園。未遂半生欲。此身本如寄。繆算徒碌碌。菟裘等蘧廬。豈必皆我屬。不如且聽雨。濁酒貫鄰曲。醉鄉有天地。避此六月溽。歸計待秋涼。無裝何用束。

鷹坊歌同實君愷功作

風林蕭蕭夏脫木。坊以鷹名似牛屋。其中最大名海青。戴角森然異凡畜。我初識名自遼史。特產曾傳女真獨。楛矢同來肅慎庭。初時底貢猶臣服。屢求難厭禍旋結。兩國興亡手翻覆。天教此物雄海東。自長窠雛成一族。康熙天子神聖姿。駕馭英雄兵不黷。每因續武勤校獵。遠致奇毛比臣僕。紫荊關外秋氣高。狐

兔寧容草間伏。腥風霍霍滿天地。白日無光散原陸。揚旛表貉出從禽。王用三驅力爭戮。是時海青更精悍。臂出綠韞調養熟。飜身一去高沒雲。注目秋空走馬逐。蹄間十丈莽開闢。驀過林巒躍坑谷。忽看天半挾天鵝。奔電流星下投速。羽林健兒拍手笑。奏凱不煩遺矢鏃。却來斂翮復依人。仍以黃繖掣雙足。三時飼養一朝用。如許恩波等休沐。奉先性在饑附人。定遠功成飛食肉。不知給俸視幾品。肥瘦論斤常量腹。生牛乍割血猶紅。小鳥一吹毛盡禿。見人作勢俄聳肩。獨立有時還側目。無端對此我心惻。相向移時額顰蹙。獅兒噉虎魚食蝦。吞噬成風傷末俗。生意漸微真可嘆。殺機欲動休輕觸。以仁易暴古所云。恃猛爭強非汝福。我願皇天仁百物。常產鳳皇生鸞鷲。自然郊藪萃禎祥。盛世多珍四靈畜。

次實君溪邊步月韻

雨過園林暑氣偏。繁星多上晚來天。漸沈遠翠峯峯澹。初長繁陰樹樹圓。螢火一星沿岸草。蛙聲十里出山泉。新詩未必能諧俗。解事人稀莫浪傳。

大雨行

晚來怕熱喜聽雨。臥看商羊獨足舞。五更驚覺忽砰訇。搖動空城作雷鼓。檐前急溜非一派。併作飛濤湧堂廡。須臾暴漲床欲浮。電火燒窻時一吐。沈沙盡作十里坑。斫樹齊張萬人弩。排牆墮瓦聲拉雜。助以風威猛於虎。老翁折臂婦裹頭。露立號咷到童豎。城門兩日不敢開。濁浪如河勢難拒。五行厥占屬災異。疾

痛況欲加摩撫。老夫昨日得家書。見說吳田槁禾黍。北方苦潦南苦旱。天大要是生民主。可能造化一轉移。坐使兩邦歌樂土。

送唐實君遊江西

猛雨撼城城欲動。粘天黃潦如霾霧。阜城門外一丈泥。馬濺花鬢四蹄壅。問君此時有底急。結束輕裝挾飛鞚。故人奉詔赴西江。才子持衡推小宋。時宋念功編修典試江右實君與之同行舊開東閣交最契。攬轡南行邀與共。文章

取士意已輕。科目成名俗猶重。如君致身本高第。頭白挽強方命中。可憐進士不得進。李太白詩君爲上進士不得進

積千薪苦沈壅。競傳枳棘爭集猴。縱有梧桐偶棲鳳。紛紜野馬巧乘隙。狼籍醯雞工覆瓿。侏儒飽死方朔饑。曷不江湖且陶縱。我留輦下大可啖。妄覬微名上鄉貢。初聞逐客姑逡巡。旋悔爲儒被嘲弄。吹竽鼓瑟

兩難強。貫蝨屠龍等無用。布衣有骨天所憐。老大寧能逐儕衆。惟君知我謂我真。往往清吟托閒諷。郊園

木牀連曲尺。荷氣藤陰滿香街。二字出昌谷集風光不礙冷澹遊。日月正宜瀟灑送。君今別我忽徑去。舍矢難追

弦就控。此邦山水要君詩。豈獨飛雲標畫棟。匡廬舊有讀書地。我昨留題滿巖洞。待君再上紫霄峯。池日

遊仙記同夢。

姜西溟至都二首

三年一別兩蹉跎。短策重聞酒市過。白髮舊遊諸老散。青雲同學少年多。傲居那得高賢廡。支俸聊隨博

學科幸是一甞留故物。曾包老硯歷關河。被盜於滄州

瀟灑生涯久自疑。重來唉我亦胡爲。曾從祖父承餘澤。只道科名似盛時。逐客幸蒙寬後議。憐才何敢望新知。不如蚤築畦風閣。結伴歸畊未算遲。

晚行裂帛湖上觀水勢

西山前夜雨暴漲聲辟易。昨日與橋平。今朝露水柵。晚來靚盈縮。又減三五尺。一條修尾蛇。東向投遠碧。菰蒲盡偃仆。上帶泥土迹。我欲追躡之。前行泝磐石。初疑遇壯士。拔劍斫其脊。徑開中已拆。首尾猶跳擲。却坐上觀。平心隨所適。有如杯底影。仰面意旋釋。人生駭愕緣。多伺躁妄隙。歸來虛室中。靜見鼻端白。

甕山麓尋耶律丞相墓

裂帛湖東下馬行。遙聞樵斧響丁丁。盡髡草木非山罪。難向牛羊問墓名。石椁千年誰不朽。金椎一穴尙如生。我來忽墮無情淚。土蝕殘碑恨未平。明末有人發冢。見一頭如常人。數倍。亟開之。後掘得碣石。知爲公墓。

青龍橋

甕山西北巴溝上。指點平橋接碾莊。自甃清渠成石塌。盡迴流水入宮牆。殘荷落瓣魚鱗活。高柳飄絲鷺頂涼。不礙蹇驢行覽躋。有人緩轡正思鄉。

玉田觀早稻

灌園餘潤及平疇。千畝從無旱潦憂。總結已供三壤賦。陂池新奉上林遊。神絃報禁秋長早。勾盾徵租歲倍收。別與幽風編月令。築場時節火西流。官田早米。例於七月初十前貢新。

廢功德寺

瓦落空墻土盡崩。雜耕猶剩兩三僧。晨參栢子留禪偈。夜看松花照鬼燈。駐蹕亭邊牛飼草。明宣宗西郊省。歛駐蹕寺中。猶供之。自古琳宮有廢興。

呂公洞輪菴禪師蘭若

只道山窮水亦窮。忽攀石磴與雲通。芙蓉殿底三重閣。楊柳橋南一面風。老去文人多入道。從來絕境必凌空。知君欲傲長江簿。佛號曾呼禁苑中。絕頂有飛閣。不可上。卽金章宗芙蓉殿故址。

玉泉山

銷夏誰知別有灣。孤雲一角截西山。千家舊業鼉魚國。十里提封虎豹關。欄楯離離金碧上。歌鐘隱隱翠微間。清泉自愛江湖去。流出紅墻使不還。玉泉山。舊爲金章宗避暑地。故首句云。

題相國永城李公所藏崔白健翻慶風圖

墨花一柄風翻荷。一葉展仰正不頗。傍添一葉作欹蓋。上有健翻如天鵝。初飛未高去水咫。已覺遠勢無江河。生綃八尺畫止此。妙手落墨寧誇多。流傳要是北宋物。幸免小印鈐宣和。若教藏弄入秘閣。靖康那

得逃干戈永城相國鄴侯裔。牙籤三萬森駢羅。故家世寶此其一。鑒賞精絕知匪訛。華堂五月開示客。几席瑟瑟生迴波。君不聞濠梁大圖徑三丈。天女織絹鳳擲梭。江天十里尙無恙。賴有好句傳東坡。東坡有題崔白大圖詩見集中白濠梁人故稱濠梁崔人間真蹟久難恃。閱世容易千年過。我詩淺薄不足道。請公自賦塵風歌。

愷功將有塞外之行邀余重宿郊園賦此志別

今年夏多雨。所向泥塗妨。君家近水園。一溪綠泱泱。謂宜着穴士。礪戶延清光。豈惟洗塵埃。直欲忘炎涼。故人督我懶。促我赴舉場。明知計大謬。聊逐槐花忙。初秋束書出。臨行意迴遑。儼居宣武門。人海昏茫茫。猶疑清夜夢。流水繞我床。昨朝急足來。扣門語徬徨。聞子有遠適。結束隨龍驤。腰懸八札弓。行逐楸桂郎。可憐非汝好。所用違其長。憶子從我遊。翩翩富辭章。十三見頭角。已在成人行。今來猛績學。下筆尤老蒼。貫穿及韓蘇。結撰卑齊梁。居然希作者。恥與時頡頏。玉之使有成。遠到詎易量。重來忍言別。戀戀林泉傍。爲我掃庭除。故榻仍在房。小雨灑籬落。雜花間紅黃。苦爲一宿留。故意不可忘。子才百事能。皇路今方將。我衰萬念冷。逝當返畊桑。浮萍寄波濤。聚散原無常。參辰渺河漢。耿耿遙相望。勗哉平生言。卒以初願償。無爲愴離合。萬里如一堂。

早發良鄉至琉璃河驛背偶成

喚迴殘夢得清晨。詩境重開又一新。淡到明河猶見月。洗來灰洞已無塵。灰洞在良鄉之南牛蹄應鐸行偏緩。馬

意驚鞭策要頻。慚媿琉璃橋下水。髮絲催換十年人。

涿州道中書所見

折葦沈沙積潦餘。高田成岸岸成渠。胡良河上扶犁叟。網得萍根二寸魚。

祁陽道中

一村榆柳一村鴉。帶井沿籬路向斜。野棗風輕時落實。木棉秋晚尙開花。青旗賣酒竿竿影。紅袖騎驢幅幅紗。迥與近畿風景別。田莊從此屬農家。八旗莊戶至清苑而止。

晉州署中與陳六謙話舊

魯柝聞邾境本連。兩邦爭說使君賢。晉州與深澤接壤。歌傳馴雉民方樂。烏化飛鳧吏亦仙。却話舊遊如夢裏。誰知岐路判樽前。難拋一寸西窗燭。中有離居十六年。

雨中重渡濟水

路僻泥深出店遲。一鞭照影又清瀆。敝裘自領新寒意。歸雁如尋九日期。倚樹風聲尤跋扈。得烟柳色尙迷離。敢因遇雨嗟行役。正是犁荒下麥時。

大冉橋聞雁

殘荷老柳蕭蕭意。秋在平橋水氣中。去年來一繩雁。帶人歸信是西風。時聞北園榜發。余名在二十。

重至京師和德尹看菊詩二首

野景貪從廟市收。瓦盆高下蕊新抽。風前最愛香盈袖。醉後還須插滿頭。老圃別傳移種法。故人來作看花遊。遲開自是關天意。斟酌芳期在晚秋。

一籬黃葉擁村莊。嘆惜陶家徑久荒。九日已過初泛酒。兩人相對忽思鄉。古來佳節多風雨。此後清吟耐雪霜。落帽臺邊回白首。心情不似少年狂。

送卓次厚南歸

多才能自愛。失意問誰堪。不作憤時語。轉深吾輩慙。柳條攀欲盡。梅信到應探。鄉思因君觸。心隨候雁南。

陸澹成侍講新葺書齋名懷鷗舫招同人雅集分賦

江湖宛在小牕前。便欲從君借榻眠。夢作白鷗歸未得。鱸鄉亭外水如烟。

題畫贈揚州王漢藻

一路垂楊記泊船。北湖南埭水浮烟。君家舊住茱萸泖。別築灣頭小鞦韆。揚州有茱萸灣故云。

德尹將南還次韵志別三首

數過初冬又一旬。誰知咫尺有參辰。到家歲月驚新曆。題壁詩篇記暮春。雨雪暗侵搖落候。冰霜偏老別離人。獨留真覺無聊賴。擬學揚雄賦逐貧。

自笑逢時術未精。人間無用是虛名。家門似我慚爲長。才器如君合晚成。別館能無三宿戀。歸途只要一冬晴。最憐今夜霜天月。畫角吹殘布被輕。

小榼三升貫凍醪。也應與爾慰牢騷。不因富貴思彈鋏。或有英雄辨捉刀。風雨慣曾憐弱弟。田廬忍使委兒曹。丁寧一語煩相誡。畫虎休輕學伯高。

大風出西直門至自怡園愷功方擁爐讀史

萬斛沙如萬斛潮。捲空殘葉剩枯條。到門日影龍蛇活。拔地風聲虎兕驕。十里欲迷城北路。一鞭重渡苑西橋。圍爐薄雪年時夢。留取閒人話寂寥。

題王令詒松南柳磯圖三首

自截筠竿八尺餘。偶從沙際伴春耨。人間果有絲綸手。未必臨淵便羨魚。曾是春衣染汁新。一官臨出又逡巡。萬條楊柳風情在。猶戀當年手種人。三畝菱租割水田。披圖閒惜好山川。歸人預作明年計。欲借橋東放鴨船。

洞庭秋望圖爲同年姜西溟題

我昨扁舟帆去聲。湖水出沒鷗羣鳧。西風吹偃萬梢蘆。斗柄插空將北指。庚午秋冬間余寓居洞庭東山君時正作桑乾客。南北相望渺千里。念君落第招君歸。已是明年三月尾。其秋我復遊廬阜。走上雲頭振衣履。海綿片

片盞吾胸。奇絕生平。乃有此洞庭。直可盆盞貯。七十二峯同撒米。有如天半立峨眉。下視成都居井底。君爲此圖。毋已隘。細寫秋毫入側理。男兒失路真可憐。澤畔行吟聊復爾。今來又赴京兆試。失固其常得差喜。與君同榜。獲聯名。王後雖卑吾敢恥。却披橫卷索新句。一啖如臯方射雉。才名誤汝四十年。決踵何堪比截趾。至尊久已記名姓。虛向蘭臺署良史。探支官俸月一囊。揮灑傭書日千紙。須長及腹誰攬之。髮白滿頭行老矣。向來蹭蹬天有意。特與先生慰暮齒。眼前同進俱少年。感歎無端從此始。翻思舊狎漁樵伴。故展烟波洗窻几。不然此畫且善藏。勿更題詩乞餘子。

座主侍讀徐公將南歸感恩述事六首

公竟飄然賦遂初。輕裝如葉稱懸車。自編永叔歸田錄。誰上何蕃伏闕書。臘雪寒消傳盞後。春颿夢穩挂冠餘。白頭別有千秋業。或恐名山勝石渠。

特簡初傳出禁林。文章曾結主知深。敢云得馬非初意。莫誤飛鴉是好音。魚尾經燒憐短鬣。桐材入爨辨孤琴。恩牛怨李翻多事。只要羣公識此心。

貫魚立鵠萬人看。盡掩雲羅事最難。那得高才皆入彀。每聞餘怒必衝冠。向來清議寧隨俗。從此朱絃恐廢彈。不信滔滔將日下。江湖無計障狂瀾。

水底含沙豈有因。何當舉國逐浮塵。險經負羽沈舟會。勇作抽帆到岸人。難挽頽風歸太古。獨迴天意入

陽春漁樵一席誰爭得。私第歸來尙角巾。
虛舟飄瓦閱人情。得失心恬氣自平。駿骨執緣千里重。鴻毛公視一官輕。同朝盡諒憐才意。聖代能全去國名。惟底青衫添別淚。十年門下舊諸生。

絕無聊賴住京華。年去空歌蘇幕遮。枯樹忍攀前度柳。新霜誰護後栽花。愁來客況渾如醉。身在師恩豈有涯。贏得陸公爲舉主。儘容開口向人誇。

昆陵楊青村謁選得普安令王石谷爲作黔遊圖索余題句兼以贈別

萬尖石筍高刺天。日氣挾霧生黃烟。盤江中截兩崖斷。高緹一道虹蜺懸。尋樞裊裊度空際。下有千斛蛟龍涎。普安孤城小於斗。險扼地勢當黔滇。城頭置墩城下驛。官舍坐見行人肩。楊君一官乃落此。幸是熟路無迍邐。憶君年當十八九。白面便已能談邊。趨庭萬里不辭遠。直過瘴嶺隨飛鳶。辛酉夏秋青村省其尊公秋屏靈副於貴是時西南屬兵革。郡邑疾苦力顛連。爾來休養踰十載。瘠土已變桑麻田。朝廷況下寬大詔。積賦逋稅新除蠲。君今乘傳又重到。何異寫化雙鳧仙。畊烟散人好事者。遠境寫入秋毫顛。山川歷歷都在眼。我愛此景非從前。小詩或可當別操。待爾譜入琴堂絃。

寒夜同王令詒魏水村顧書宣家可亭姪集楊晚研庶常齋分韻得寫字

官閒門徑僻。歲晏人事寡。厭俗謝交游。往還惟舊雅。僦居適相近。踏凍免騎馬。巷北召王猷。巷南邀魏野。

顧生住西弄。寓舍喜新假。我至每劇歡。招呼臂同把。北風吹天晴。城上烏啞啞。寒光潑初月。殘雪猶在瓦。此時不作達。可惜白玉罌。地菘翠成菹。水族鮮製鮓。盤餐媚鄉味。口似蟆頤哆。隣沽雖稍甜。轟飲亦聊且。晚研以不得佳釀。故其詩有濁酒甘同昵。惡人之句。我生類知分。卽事有取舍。正如熊掌魚。那得兼二者。十觴竟連釀。麈尾爲一赭。主人負詩才。劈紙給揮灑。敢辭押強韻。數子賴陶冶。吟從夜枕續。臥聽街鼓打。所恨不善書。當令阿買寫。

僕舊有青田凍石一枚歸晚研六年矣頃遇范子方仲於京師范精於篆刻許爲我摹小印而此間覓佳石不易得意欲晚研反我故物作詩先之

鑿石雕蟲魚。此舉誰作俑。後來琢山骨。價比大小珙。匹夫懷奇珍。惴惴初抱恐。連城旣入趙。負曲敢虛擁。和璧竟歸秦。陋邦手徒拱。自茲嗜好捐。萬事成闕茸。殘編任飽蠹。退筆詎銘冢。空憑咄咄書。硯乏纖纖捧。何當餘結習。往往吟肩聳。好事偶分牋。塗鴉每慚悚。丹砂綴小印。紙尾毋已宄。范子故見嗤。剗敝寶非種。擲地作石聲。從旁乃慙慙。當時巾笥蓄。有若蛾化蛹。去我今六年。居然戀新寵。刻舟勞記劍。觸物心猶竦。昨日聊叩君。機鋒鬪針孔。秘藏戒輕出。防我或好勇。攫之寧非顛。健者豈惟董。輸攻力易竭。墨守計仍鞏。不如且姑緩。靜俟天倪動。奇巧出窮人。詩端忽噴涌。明朝走尺蹠。待命不旋踵。盟渝息壤舊。歸視汝田重。在我猶在君。報章行及奉。

晚研見和前篇謂余有新蓄壽山小石援東坡海石之例欲以此易彼重違其意割愛分贈二枚

再次韻速其踐諾舊石之歸有日矣來翰有邀令詒水村書宣三子屬和之語兼以示之

假道蓋有由。兵端實始俑。君如早識此。堅壁却吾珙。逡巡不入境。下邑方惶恐。奈何昧厥初。納賂覬私擁。青田吾重寶。掌握失把拱。豈無他山攻。頑礦棄紛茸。壽山快新得。餘子欲奪冢。炯然珠玉光。入掬似可捧。圓者廉角殺。方者風骨聳。昨偶出示人。旁觀盡驚悚。老夫喜省事。羅列稍嫌冗。因憶巨璞完。吾家有遺種。作詩乞故物。致語極慇懃。兩日縈我懷。有若絲纏蛹。君初非豪奪。繼乃絕於寵。故以文滑稽。發端特高竦。錙銖責施報。計竿到桑孔。平生怯小敵。今見大敵勇。肯爲城下盟。執筆恥南董。相持兩不決。京索成臯鞏。飛書奏奇功。小利戒輕動。叩關索敵賦。彼勢猶洶涌。割愛忍須臾。禮成門欲踵。中原有好會。信義隣邦重。後約勿更渝。槃敦吾將奉。

門神詩戲同實君愷功作四首

賺得兒童仰面看。影纓衮服最無端。國門他日曾懸價。馭僮何人敢賣官。丞相魚魚工擁笏。將軍躍躍儼登壇。星奴結柳翻多事。五鬼爭彈貢禹冠。

揚眉氣色任充闊。比較門風孰不如。幾見華楹留故帖。偶繙新曆當除書。關能拒客非關汝。錢可名神儘讓渠。久閱人情吾勿怪。過時光景合交疎。

虎豹森森列幾行。誰教骯髒倚門旁。通侯湯沐虛傳漢。陳平封戶進士科名尙冒唐。用鍾馗事魚鑰同時司啓閉。

雀羅終歲有炎涼。相逢白日多魑魅。乞與先生却掃方。
屢屢歌裏撥寒灰。歲酒逡巡醉一杯。凡鳥有人題字去。冥鴻幾個挂冠回。好官第宅多相望。野老柴荆肯
浪開。直與歸人占吉夢也。煩呵護不祥來。

敬業堂詩集卷十八

白蘋集

起甲戌三月終六月

甲戌二月將出都。作詩留別諸同年。座主清谿公。見而垂和。有下第情懷。刀劍傷之句。蓋用東野詩語也。時公亦將南旋。買舟通路。命余隨行。東野不又云乎。棄置勿復道。楚情吟白蘋。他日舉以似公。公曰。子庶能自廣矣。

下第南歸留別同年姜西溟廖越千劉大山王崑繩李若華諸子二首

一顧人間事不輕。敢將汲引望公卿。張羅天遠鴻雙去。彈鋏心粗劍一鳴。誤喜青燈回昔夢。枉煩芳草勸初程。歸人別有看花約。明日騎驢便出城。

明知歸計尚茫茫。且作無聊別帝鄉。下第兒還添客累。當歌酒或替人狂。膏盲痼疾貧難療。須髮流年老易傷。聚鐵豈堪頻鑄錯。早收心力事耕桑。

虞山錢劬谷屬題采藥圖二首

小年長日正遲遲。算是樵柯欲爛時。大抵人情多好勝。偶逢仙敵亦爭棋。玉柱金庭境久閒。頗聞巖谷異人間。長鑱誰斲雲根斷。片片飛來盡出山。

奉陪座主徐公遊一畝園次吳京兆韻

履綦陳迹已多時。

乙丑秋先生召同人於此地雅集

十載重游醉不辭。初綻柳如時態軟。未開花爲閏年遲。罷官樂事苦

邊杖。去國閒情局外棋。又是一番寒食過。錫簫聲裏雨如絲。

張灣舟次留別姚君山別峯兄弟

久作京華客。今知去住難。老方隨計吏。名不上春官。別酒青燈戀。離程白髮拚。眼明楊柳岸。稍喜見梳竿。

馬坊口大風送劉大山還京次座主韻

明波如鏡瀉天津。忽捲狂飈萬斛塵。酒色難寬臨別恨。楊花只似未歸人。家貧不信貪爲客。母在尤應重此身。重過杏園休悵望。等閒狼藉道旁春。

天津別姜西溟次韻

同是春風失意時。送君真覺拙言辭。杜陵旅食經年久。熙甫才名一第遲。青鏡從渠增算髮。白身輸客賭殘碁。老來別緒兼師友。那得并刀剪亂絲。

晚泊獨流

關城春向盡。小艇下津門。風止橋形直。潮來水氣渾。蒲魚喧晚市。櫻笋憶鄉園。歸路三千外。從人屈指論。

滄州阻風謝別峯同年餉酒二首

風程半日滯滄州。客恨除非醉卽休。安得春江變春酒。陸摩陂外水如油。
青旗夾岸酒家樓。正坐囊空價莫酬。慚媿貧交分一斗。爲余親典黑貂裘。

大龍灣阻風奉次座主原韻

有聲南來猛如吼。白日無光移卯酉。荒灣曲岸萬木僵。摧折萌芽比腐朽。蛟螭勢奪虎豹窟。塵堞居前砂礫後。舟行逆水兼逆風。或跋其尾或掣肘。天公如醉意未豁。人事徒施力何有。先生晏坐百怪恬。萬籟無心發于喁。已憑忠信涉波濤。更列圖書環左右。詩成一唵自投筆。臥拓篷牕見星斗。江河日下是知津。高浪攤錢輸水手。青春忽忽乍經眼。平野茫茫一回首。此時看客挂征颿。何異癡狂中風走。乘流習坎吾有命。底用旁觀別妍醜。熟諳世路忌爭先。飽閱人情能耐久。蹉跎不負遂初計。神貺先生亦良厚。檣烏斂翅旗腳迴。頃刻雲衣變蒼狗。鄉程有期行漸近。杙釘嘉魚樽貯酒。朝南暮北待公歸。肯讓山陰探樵叟。千點桃花一葉萍。鷗波正漲茗溪口。

德州同年李文衆招集見可園二首

東風有約出京華。弭櫂相尋到水涯。得地百年因種樹。留春一日爲看花。明日亭臺縱好須賢主。子弟多才必世家。直得此間成茗芋。甕頭墨露不須賒。墨露德州名醞也。品在盧酒之上。
槐陰小徑轉閒坊。猶記田家舊草堂。田紫綸司寇兩津草堂去文衆居半里余去春同康館過之。歸路重經疑昨夢。名園欲別惜韶光。

濃熏酒氣茶檠架。翠滴苔痕薛荔牆。最愛一軒幽絕處。紫藤花罩讀書牀。

四月十五夜鄭家口對月以江清月近人分韻五首

孤舟淹旅程。初過平原郡。樹色燕帶齊。河流衛交汶。可憐一輪月。偏與愁人近。已經連日風。更怕宵來暈。

一笑起推篷。清光吾有分。余得近字

明月窺我舫。我影在船窻。我起却望月。影落玻璃江。人影與月影。無端各成雙。泡幻豈有情。妄見生紛龐。

不如抱影坐。閉目心自降。右和江字

風止波亦息。濁流同一清。小杓夜分江。龍頭注茶鑪。須臾波心月。却向杯底生。我醉竟吸之。謂是方諸精。

孤光入懷抱。耿耿留空明。右和清字

隣舟悄無聲。高臥如避月。此時敏舫歌。撫景更清越。密疑穿荇藻。細可數毛髮。微風蕩酒襟。涼氣入詩骨。

欸如打五鼓。蓬罽猶未沒。右和月字

京城豈無月。眯目多飛塵。從公作上元。忽然涉殘春。扁舟落吾手。日與魚鳥親。始知天壤間。清輝屬閒人。

行行莫回顧。永結江湖隣。右和人字

重過臨清感舊傷外舅陸射山先生也

重經淹泊地。往事獨心驚。客路貧相倚。歸舟病不輕。百年隨夢斷。孤日傍愁生。流盡州門淚。潺湲是水聲。

初入插

河縈千里曲。岸束一門高。不有乘流便。誰知上插勞。木痕深記筮。石眼密容篙。唉指長年說。吾舟聽汝操。

次日連上戴灣土橋二插晚抵梁鄉和座主韵

一月郵籤算水筒。快從入閘奏奇功。柳綿渡港船船雪。麥浪翻田岸岸風。尙有貽封尋晏子。梁鄉屬堂邑。晏子食邑也。不教瀧吏惱韓公。河神伎倆全無用。鼻息如雷耳正聾。

阻插

健水分支總入漕。客程守插似填壕。忽飛瀑布簾垂地。旋滴珍珠酒壓槽。鵝鴨淘沙還善沒。魚蝦出網竟如逃。人間行止原難料。小住差償昨日勞。

聊城和座主作

談咲封侯事不難。西歸仍作布衣看。紛紛眼底皆商賈。只是人情戀此官。

南旺分水處

一綫分鼇背。千帆掠馬鬣。江河方日下。南北此居中。水氣空灘雨。槐陰古廟風。兩朝溝洫志。但策轉漕功。

卽目二首

關吏逢迎堠吏諱。飛流一道走京華。綱船果熟盆池樹。驛路香馳御苑花。長見名材充土貢。幾聞中使出

天家荔枝龍眼隨年例。笑指炎荒萬里賒。
子弟梨園舊賜緋。樓船南下疾如飛。衣冠氣盡魚龍雜。帷蓋恩深犬馬歸。桃葉何心隨短楫。楊花多事打春旗。就中別有青衫客。聽到琵琶泪暗揮。

韓莊閘口望嶧山湖

嶧山鑿石東作隄。天勢半落陂湖西。湖波吞天入豐沛。日腳插地生虹霓。湖西爲沛縣芒碭雲氣忽斑駁。倒影摩盪青玻瓈。須臾水光變深黑。湔盡萬古蛟龍泥。洪濤怒挾風雨至。列岫出沒頭皆低。呂梁直下二百里。但見漁舸散亂隨。鳧鷖琴高可跨吾徑去。誰能臥壓篷底同鷄栖。

新河

別穿地脉轉龍腰。新插荒堤柳萬條。故道視同甌脫地。小兒爭唱復陂謠。陽侯受職工粗就。幽鬼啼墳骨已銷。莫道治河無善策。主恩存歿冠羣僚。

出插後順流揚帆

牛頭灣接貓兒窩。小船出插如擲梭。客程已過十六七。歸夢尙隔江淮河。鳴鳩催雨麥秋近。貰酒配魚蒲節過。黃流正報落槽信。更喜枕上無驚波。

天妃插

淮勢今年盛，洪河不敢侵。濁流三舍避，清漲一篙深。警眼移蘆汶，回頭失柳林。生來供作帶，容易待成陰。

王楚士惠鱒魚二首

南歸一飽願無餘，正及江淮五月初。值得老饕開胃口，河豚嘗過又鱒魚。

辛苦漁榔逐販鮮，江城一尾賣千錢。朝來下箸還三歎，半月前頭遇貢船。四月杪在濟寧，鱒魚已入貢矣。

雨後過馬寒中山居

君家菡蘆山，我家菖蒲港。山淺游可履，港狹行礙榜。塘南十里餘，野色平於掌。田塍針水足，夾路新苗長。兩夫肩一輿，四足比雙槳。前行忽坐睡，縹眇入無想。漸聞竹樹聲，出谷遞清響。到門山亦住，斗室寬且廣。尊卣間圖書，目存不暇賞。主人爲指似，一一開疑網。我老嗜好蠲，因君覺背癢。興來乍飛動，偶發難自強。昏昏燈吐籬，灑灑酒浮盎。不辭日過從，所願歲豐穰。明朝雨決渠，濕氣潤流磔。奄觀早稻熟，後約赴秋爽。

原蠶行

村東村西桑葉綠，頭蠶不熟二蠶熟。薄於片紙白於脂，五月南風齊上簇。縲車聲中湯百沸，出釜持將易斗粟。去年苦旱秋不登，民命全憑寸絲續。我聞周禮有成法，一歲不容種再浴。蠶多害馬理或然，物類區區別田畜。國家官馬百萬強，惜薪監督煩曹郎。口外官馬設內務府郎中，歲收馬矢變價歸惜薪廠。原蠶微利幸無禁，勸汝努力須栽桑。田夫暑雨多咨怨，不如且喫蠶娘飯。

秋鳴集

起甲戌七月盡十月

蟲之鳴秋。候至適然爾。而昌黎以爲物不得其平則鳴。余非善鳴者也。特假蟲之鳴。以自文其詩。若云其志弛以肆。則吾豈敢。

送王子穎赴龍游教諭任

子弟芙蓉幕。先生苜蓿杆。儒風吾土近。師道此時難。屈首居貧地。安心送老官。所欣賢尹在。臭味定如蘭。
時繆陵良以名進士爲是邑令。故云。

朱竹垞表兄屬題小長蘆圖用阮亭先生體賦五六七言絕句各一首

君住鴛鴦湖。儂占鷓鴣浦。一統志云。鷓鴣湖在海鹽西南四十里。今其名無可考。當卽黃道湖。去余居十里。同爲簑笠翁。貫聽菰蒲雨。

種魚三畝五畝。隈水前溪後溪。認得隣莊老樹。草堂在鶴巢西。

白首初辭供奉班。一身那不受投閒。江湖老伴多星散。知己無如父子間。

德尹閩歸戲調之

盧橘楊梅已過期。別來鄉味剩空枝。八千嶺路到家日。算是荔枝初熟時。

補和大司寇徐公遂園修稷詩限蘭亭二字二首

別起林園十畝寬。築亭何必更名蘭。杯流細浪魚鱗活。花補新巢燕羽乾。春事無如三月好。人情特去一

官難吳中父老矜稀見。每到佳期約伴看。

獨擅千秋著作庭。文躔光透老人星。官同白傅歸仍蚤。樂天以刑部尚書致仕史到溫公局未停。妙手成圖初見畫。

高僧入社亦忘形。分明洛下風流在。不數詩家曲水亭。

清流山瞻支公塔

石路秋花艷。沙田早稻香。壞墻連廢寺。古塏表平岡。境寂蟬聲合。松高鶴骨涼。永和年號在。苔蝕不成行。

天池山寂監禪院

荒榛下接瓜芋區。微徑漸上多縈紆。山果甘垂紫桑椹。僧廚脆淪紅竹菇。山有所產。味最佳。三間古殿石將泐。一眼碧泉秋不枯。我來登眺試腳力。且喜未用青藤扶。

過文與也竹塢草廬

坐閱滄桑五十年。不知顏狀已蒼然。世家文物傳詩畫。相國衣冠傍墓田。文肅公未第時。讀書丙舍。喪亂後。即附葬贈公墓旁。亂竹巧遮行藥徑。濁流閒送出山泉。丈人有福能高臥。一榻秋陰萬樹蟬。

夜至當湖訪李辰山不值

風色晚尤惡。扁舟逆浪翻。渠添浸稻水。雨熟種薑村。遠火欲投岸。孤城將掩門。到來還躑躅。疎磬報黃昏。

沈客子舊寓都門所居名獨樹籬自撰七言古詩曹實菴錢玉友湯西厓皆有和章今來索余補

作仍次原韻

沈子清才在塵埃。有如茵蒼生淤泥。又如服鹽駕鼓馬。下有逐電追風蹄。青衿蚤爲命所制。百甕未了酸寒盞。三年四門作都講。啄粒亦到官倉稊。人中嵇紹本易識。孤鶴氣壓千羣雞。家家朱門當大道。爾獨隘巷尋卑棲。歸來欠伸眉礙戶。一啜入戶頭仍低。空庭得樹翻自喜。有滄仰視雲萋萋。忽驚霜禿九秋幹。旋見雨長三春莢。墮巢晨拾赤腳婢。落葉夜掃長須奚。問君此間亦何樂。乃挈穉子携山妻。狂來對客發高論。塵柄手捉談天犀。北郭槁枝聊隱寓。東方簞藪真滑稽。孤松祇宜伴彭澤。五楸大可娛昌黎。翻身買櫨竟南下。野性終近深山麝。故園喬木正合抱。叮嚀旁接澆花畦。昨非今是恍夢覺。涉腳尙淺幸未迷。伐檀河干等無用。美哉河水清漣兮。

塘西訪張介山病

十年小別隔江淮。重叩溪南養藥齋。醫可活人偏善病。闍非拒客況吾儕。名場交作吹盞冷。老境詩同噉蔗佳。一髮弁山青到眼。吳興游屐與誰偕。初意欲約介山同遊湖州故云。

哭同年王載安

判袂京華半載餘。扁舟歸造故人廬。不圖別後遊難續。只道秋來病已除。五畝未曾營世業。一名無復上公車。讀書已悔生涯誤。還望孤兒讀父書。

張權六招同許舜功王載南兩學博及兒建泛碧浪湖徧遊近山諸寺觀次東坡汎舟城南會者五人韻四首

葑田秋漲碧鱗鱗。依舊清風起白蘋。且喜此遊客我輩。不知當日定何人。五人者自蘇而鱸魚入饌羹尤外皆不著姓名

美鷗鳥迎船意亦馴。載取烏巾名釀去。黃甘寧數洞庭春。木樨香透老僧齋。爽氣宜人樹樹皆。詩興賴君多撥觸。秋光爲我洗塵韁。芥山客到茶如雪。箬水船移酒似淮。已辦芒屨斑竹杖。丹梯隨意轉雲階。

道峯負石還兼土。遠岫當窻晴可數。花到秋林不喜紅。竹生幽磳何妨苦。平鋪稻壟翠千頃。高引炭烟青一縷。斜陽緩緩送遊人。出谷猶聞上方鼓。

佳處溪山意未厭。塔鈴一角響風簷。烟波野渡初迴棹。燈火河房半捲簾。愛客不嫌官獨冷。過時誰道日長炎。敢誇豪氣除難盡。痼疾聊從好友砭。

雨中奉陪座主徐公及韓丈子邁放舟夾山漾欲遊棲賢不果歸登峴山作四首

過盡迴谿十里長。孤城回首漸微茫。風鯉曉氣魚蝦斷。水減秋痕鴈鷺鄉。菱蔓欲牽絲已脆。荷花雖敗葉猶香。船頭忽指前遊處。白塔紅亭認道場。夾山漾在道場山之陰

野色天光入望奇。融成一片綠琉璃。展開手卷王濛畫。收拾才情杜牧詩。畢竟清遊宜寂莫。尤難好景是

迷離桃花莫被漁翁誤。秋在斜風細雨時。

選勝初期汗漫遊。棲賢不到恨空留。橋低忽礙尋山路。興盡非關冒雨舟。瓦竈分泉烹紫笋。印泥開齏試清羹。買田合向吳興住。蟹舍魚莊一網收。

亂石多成劈斧皴。窪樽亭外勢嶙峋。一州文物傳孤碣。逸老堂明世廟朝鄉先生劉南坦顧箬溪創碑尙存前輩風流剩兩人。屏擁弁山高簇簇。簾鋪雪水細鱗鱗。名園長泊鷗波畔。座主新買一舟名秋水園細數陪遊第幾巡。

中秋鳳晨堂讌集

吳興我初到。風景值清美。縱爲冷澹遊。亦戀佳山水。矧迺多良朋。盍簪履錯趾。十日九放舟。波光嵐影裏。夜歸漏必下。旦輒扣門起。如此以爲常。行期難準擬。中秋節漸近。未到先屈指。朝登鳳晨堂。少長各就齒。森然敬愛客。未覺肴核侈。是夕雨忽晴。天容出新洗。華鐙挾朗月。澹灑落杯底。倒影射空堂。濛濛烟霧紫。談諧雜絲竹。觴政不暇理。我醉問主人。雅集歲凡幾。答言良會難。雲散波旋委。自從庚申後。十四五年矣。庚申春吾邑陳寄齋來作社集同學近無多。含情俟知己。此邦富人文。槃敦執牛耳。耆英洛下社。子弟高陽里。往往前輩交。久要或在此。平生好求友。出門失桑梓。落魄肯見收。同心庶堪倚。溪山勿吾咲。來往自今始。

鄭春薦唐殿宣諸子招集湖舫二首

萬株老柳陰猶綠。四面青山影欲沈。此段秋光真冷落。孤山不泊泊湖心。

誰遣秋娘來喚渡。忽攜風雨到尊前。老夫借得纏頭費。無數跳珠盡入船。

明日再飲春薦宅。座有濮姬吳人也。姿性明惠。臨別口占四首。

故人道我風情在。別選紅粧勸酒卮。不料窮歸無好句。累他羅帕乞題詞。
絳蠟花開照卸頭。眼波入鬢却橫流。問渠肯顧含何意。一笑千金異日酬。
落拓生涯大可憐。江湖人老杜樊川。倦游雙鬢無多白。白盡紅燈綠酒前。
風雨催人向婺州。輕裝半月算歸舟。富春江外無潮信。鴉舅霜紅在晚秋。

時余將往金華。

雨發江干

晶晶江光去。昏昏海氣連。雲沈離岸樹。風漲落潮天。熟路便孤客。輕裝稱小船。十年遊跡在。重檢舊詩篇。

富春舟中先寄桐廬學博吳鹿砦

朝發定山村。暮投富春渚。清江帶小郭。橋影稀可數。已飽挂帆風。猶聞滴篷雨。山環水疑盡。水轉山復吐。本爲寂寞遊。未覺應接苦。桐谿喜漸近。中路有賢主。

劉南村署齋同鹿砦夜飲二首

浙西山水縣。最好是桐廬。地僻本無事。君才長有餘。秋林聞割漆。晚岸見罾魚。許我來相就。嚴陵好卜居。
故人多薄宦。解后見交情。燭院三更話。風江半日程。山肴蒸栗熟。法醞帶泉清。醉裏騎官馬。星光照出城。

舟次桐廬聞唐實君補授儀曹喜而有寄

謁選初聞欲赴秦，唐已選朝邑令奉旨特留。改官特荷主恩新。起家科第原難料，得路文章洵有神。東閣游揚因客重，南宮期望感君真。欲知喜動江湖色，忘却身爲失意人。

嚴灘早發

紉如鼓打巖頭戍，催起栖鴉天未曙。飛星過水如有聲，苦霧迷津忽無路。長年眼昏心手熟，已報前灘暗中渡。遠氣隴隴日射穿，秋光紅上嚴陵樹。

由蘭溪縣坐菱白船晚至金華

疎林野岸開平遠，漠漠江天秋向晚。陸龜蒙鳴戴嵩牛，一帶村家供畫本。赤松門外問長年，指似金華小洞天。偶然走入羊羣裏，去作人間狡獪仙。我與初平稱莫逆，重來已是千年別。可惜巖頭乏主人，亂山依舊堆頑石。

登寶婺樓

斗杓倒插勢凌虛，高出城端五丈餘。一雁下投天盡處，萬山浮動雨來初。別開戶牖通呼吸，旁引風雲入卷舒。八咏門荒詩境改，讓他仙子占樓居。

金華趙鹿友明府招同家春谷兄賞菊

四先生里古金華。循吏如君自一家。早稻喜嘗豐歲酒。秋庭閒放午時衙。官同彭澤宜栽菊。客到河陽許看花。猶勝寒氈貧博士。朝朝巖洞訪烟霞。春谷兄時爲府學教授。故戲云然。

歸舟雜咏六首

湯溪蘭蕊及秋香。覓本猶煩遠寄將。多謝故人先損惠。兩頭載酒作重陽。教授兄許覓秋蘭見寄。舟過蘭溪。陳進士紫馭以名酒相餉。故

並及之。

南遊何事太匆匆。及取歸帆半月中。轉盡清溪三百曲。萬株烏柏一霜紅。恨不清江處處灘。一聲鳴櫓下奔湍。來舩莫妬歸程速。我亦曾經上水難。昨到金華洞口還。明朝又看浙西山。風前自覺衣衫重。穿過千重濕翠間。青山漸遠漸模糊。散入雲烟澹欲無。畫手稀逢王子久。詩家別寫富春圖。滾滾秋濤浩浩風。烟茫茫處雨濛濛。不知誰割東西界。半幅江山展越中。

初換烏篷舩

濤江日夜攪秋天。聽雨聽風那得眠。莫怪朝來貪晏起。烏篷夢穩越人船。

山陰道上

道德經翻晉永和。書家好事例傳訛。至今似帶羲之癖。風俗村村愛養鵝。

重陽前一日至越州自太守以下地主無一人在郡者即日返棹作此解嘲

夢寐平生慕越州。偶然訪舊作東遊。半醒半醉他鄉酒。黃葉黃花古郡秋。九日溪山無地主。一天風雨在歸舟。此身到處初乘興。興盡誰能更強留。

晚至西興

魚菱論斗米。論斤蟹膏擘。臍鬣割裙豐。年亦覺旅食好。一飽媿與居民分。詩人好游無定處。乘流則行得坎住。吳山滿眼待登高。暮雨西興挂帆去。

贈紹興太守王憲尹

千巖萬壑浙江東。典郡聲華迥不同。七十葉傳王內史。二千石視漢三公。誇人詩句蓬萊上。寓意文章山水中。誰似先生觴咏地。蘭亭原是舊家風。

閱邸報知揆愷功改官翰林侍講喜寄二首

邸報傳來遇絕奇。才名一日動丹墀。不矜官爵由門廕。獨愛文章結主知。跋鱉敢爭騏驥路。拙鳩休奪鳳皇池。未妨小變平生格。從此須工應制詩。

知子無如我最真。性情長與一編親。有才畢竟難埋沒。此事曾經共苦辛。草閣孤燈回白首。荷塘昨夢隔紅塵。記去年銷夏事。沈吟爲感傳書意。可少當時唱和人。時愷功屢馳札促余北行。東江已補官禮部故並及之。

敬業堂詩集卷十九

敝裘集

起甲戌十一月
終十二月

入都凡三度。多在春夏之交。未嘗從風雪中跨驢也。甲戌重陽後。自金華歸里。兩接愷功札。促余北行。遂於長至前五日束裝。一羊裘已十五年。裘則敝矣。而行役尚不知止可嘆也。

敝裘二首

中道誰能使棄捐。蒙茸雖敝省裝綿。曾隨南北東西路。獨結冰霜雨雪緣。布褐不妨爲替代。綈袍何取受哀憐。敢援齊相狐裘例。尙可隨身十五年。
冷暖相關老倍知。黑貂何必勝羊皮。留同敝袴非無用。好比緇衣或改爲。取醉難償村店值。有人還當釣簑披。家貧舊物無多在。不忍吹毛更索疵。

山塘與德尹別

歸何草草出匆匆。聚散全非意料中。長路一痕添日綫。是日征衣幾縫裂霜風。未論去國經年別。且喜停舟五夜同。記取欲眠頻坐起。半塘橋北虎丘東。

家二瞻兄八十壽

我觀造化初無權。仁者自壽其天全。老翁小兒兩遊戲。直以渾沌還吾天。不爲物用而用物。歎洩元氣成雲烟。古來絕藝兼者罕。鍾王顧陸名各專。輞川摩詰書未稱。三絕獨數榮陽虔。眉山海嶽不復作。松雪兩派猶相沿。先朝倪沈及文董。筆力亦足追前賢。吾兄妙手靡不備。書法入聖詩能仙。偶然點染作圖畫。別有天授非人傳。興來百紙一掃盡。散去半落雞林船。貴游踏破鐵門限。欲乞尺幅終無緣。有時自銘退筆冢。經歲或乏看囊錢。乃知此事因品重。兄豈自負人云然。維揚地薄耆舊少。流寓欲占文星躔。今年九月屆大耋。初度恰在重陽前。一門諸弟頭盡白。謂楷五秋山兩兄茱萸醉插隨兄肩。羨兄晚節比彭澤。祝兄添丁如玉川。兒年二十翁百歲。及看舞袖黃花邊。

題從孫汝誠倚劍圖小影二首

樞具橫腰首抹巾。天然秀骨出風塵。乃翁已被從軍誤。傷尊公荆侯勸爾休爲佩犢人。

義獻門風世共推。汝誠爲二瞻兄嫡姪孫階庭蘭玉總多才。自言劍術通書法。曾看公孫妙舞來。

發揚州留別汪庚齋

旅況殘年最不堪。何期解后作深談。向風嘶馬程程北。背雪飛鴻片片南。殘燭乍移寒減半。征帆欲挂酒行三。隋堤柳態禁搖落。也傍汪倫百尺潭。

夜宿邵隸

水榭千家市烟村十里橋。蘆灘聲響雪。燈舫影搖搖。風止鷗機息。寒深酒力消。獨眠無好夢。愁度最長宵。

淮浦冬漁行

長淮冬涸成溝渠。風雪夜折荒洲蘆。小船冲冲鑿冰去。冰面躍出黃河魚。衝寒捕魚作漁戶。手足皸瘃無完膚。三時轉徙一冬復。淵藪偶寄蝸牛廬。無田不得事農業。有水尙欲輸官租。自從十年淮泗滿。平地下受滔天湖。誰驅鱗介食人肉。漏網幸脫鸞刀誅。得時鼃蠃聚窟宅。失勢魴鯉充庖廚。眼前竭澤有餘憾。取快報復聊須臾。但看明年春水上。魚鰲又占居民居。

輓喬石林侍讀

本朝治水關全局。東下狂瀾勢難復。先生獨以手障之。言卒施行身蚤逐。徵車北去全家懼。昇櫬南歸萬人哭。百年陰德被淮揚。公在九原應瞑目。

從孫恆侯自淮安送我渡河口占志別

吹斷西風雁一繩。離情鄉思兩蒼騰。醉衝白日孤城霧。曉渡黃河十里冰。去意隨蛇遮不住。識塗如馬老偏能。未應輕別淮南路。隻影從挑夜夜燈。

逆旅行

用王半山轉韻體

行人爲客居人主。聊以稱呼代爾汝。入門不揖出不辭。主今知客却爲誰。等閒無事休爲客。幾個相逢尙

相識相逢相識非不多。賢於逆旅能幾何。

宿遷遇巡河使者

使者冬行水。居人歲避河。暫時停舂鍤。何計脫風波。賦歛殘年急。隄防下策多。皇華期盡職。報稱意如何。

邳州道中雪

野闊黃河岸。天低下相城。幾家沙際沒。單騎雪中行。漸壓經裝重。俄添老眼明。路難兼歲晚。那免嘆孤征。

雪後風日晴暖

陰霾一夕解重圍。頓覺朝來朔氣微。得暖渾如杜康力。殺霜終是趙衰威。細流飲馬知冰釋。殘雪隨風作絮飛。至竟村翁勝行客。茆檐晴晒木棉衣。

夜至馬陵

苦霧噴沙氣若蒸。荒程月黑夜無燈。前岡十里黃茅路。野火光中見馬陵。

滕縣

客從宿遷來。日日灌莽裏。今晨到滕縣。孔道平如砥。民居稍稠密。田野亦耬理。疎樹排棗梨。短檠插棘枳。雞豚飯商賈。葱薤飽婦子。居然似樂國。以彼乃形此。滕當戰國時。褊小五十里。自從置郡邑。其大實倍蓰。縣令視諸侯。提封非昔比。西南際蕭沛。豁達開顧指。回頭淮泗郊。窪若陷井底。可憐百萬戶。頻爲蛟鱷徙。

山東地勢高。厥患不在水。所期一尺雪。二麥青可起。山左自四月至今苦旱。

嶧山二首

秦岱分餘脈。差堪比附庸。祇因生下邑。讓爾作奇峰。

作俑何人始。吾將罪李斯。如今山上石。多刻去思碑。鄒滕之間。丞尉以下。俱勒石頌德政。

過兗州城外有感

泗水橋西路。垂鞭去意遲。老爲東郡客。才減小陵詩。白日黃塵暗。孤城萬木悲。遺民應已盡。莫問亂離時。

冒風過東平州暮投張秋鎮

沙旋頭疑眩。聲喧耳欲聳。不愁衝凍雨。直怕遇狂風。土銜煤烟黑。爐灰豆火紅。老妻加被絮。今夜奏奇功。

館陶早飯題壁

楊椿迷野岸。棗刺拒城壕。小縣門常閉。紆途僕告勞。半窗東日暖。一飯北風饒。聊記吾曾到。留詩過館陶。

大風至鄭家口

黑雲奔騰西北來。平地忽陷山疑頽。簌揚砂礫作糠粃。雜以萬斛葭蘆灰。陽鳥退飛翅摧折。天狗下墮聲喧。歷千年樹拔虎豹窟。四海水立蚊螭堆。他行到此迷失道。馬立岐路鳴徘徊。意中了了識村落。目所未見終疑猜。夕陽乍吐鄭家口。豁若明鏡函初開。半年遊跡入醉夢。下馬更盡當風杯。四月十五夜奉陪徐座師於此地看月故

結處及之。

戲題旅壁畫龍

誰言尤物性難馴。長養方成爪角鱗。畫手不然爭貌得。可憐曾傍象龍人。

野氣詩

朝陽射北陸。野氣何迷濛。忽生無根雲。幻作有影風。沄沄水波去。羃羃村烟封。千林皆動搖。四顧爲虛空。我聞氣升降。閉塞方成冬。而此從何來。吹萬將毋同。大哉古今宙。都攝一氣中。鉅者運鯤鵬。細或吹蠛蠓。試從一身論。可以究始終。恢恢賢聖途。剛大秉降衷。養之塞兩間。浩然靡不充。若者爲正氣。仁義澤厥躬。反是則爲邪。百感交外攻。五事協五行。輕清秀所鍾。不鑿渾沌竅。自然得玲瓏。若者爲清氣。視明聵亦聰。反是則爲濁。人心有盲聾。生氣眎初發。萌芽葆芑蒙。不敢輕散扞。所以厚蘊崇。若乃礪喉及。旁開聘談鋒。是名曰殺氣。取快誰見容。朝氣爽且朗。古鑑磨青銅。不事察察明。謙謙與人恭。其或長傲慢。鷗張徒子雄。是名曰暮氣。衰至驕必叢。凡此機相關。動與呼吸通。不知野氣者。其類當奚從。或如葭蘆灰。候至應管筒。或如古井水。冬暖冰常融。然而無附著。所向皆游蹤。於人似客氣。往來日憧憧。熏面使驚黑。醉顏發狂紅。移之人釜鬻。饋餽侈然豐。移之襲官骸。咳噎歎霾霧。又疑天壤內。物理難終窮。蒸沙詎成搏。煮石豈得鎔。受性不受氣。造化誰尸功。不如且坐睡。萬象歸朦朧。

趙北口坐冰床

古堤老柳一時僵。水腹初堅黑白洋。稍與長途休馬力。冒寒半日坐冰床。

白溝旅宿感舊

南北勞勞已十霜。瓦橋關外又嚴裝。今宵新月入窗早。去日小鬟如我長。斑鬢重來無伴侶。甲子入都。同錢玉友。翁樹南歸甲戌復借翁康餽輩北上皆宿此店。舊題幾字失偏旁。燕南酒美魚羹賤。不解愁人獨憶鄉。

立春日同愷功侍講作即用敝裘二首韻

土牛寒氣漸應捐。猶戀征袍未拆綿。東閣探梅還有信。西堂夢草獨無緣。憶德尹春生帝里如相就。老傍侯

門越可憐。南去北來成底事。暗消髀肉是今年。

逝水流光黯自知。依然一室對烏皮。冰將釋硯真吾幸。雪可搏獅任客爲。老柳受風終藪約。孤松經凍太離披。詩從鍊後鋒鏘出。正要旁人摘小疵。

再疊前韵示愷功

半生習氣老來捐。熨貼終輸裏鐵綿。待兔祇疑株可守。求魚方悔木難緣。偶然鴻爪留還去。果否蛾眉妬是憐。一種東風消不得。鬢邊霜雪又增年。

海內人才略可知。也曾高會與南皮。三年刻楮將安用。一技雕蟲壯不爲。酒市天寒愁客散。書帷晝靜喜

人披與君相對春風裏。只有冰壺不掩疵。

讀白奪山人詩和愷功三首

亭長臺邊一酒徒。仰天故作大聲呼。氣驕星宿生芒角。手擘山川入陣圖。急縛何人櫻怒虎。叢祠有鬼托妖狐。眼空江表衣冠族。搖筆猶堪殺腐儒。

人謂狂生本不狂。漆身吞炭事何常。亂餘賓客搜亡命。赦後英雄恥故鄉。寶劍塵封三尺水。麻鞵寒踏九州霜。隨身一掬瀾翻泪。不哭窮途哭戰場。

一卷頻浮大白開。卽論詩句亦雄才。到天峭壁千尋立。破浪長風萬里來。石火光中亡國恨。鐵函井底後人猜。可憐芒碭無雲氣。山色於今死若灰。

酒人集起乙亥正月盡六月

甲戌偪臘抵都。偕家聲山。僦居宣武門外。與姜西溟、惠研谿、寓舍相望。自新年始約爲詩酒之會。吳中則唐實君、趙蒙泉、海陵則宮友鹿七人而已。湯西厓、錢木菴、亮功、兄弟時或一至。後益以翁康、鮑陳六謙、狄向濤、楊崑木、稍爲好事所傳。他有宴會。牽率入座。大約月必有集。集必有詩。聲非擊筑。名托酒人。各有取爾也。

西厓四十初度。援筆爲壽。兩人交誼略見於此。非祝嘏之詞也。

甲子夏五月。我初客燕山。逢君槐樹街。披豁示肺肝。君時二十九。譽滿公卿間。我長慙七年。姓名尙泥蟠。居然荷兄事。齒序非所安。因緣求友生。稍使徑路寬。寧知遇秋賦。別足同蹒跚。古寺郭西門。頽虬栝垂丹。霜天夜蕭槭。落葉堆空欄。男兒屬有才。九萬終鵬搏。向來輕薄子。洗眼爭相看。我時仍失意。寸進弓難彎。不敢怨窮途。借君激頽頑。長恐命運薄。終身比劉瓛。音桓。皇天困斯人。日月雙跳丸。丘壑閉霧霧。江湖駭驚湍。側聞夙昔遊。一一趨金鑾。如君尤聳拔。刷羽超鷓鴣。落筆中書堂。集賢羣聚觀。大官饌常賜。內府金頻頒。至尊賞文辭。步接螭坳班。猶能念微賤。枉札來榛菅。感君期我深。暴棄難自拚。勸我舉京兆。送我赴春官。憐我下第歸。臨岐話悲酸。誰當旣得路。枯菴仍相關。長途冰雪交。鶴語今年寒。還家席不暖。又鞞衝風鞍。人皆嗤此來。此來豈無端。君年適四十。正及叨杯杓。君壯騰青雲。我衰改朱顏。詩成非善頌。聊記平生驩。

元夕前三日飲惠研谿寓齋與錢玉友亮功分韻

春寒半月透重絛。曲巷層冰凍尙堅。策蹇人尋行樂地。快晴天趁挂燈前。侵陵白髮違歌酒。惱亂朱門拂管絃。誰似閒官能愛客。朝衣典去作新年。

與陳六謙戶部話舊

二十年前兩酒人。京華相見意尤親。田園整返如孤客。邸舍翻來作近隣。難就微名成我懶。未除宿習取

君真狂言自駭家僮聽。誰識忘形舊主賓。

上元夜同唐實君趙蒙泉宮友鹿家聲山飲姜西溟同年寓分韻得雨字

北風未解嚴。刮面射強弩。富兒馬足塵。游子衣上土。我有同年生。一椽望衡宇。每因赴讌會。暫得命儔侶。時節近上元。滿堂競簫鼓。公卿例召客。僕指略可數。燭幌白生虹。燈屏紅宰堵。空明大圓鏡。爛熳散歌舞。可憐玉川居。破屋用茅補。荒庭一堆雪。月色帶清苦。也復呼其羣。經營同地主。不辭口腹累。爲愛風義古。酒行爵踰三。殺列筵倍五。先生鄙肉食。下箸輒欲吐。如何點食單。亦溷烹魚釜。西溟性不嗜肉。或誤食必以清水灌盪而盤餐乃具。此卽此毋已奢。誰能諒貧窶。我窮興蕭索。藉爾作豪舉。雅令旣匝巡。拇陣捲風雨。主人但旁觀。堅坐恣狎侮。肯爲餅告罄。相勸力須努。新詩信手成。險韻鬪虓虎。費君三月俸。醉我一夕許。忽聞耳熱歌。寒律變溫煦。

王赤抒新葺一齋名曰野航邀余對酌出詩索和卽次原韻

忘機到處總虛舟。別起齋名借楫頭。已是除塵得瀟灑。若教臨水更清幽。兩三人可同君坐。五六年應爲此留。閒殺鷗邊好風景。荷塘宜夏蓼宜秋。

白田喬侍讀。有家伶六郎。以姿技稱。己巳春。車駕南巡。召至行在。曾蒙天賜。自此益矜寵。庚午四月。余從京師南還。訪侍讀於縱棹園。酒間識之。有青衫憔悴無如我。酒綠燈紅奈爾何之句。時東

海徐尙書射陵宋舍人慈谿姜西溟俱在座相與流連彌夕而散去冬北上重經寶應則侍讀下世旅櫬甫歸余入而哭之盡哀何暇問六郎蹤跡矣及至都下聞有管郎者名擅梨園一時貴公子爭求識面花朝前八日翁康飴戶部相招爲歌酒之會忽於諸伶中見之私語西厓曰此子何其酷似白田家伶蓋余向未知六郎之姓也西厓旣爲余道其詳竟酒爲之不樂口占四絕句以示同席諸君

鬢影衣香四座傾風流爭賞米嘉榮就中獨有劉賓客曾聽涼州意外聲
鴨桃花外小池臺潑灑觥船一棹開春色滿園人盡妬君王前歲賜金來
一羣穠艷領花曹頭白尙書興最豪記得送春筵畔立酒痕紅到鄭櫻桃
茶烟禪榻隔前塵存歿相關一愴神自琢新詞自我扇教成歌舞爲何人

題楊次也所藏朱北山墨繡毬花

春風壓簾吹不動簇蒂攢莖密無縫美人纖手搓欲圓嬌鳥一梢低更重
駢枝倒挂玉蕊仙暖氣散作藍田煙粉痕洗盡墨光出自有此花無此妍

花朝實君招同西溟蒙泉研谿西厓友鹿聲山寓齋雅集分韻得過字青字

二月無花看今年雨雪多不辭官獨冷翻喜客頻過
洒掃門庭潔芟除禮法苛愛君新句好諷諭擬元和

客久頭垂白。交深眼倍青。坐銷愁裏日。來聚酒邊星。假借通隣曲。盤餐及使令。春郊花事近。後約更旗亭。

題項霜田讀書秋樹根圖

讀書未必皆識字。涉獵耳目爲窮探。此生枉伴蠹魚老。飽蝕卷帙寧非貪。文成有韻或吞剝。事出無據徒
撻擗。熟從牙後拾王李。纖入毛孔求鍾譚。橐駝馬背所見少。自享敝帚矜蒼髻。雷同不滿識者笑。人盡能
此燕無函。蘭茗翡翠稍秀異。什伯略可數二三。時情祇取供近玩。崇雅刪鄭誰能諳。我持此論衆大怪。相
戒勿聽無稽談。廿年硯田困衣食。撥置夙好隨嬰媿。排辭偶句受人役。渴飲墨汁同潘泔。有時間作屨強
語。蓼辛荼苦終非甘。項生乃有嗜痂癖。謬辱推許張頤頤。謂余頗可附同調。與別白黑分青藍。君才於世
故無匹。氣象外拓神中含。屢遊京洛結文社。獨向魯國稱奇男。空拳亦足搏犀兕。大鼎詎止容罍甌。一鞭
入海走巨石。千丈倒壑回枯柵。逍遙鸞鶴控紫極。活潑魴鯉游澄潭。才高氣盛心轉細。獨繭一一絲抽蠶。
問君此境豈易到。確有階級難旁參。向來正得讀書力。閉戶萬卷曾沈酣。源流正變瞭指掌。北斗在北海
箕南。光開飛電十行下。機發伏弩千鈞擔。搜奇抉險富詩料。然後所向無矛鏃。庭空樹老得秋早。霜色染
葉黃於柑。一編信手愛露坐。何用白石藏書菴。命工作圖索題句。劇墨相對吾奚堪。遇君尙應三舍避。君
愈降氣余彌慙。詩成乞與摘紕繆。蹇鈍猶冀隨驂驪。此間風景有何樂。曷不歸去同書龕。

料絲燈史畊巖學士屬和卽次原韻四首

勿論萬縷與千絲。似密還疎製絕奇。玳瑁筵前凝作片。珊瑚網底爛生枝。華堂金屋年年換。錯綵粧花種
種宜。表裏孤光原洞達。曹騰醉眼任斜窺。

宛宛長廊小院東。藕絲不斷望疑空。巧穿針孔玲瓏影。吹透冰肌綽約風。簾幙花深長帶霧。畫圖山淺忽
生虹。琉璃太脆紗紋薄。獨愛韜光黯淡中。

更從何處着纖塵。亞字文廻古錦茵。斜拂楊條藏語鳥。密牽苦綫過游鱗。顏筋柳骨書家格。吳帶曹衣鏡
裏身。併作清輝開四照。不勞明月吐芳津。

駢枝儷葉技同稱。點墨何愁誤不興。射角星芒殊睒睒。照人風骨自稜稜。金波蕩月成方折。玉氣生烟隔
幾層。還與石湖添紀事。詩家新賦料絲燈。范致能有上元吳中紀事長律。所載燈名甚多。獨不及此品。

友鹿寓居孫公園與實君蒙泉崑木同巷僕及西溟聲山相距稍遠友鹿作比隣詩二章亦來索
和因次實君韻奉荅

馬蹄纔過又車輪。廣術相逢亦太頻。不惜往來隨步履。預防倡和損精神。過牆濁酒能供客。鑿壁餘光倘
借人。便與中央成鼎足。姜居西舍我東隣。時余移寓琉璃廠東。

造門不見等離居。俗例持牢急破除。余兩詣友鹿。俱阻於關。僅約一條申典謁。客談幾處省傳書。巷連畢曜宜相就。
雨過蘇端肯見疎。添取新篇爲日課。與君直似共鄉閭。

友鹿復次韻見寄恐其有過督司關之意再疊韻解之二首

過門何止十朱輪。只有窮交不厭頻。語帶滑稽吾是戲。弊清摘發爾如神。犬應勿拒重來客。花亦爭窺舊識人。從此得閒須徑造。巷南巷北總芳隣。
老屋西頭勝儻居。門前無草不須除。未妨排闥來驚臥。且喜還瓶肯借書。踪跡漸同詩境熟。形骸終要禮文疎。他時野老曾爭席。記得漁樵狎里閭。

盧樗菴七十壽詩

我愛盧仝居。翛然數間屋。先朝孝廉宅。過者猶屬目。再傳世其家。門徑不改築。一經稟庭誥。自教兒郎讀。早年赴舉場。高步美馳逐。同儕重先輩。子弟尊耆宿。正坐業太精。翻令身久伏。科名人拾芥。官爵鶯遷谷。白髮迫衰年。青衫自初服。神恬遜無悶。學殖富有蓄。紅扶壓架花。翠擁遮隣竹。刻鳩拄杖頂。放鶴前山足。世自鬧如蛙。吾方靜如鵠。回看軒冕客。萬事徒碌碌。分定兩不爭。生涯籌已熟。

送勞書升通政養親歸里

吾鄉前輩楊司馬。曾脫朝衫換彩衣。祖道回思十年事。都亭又見一人歸。白雲去國情相似。黃髮娛親古亦稀。不是明時輕解組。五湖烟水屬春暉。

豆腐詩和楊芝田宮坊四首

服食神仙事不難。礎牀幾轉便還丹。世傳淮南以丹藥點成。凝來石髓風猶嫩。點出春酥露未乾。倒篋易償隣叟值。顯名原合腐儒餐。人間賣菜多求益。休與先生溷一椽。

蛙瘦熊肥兩不知。太常終歲是齋期。半炊土竈然其火。一頃山田種豆詩。饜子貧家先染指。廚娘織手並凝脂。來其鄉味君休笑。三德虞家有贊辭。事見虞伯生集。

滑可流匙勝冷淘。不爭舌在齒牙牢。渾忘肉食聊名儉。偶佐村沽亦足豪。烹雪也宜施翠釜。割雲初不費銀刀。胡麻別試山僧法。口腹窮奢笑老饕。

茅店門前映綠楊。一標多插酒旗旁。行廚亦可咄嗟辦。下箸唯聞鹽豉香。華屋金盤真俗物。臘糟紅麴有新方。須知澹泊生涯在。水乳交融味最長。

問西厓病

小閣藤欏勸獨憑。門前仍遣小僮膺。一家多累愁何益。四海無醫感又增。春酒呼兒看滌器。夜碁留客對挑燈。可知七發真良藥。莫謂先生病未能。

戲題曹希文寫生蒲萄册

東郭鹽咸陽冶。朝入羊暮騎馬。生不願封萬戶侯。亦不願領西涼州。但願蒲萄垂乳比桑葢。日日飽噉只學林間鳩。若使一官值五斗。家家爭釀蒲萄酒。枝頭無紙上有誰能截取老僧手。圖爲鑿上人所畫。

再題朱北山所畫松鼠蒲萄

兒童把竹竿。飛鼠未可逐。暮四復朝三。蒲萄秋正熟。縱使身輕化蝙蝠。可憐兩翅仍兼肉。枝頭漸空莫緣木。明朝去竊官倉粟。

爲次也題秋花小鳥畫卷

一株鴨腳葵。色映紅黃紫。雞冠似經鬪。碎葉垂披靡。無端青螳螂。失勢忽落此。當其奮臂時。寧料草間委。飢禽不汝費。集啄紛爪觜。似爲蟬復仇。反覆乃物理。二蟲何厚薄。是亦可以已。我欲解其圍。毫端呼不起。

研谿傳札訂望後出郊看杏花夜來微雨恐阻茲遊晨起風日晴明喜而有作

臥聞檐雨滴塔鳴。意外東風曉放晴。爲作報書貪早起。門前吹過賣花聲。

送畢雨稼

古藤花底逢朱十。爲我長吟畢四詩。滿眼酒徒星散盡。送君還憶識君時。余初識雨稼於竹垞先生寓

三月十六日同西溟實君蒙泉研谿六謙尚木石城友鹿永年向濤霜田亮功次也南陔至興勝

寺看杏花三首

弄袖風微不起沙。野田分路走三鷗。十年失計仍爲客。一醉無名特借花。白塔似招遊子騎。青旗錯認美人家。金丸落處休輕逐。小立逡巡避鈿車。先經摩訶菴不得入

幸是韶光處處同。勝遊隨意轉芳叢。別開香界松林外。遙指烟村杏社東。黛色濃添三面綠。日痕微減一分紅。只須十步凌丹閣。多少花頭在下風。

及記當時載酒遊。舊題幾壁拂塵留。重隨客到僧猶識。不待人言我欲愁。牧笛聲中芳草路。鞭絲影裏夕陽樓。花開花謝年年事。豈料傷春易白頭。

看花之會已成七律三章。朝來耑木分牋屬賦七言。歌行再作一首。

朝陽簷前報乾鵲。起赴城西看花約。東家借得蹇驢騎。快比揚州身跨鶴。豁然雙眼對明鏡。草樹無塵光躍躍。倚牆初見一梢紅。掩映垂楊作村落。漸行漸遠入佳境。花海茫茫浸樓閣。雲晴霧散天微霞。日色烟光互迴礪。自然得氣少人妬。縱使餘寒何處着。卯酒消來玉頰鮮。牙香熏透春衣薄。蝶沾蕊粉或雙去。燕拂花鬚時一掠。乍看半吐或全開。百面疑聞腰鼓作。因思前夜沾沙雨。特爲催花龍起壑。不然萬本及千株。那得同時齊破萼。此花舊是仙家種。肯向人間傍簾箔。自從禁苑植樊籬。已勅居僧司鎖鑰。寺後爲進御菓園

兒郎避路欹巾帽。嬌女窺隣少媒妁。可憐寂寂寄空園。也似飄飄客京洛。憶昨初來年尚壯。歡場往往貪酬酢。松林古寺摩訶菴。幾度陪遊履相錯。乙丑丙寅間屢隨大司空朱公少司馬楊公遊此 侍郎歸老尚書歿。前輩風流久寥廓。

我留紫陌十經春。白髮隨梳旋墮籜。去年三月曲江宴。橫路紛紛爭出郭。此時氾氾更思鄉。未免當春懷抱惡。豈如今年風日佳。得喪心空別開鑿。青袍莫漫感憔悴。紅袖羞堪慰淪泊。楊家公子好心事。兩世交

情宛如昨。已逢勝侶盡名流。況是閒官能脫略。雖云雅集忘賓主。治具終煩佐脾臄。是日備木治具花前醉倒十
五人。坐有車公寧不樂。歸來忽忽記前夢。後會悠悠付成諾。禪房借榻眠海棠。野圃穿畦行芍藥。勿嫌生
活太冷澹。竿木逢場聊戲劇。只愁火急促新詩。顏謝方將被陵轢。尋花本意取陶寫。覓句翻教困悉索。直
須境過兩相忘。滿紙陳言總糟粕。

狄向濤庶常訂同人會飲海棠院是日僕適有他招別請卜期研谿以詩相惱戲荅之

一春命侶原多暇。半日看花奈少緣。我爲頽唐姑避席。讓君獨作海棠顛。出劍南集

三月晦日向濤治具招同西溟實君文饒研谿六謙耑木霜田亮功次也南陔岱瞻宗岱社飲寄

園向未與會而今至者則胡芝山周漁璜張天門陳堯愷姚君山玉階兄弟

客居感節物。鄉味想櫻筍。及此問名園。忽驚春向盡。歇鞍垂柳外。曲徑紆徐引。側帽入丰茸。迴身轉欄楯。
羣賢次第到。虛坐前後盡。出曲禮讀上聲俗作儘衆芳如媚客。四顧少畦畛。丁香垂紛披。藤蔓縮菌蠢。海棠不少待。

吹作胭脂粉。那無水一池。鼓吹出蛙黽。似嫌太寂寂。作意破寒窘。鯨波捲百川。目眩空花隕。亭臺亂金碧。
有若浮海蜃。日飲正無何。老狂良足憫。唐侯但坐視。出語顧見哂。余與天門亮功鬪酒盡酣幸無性命憂。

何用須臾忍。春衣行且換。紅藥期將近。三百青銅錢。敝裘尙可準。

陸澹成侍讀招飲丁香花下同西溟崑繩寄亭作

花繁葉密暗迴廊。爲放庭空特撤牆。翠幕雲遮天四角。紅燈人醉樹中央。春辭小院離離影。夜受輕衫漠漠香。曾是往年連榻地。重來容易感流光。丁卯已巳間與家荊州兄盤桓此地最久故及之。

何倬雲戶部招諸同人飲藤花下

前日飲寄園。自辰徑終酉。連朝發酒病。解醉仍思酒。一笑赴佳招。相逢復開口。入門庭宇曠。槐蔭寬半畝。高格架藤花。有若魚貫柳。其梢多倒垂。其蔓必上走。蛟螭起拏攫。纓絡飄絲綰。翻愛急雨來。不嫌濡我首。殷勤得賢主。諧謔因良友。衣上指唾痕。花前傷老醜。人間好亭館。豈必皆已有。但願興到時。深杯長在手。

四月八日飲劉雨峰新寓分韻得佳字

十年論舊雨。一日破清齋。俗傳浴佛日。去覺流光速。來貪小住佳。時出乙丑講集詩卷見示。槐陰深小巷。花氣近斜街。早晚南船到。重看酒似淮。

題張浦畫太白像

芒角生酒星。仙才謫人世。清平三絕調。醉裏一噴嚏。可憐高將軍。不中作僕隸。脫却夜來鞞。飄然從此逝。
題張儀山中丞溫陵紀事後

見說溫陵事。安危繫一時。潮頭開郡縣。虎口奪嬰兒。報國原臣分。封侯豈數奇。置身如事外。不勒紀功碑。
贈范方仲

秋兔千頭瘞禿毫。鋒藏鏗斂似無刀。費他京國三年住。頑石如山價盡高。

爲翁景文題畫

綠蕉葉折風無賴。紅蓼花垂雨不情。一個草蟲鳴似訴。故來紙上作秋聲。

宣德素鼎歌爲山左李繩其作

西方金苗變黃白。躍冶辰砂斂成赤。神工范出形製奇。不用雷紋鑿饕餮。腹圓口直中央斂。一綫縈腰起

凹凸。其高四寸下半之。其厚三分旁稍溢。以衡測重斤踰二。宣德小爐重者不過二斤四兩以指量圍弓滿的。寶光蒸出

耳雙環。濃乳垂爲足三隻。膏流似覺層波涌。肌潤何愁熾炭炙。瓊瑰碾紫柔作團。鞞鞞凝紅嫩將滴。照來

妖彪敢逃影。吹過雲烟不留跡。神光離合乍陰陽。氣候盈虛異晨夕。世人好古搜彝敦。耳目遺亡闕金石。

此鼎傳從宣德年。居然上與商周匹。國家元氣在宇宙。百鍊千鎔聚精液。後宮侍女罷添香。講殿中宵尙

前席。曾從天上拂袍袖。一落人間似淪謫。忽經吾眼真可憐。尤物無多增戀惜。君不見城南片雨朝來急。

電掣金蛇飛霹靂。玉川破屋那許留。萬丈光芒穿四壁。

翁康飴寓齋看芍藥分韻得面字

都城洵繁華。物色互矜銜。豐臺紅芍藥。千畝開芳甸。嗟爾本名花。因多乃致賤。半開遭天闕。不許遊人看。却被賣菜傭。頃筐雜藜莧。根株兩相失。本性須臾變。相逢衢陌中。識者爲一泫。翁生官戶部。邸舍如郵傳。

近移槐樹街。意取買花便。連車載兼土。愛護同婉孌。小雨爲扶頭。清泉與醜面。瓦盆三十六。手自摩挲徧。亞窗斑竹欄。步障青油絹。花如感知遇。爛熳答深眷。其大比盤盂。或欲學團扇。高低隨所主。向背視所戀。負恃各爭妍。誰能分最殿。豈無一尊酒。就汝諧終宴。未免爲紅筵。經營好肴饗。書生例貪嗇。耳目有歆羨。學道吾未能。紛華易交戰。有情且相對。卽事驚稀見。絕勝洛陽園。花時閉深院。

送趙二聞郎中分巡兗東二首

望郎才地早知名。檠戟新臨古任城。負弩三州迎刺史。降階一揖禮諸生。山連翠岱雲常潤。濟入黃流派獨清。我是南池舊遊客。送君不覺動吟情。君家邸第好園林。槐柳周遭十畝陰。子舍縱牽他夜夢。宦遊何負老人心。共傳清節胡威絹。自有家風趙抃琴。此去國門看擁傳。拾遺親授大官箴。

送鄭禹梅郎中出守高州三首末章兼示茂名宰王令詒

高涼名宦自來無。君到方能重此區。不信試徵唐宋事。潮州韓與惠州蘇。

八十高堂兩白頭。扶攜齊赴上瀧舟。荔枝龍眼均珍膳。不要同官易播州。

曾依日影候花甌。此去人情似左邊。猶勝茂名王大尹。脚靴手版謁同年。

時范國雯得延平故及之。王與鄭皆戊辰進士。而茂名爲高州屬邑。

送陳梅溪之任階州二首

一家鼎盛十朱輪。仕籍君偏比積薪。早歲科名曾入洛。半生官況兩遊秦。陳前任綏德州牧時平不設當關戍。路僻稀逢入蜀人。鄧艾城邊閒草木。也教窮谷識陽春。

一官聊與俗沈浮。不改頭銜計亦優。稍喜分符同領郡。敢論無蟹有監州。重關夜度羣雞月。絕塞書來斷雁秋。多少郎潛愁索米。羨君已似跨青牛。

古詩五章呈吉水大司空李公

盛治際中天。六卿盡文獻。發揮爲事業。器量隨所建。公雖長冬官。其氣實涵萬。放之彌宇宙。舒卷視膚寸。道在本非夸。逢時獲初願。

百川日東注。赴海同一門。豁達意何廣。函容道彌尊。乃知延攬塗。中有仁義存。清濁具本性。澄觀得其源。君看下成蹊。桃李初不言。

西江一瓣香。自昔人文區。歐公門下客。磊落皆名儒。千秋復代興。隻輪賴公扶。官高能下士。此義今人無。空谷有幽蘭。披披自含芳。一朝采而佩。顧盼滋容光。顧盼何足多。貴登君子堂。識者或見賞。當門忌孤芳。向非特達知。標榜慙互相。

男兒感恩地。茲事豈可常。不敢泣窮途。恐爲知己傷。拙守無詭遇。異營戒岐旁。百年屬有身。利鈍誰能量。於公負期許。脈脈終難忘。

次也讀書王園夏日偶過之索詩題壁

地僻人聲覺。林深曉氣通。棗花開帶刺。藤角墮兼蟲。擊柝過佳客。傳餐累小僮。避炎知有處。來就北窗風。
虞山嚴杏修爲尊人仲甫先生乞六十壽詩并以錢湘靈玉友亮功所賦五七言長篇見示故詩
中並及之

吳中數交遊。屈指首嘗熟。錢生十年舊。直以心置腹。因之筮同人。京洛異徵逐。初逢嚴伯子。氣靜神冲穆。
涯淡未易尋。徐徐視含稭。名駒果有自。孺染出家塾。子有兩老親。筭句竝踰六。昨歸爲上壽。再出何太速。
所傷名未成。負米營斗斛。此來復相見。執手語反覆。爲言屏幃詞。排偶難破俗。人間好官爵。祇用填滿幅。
不敢濫乞言。所以省干瀆。君詩有真味。是則我所欲。出示三長篇。得隴且兼蜀。孝廉筆奇矯。榦老枝葉禿。
交情叙三世。中有滄桑錄。大錢善形容。繪畫列眉目。小錢騁才氣。汎濫到朝局。已無餘地留。故乃相迫促。
吾詩何處著。譬若蛇添足。然而難固辭。卽事生感觸。江南氏族盛。甲第紛相屬。寧知一再傳。竟爲他人卜。
君家好門閥。墻宇本先築。豈非文靖公。清蔭及喬木。仲甫爲相國文靖公會孫當時歸逮養。歲給大官祿。人生惟此難。
餘者徒鹿鹿。卽今時代換。往事如轉轂。正賴後人賢。流風承式穀。先生實高隱。祭酒推鄉曲。雖荒下溼田。
尙保檀橋屋。時情有豪奪。世守無輕鬻。冬缸葑可爇。秋圃棗堪剝。窺池荷夏紅。掃徑莎春綠。平生十萬卷。
又課諸孫讀。同牢四十年。尙享齊眉福。子行及歸奉。此樂天倫獨。古人重名義。飲水兼啜菽。斯言尙足徵。

庶當嘏辭祝。

酬同年張聲百秦中見懷之作

舉子稱同年。厥名自唐始。其初本鄉貢。往往維桑梓。地近情易親。論年序以齒。師門就行列。有若一父子。名雖托友朋。骨肉差相礙。至於試京兆。半屬九州士。或者狗虛聲。紅箋報名紙。泛交乍隨俗。相背旋棄屣。刺盾動以矛。憑身孰如几。余生久落魄。場屋困別趾。初度降惟寅。微名歲在癸。秋蛾眉換綠。看鏡抱深恥。得附當代賢。不才聊自喜。君家好兄弟。令兄逸峯亦同榜健翮冲天起。竇桂有雙枝。田荆必連理。京華獲交臂。伐木酒親醺。古道朗照顏。相期各勳壘。嚴霜妬竹柏。猛雨欺桃李。散作湖海萍。流行隨坎止。省親君就道。落第我歸里。關城杳何窮。秦樹吳雲裏。何期再入洛。冰面躍雙鯉。寄示長歌行。光芒開顧指。聳身登二華。長劍插天倚。黃河如修蛇。起伏見首尾。自然得奇句。萬象聽驅使。我欲從之遊。塵埃誰料理。矧慙詩力弱。難與諧宮徵。遲答故人書。半年坐嬾耳。

以詩乞王麓臺給諫畫山水

婁東富文獻。世守鄴侯架。太原老奉嘗。腕底幹造化。當年書畫蹟。貴豈文董亞。至今賢子孫。餘韻足瀟灑。黃門蚤登第。羣從俱方駕。朱紫接烏衣。丹青陋曹霸。朝廷無闕失。邸舍多清暇。坐令拾遺官。風流資醞藉。時時出餘技。落筆妙天下。屏幃滿京華。林泉不吾借。篋中一幅紙。欲乞防見詫。生平山水緣。無厚入有罅。

搜奇得餘快。歷險慣不怕。所媿言少文。烟雲經眼乍。如何不自量。見彈求鴟炙。意從良友申。閒請掖垣假。朝來傳好語。命以詩易畫。余以宣德紙。從吳元廟轉乞君畫。君語元廟。是不可無。夏重時。詩來則畫往矣。我詩頗拙速。敢托不敏謝。古人重踐言。相值寧論價。君其勿堅壁。致我長避舍。

附次韻

王原祁

龍山查先生。峭壁青松架。讀書百鍾鍊。等身與古化。清健更瑰奇。韓蘇之流亞。興來爛熳題。珠玉繽紛灑。余開心折久。畏友敢並駕。霧豹窺一斑。騷壇戰而霸。欲爲訪戴遊。一官苦無暇。坐令鄙吝生。他山何所藉。小技試盤礴。每恥居人下。粉本追宋元。筆墨四家借。腕弱媿癡肥。定爲識者詫。譬彼窺月魄。餘光逗壁罅。慘澹心神疲。甘苦方知怕。開闔變化間。微茫得失乍。始覺吾祖高。至令人膾炙。拙筆非許田。奚爲拱壁假。真宰雖難搜。勉力爲君畫。木瓜配瓊瑤。何以云報謝。荒率懼覆瓿。賴公以長價。紈扇懷袖中。秋風弃上舍。

次日麓臺爲余作巨然山水并次昨韻見酬再疊韻奉謝

玳瑁裝書籤。珊瑚供筆架。我無二者樂。宿習故難化。新詩出寒窘。郊島或流亞。一窺著作堂。顏汗豈勝灑。千金享敝帚。裹足追高駕。何異貧家兒。蓬頭媿王霸。方當苦酬應。供給日不暇。先生地望懸。乞者無憑藉。十年率未應。惜墨肯輕下。始知高人胸。與俗少假借。於余獨不靳。脫手洵奇詫。用意取巨然。危峯拆天罅。

趁人何突兀。旁睨心膽怕。細觀入秋毫。恍若置身乍。漁灣舟可橫。樵徑轂可炙。勢成風雨晨。不待休沐假。猶嫌尺幅短。更以詩補畫。人間有真境。躡屐當追謝。但恨多牛翁。青山索高價。菟裘營已晚。惆悵道旁舍。

王服尹見和乞畫詩三疊前韵奉舍

米家書畫船。秋蔭傍藤架。爲君下一榻。四壁烟雲化。服尹時下榻
麓臺齋中京洛少名園。精廬乃其亞。可無一斗墨。

興到供揮灑。君才況如江。袞竟高浪駕。偏師壓小敵。勢欲戰而霸。篇終味深穩。語妙神閒暇。平生績學功。

授受有承藉。淵源大可溯。派自震川下。幸生君子鄉。師友不外借。何當謬引重。恐被識者詫。昨日乞畫詩。

細聲風出罅。蒲牢懸我前。欲扣吁可怕。強顏托夙契。結襪交非乍。憶昔隔牆居。淋漓濡酒炙。已已寓居上
斜街與孫愷

似編修近隔一
垣長從服尹飲六年一醉夢。歲月不我假。青山憔悴容。此景豈堪畫。君歸約髯孫。吾亦偕小謝。來詩及
家德尹披

圖賦招隱。尙可長詩價。忍負好溪山。挑燈向客舍。

計圖昭索題看菊圖

勸君莫種菊。種菊須澆灌。本自隔年培。根從立夏判。苗新虞蠹蝕。葉密防雨爛。三時倘失勤。那博一秋玩。

不如走廟市。取辦在一旦。捧土上瓦盆。妍媸誰復辨。十年客都邑。萬事皆眼見。披君看菊圖。使我發長嘆。

題曹渭符舍人畫扇

移得城南魚藻池。便從紙上寫淪漪。畫師正恐妨魚樂。不着飛來雙鷺鷥。

費子葛陂屬題小影

費生客京華。氣帶秋山爽。學詩兼學畫。離俗寄幽賞。識君塵埃中。十載一俛仰。羨君烟霞姿。灑洒不殊曩。虎頭爲寫照。見者皆拊掌。秋根走雜樹。中有落葉響。可無松亭亭。配汝玉朗朗。勞生輪下坂。歲月成鹵莽。誰知靜坐人。一日可當兩。

題趙天羽給諫小照

長身七尺紅兩顙。成佛要在靈運先。兩塵相隔一毫末。中被官事相糾纏。豈知生來具慧業。卽現宰官爲說法。一林紫竹是禪機。只在眼前誰見睫。

送同門朱介垣掌科請假還吳

燈簾夜看秋菊花。酒徒爛醉東西家。竹垞去官君請急。近社花開少顏色。明朝我亦作歸人。二老猶堪結比隣。扁舟同訪籬邊屋。及取霜前香稻熟。

希文將南歸次淵明田居詩韵來索和章四首

故鄉去我遠。縹緲三神山。風塵一涉足。忽忽傷徂年。曹生靜者流。心若珠在淵。不使閒草木。萌芽荒寸田。如何瀟洒姿。亦復趨人間。一官比薪積。後至爭居前。坐看車馬衢。羣情動如烟。秋風夜入戶。曉鏡增華顛。身先候雁翔。心與浮雲閒。歸期服勇決。臨別翻欣然。

老馬悔識塗。亞身受羈鞅。時因送人處。一發田園想。田園近荒蕪。計拙迷孤往。家書昨日到。久雨蓬藿長。八口恒告飢。憂來難自廣。生涯事游惰。獲報宜鹵莽。

萬人浩如海。酒伴日以稀。曹生後我來。今復先我歸。家人占喜鵲。不寄秋來衣。因之報歸信。歲晚寧相違。讀書三十年。如農守阡陌。出門視蒼莽。蹙蹙靡所適。君看入貲郎。朝發不待夕。時來誇際會。抵間快投隙。得官如驅羊。舊給廝養役。課奴力耘耔。課婢勤紡績。識時乃豪俊。章句工何益。

敬業堂詩集卷二十

遊梁集

起乙亥七月，
盡十二月。

中州名勝之區也。同學許霜巖，謁選得陳留宰，邀余偕行，涉滹沱，循太行東麓，歷趙、衛、梁、宋之郊，按程計之，古蹟不少，資其車騎，供我吟眺，亦足以豪矣。

將有中州之行，七月七日，姜西溟、唐實君、趙文饒、惠研谿、楊崑木、宮友鹿、項霜田、錢亮功、湯西厓、馮文子、楊次也、陳元之、家聲山、餞飲於陳六謙邸舍，席間酬別。

屋簷秋網拂蠓蝓，弦月如弓挂一梢。剪燭談深宜夕館，看花人散憶春郊。窮無好句供傳寫，老不中書代解嘲。實君見送詩有舍人官職是虛名之句。來本無名歸亦得，只愁飲餞累貧交。

出都晚宿寶店戲示許大令霜巖

又是南程發，初我今戴笠爾乘車。衝泥早歇林間馬，積潦秋生戶外魚。十度棘闌憐報罷，一官花縣喜新除。屠龍妙手牛刀割，餘技猶堪理簿書。

涿州過渡

胡良河蔭青葱柳，督亢陂連宛轉城。但覺林中無暑氣，不知風外有蟬聲。喚迴塵夢秋初到，誤墮吟鞭馬

一驚自笑年來詩境熟。每從熟處欲求生。

上谷城南旅宿見可亭姪題壁

客路逢連雨。秋原洗鬱蒸。人投曾宿店。鼠瞰未吹燈。一榻夜涼入。二更殘月升。忽看題壁在。爲爾掃秋蠅。

早過慶都

棗林槐埂翠模糊。十里烟光接慶都。堯母陵荒秋草徧。戴嵩新畫牧牛圖。

定州口號

劃花小盃愛初燒。秘色傳來閱四朝。莫打磁甃輕試玉。人間方貴定州窰。

新樂有感

客路匆匆過定州。鮮虞臺下小遲留。輿圖西漢中山國。恩澤先朝外戚侯。支棗詩成歌樂土。種瓜人去感新疇。眼前風物全非昔。細草鳴駝一段秋。

晚渡滹沱

涼風蕭蕭響白荻。老鶴啣魚作人立。小船爭渡晚尤喧。濁浪兼泥秋更急。中流仰看團團天。太行突兀當我前。未知馬首向何處。千里夕陽橫紫烟。

麥飯亭

蒼皇那免嘆途窮。大業幾隳小衲中。名號未尊誰是賊。英雄有識獨從公。兩河子弟收星散。一飯君臣見始終。值得將軍依大樹。不勞上殿更爭功。

鉅鹿道中

要害畿南在必爭。時危往往屢稱兵。居人不重侯芭里。過客猶尋石勒城。雲挾常山蛇尾動。地連汾晉犬牙成。如今不用論形勝。徐黍秋郊一望平。

豫讓橋首四句姜西溟傳作也。辭意未盡爲足成之。

趙入宮。臣廁中。趙乘馬。臣橋下。區區欲報國。士知可憐。一死何能爲。君不見博浪一椎雖不中。置身事外非無用。

邯鄲縣呂翁祠

幻妄浮生豈有涯。何妨鼠穴駕牛車。貧兒好作音遊仙夢。怪事偏傳小說家。事出虞初志古道蹇驢多北向。空庭秋日又西斜。人間官賤黃金貴。乞與燒成九轉砂。

邯鄲懷古三首

口舌相如位上卿。從教趙括喜談兵。璧歸問道雖難奪。師出長平已被坑。唇齒連衡如有約。虎狼縱暴本無名。淒涼蔓草荒烟地。民命無如戰國輕。

美人一笑元無罪。不殺難邀好士名。趙勝何曾識毛遂。信陵差解重侯嬴。符來袖裏圍方解。錐脫囊中事竟成。碌碌因人嗤若輩。也如跛客強隨行。

北道何期得鄧晨。信都南望尙迷津。羣情正是思劉日。假號先歸賣卜人。計定一軍終拔趙。怨深三戶必亡秦。不妨暫作逡巡避。龍準諸孫自有真。

自杜店至磁州與霜巖並馬行

一天風露野田秋。曉路熹微辨馬頭。槐柳陰中辭杜店。芰荷香裏到磁州。鷄鳴巷陌烟初起。鷺立陂塘水慢流。過此頓忘身是客。與君題壁紀清遊。

渡漳河

夜聽邯鄲趙女歌。起乘殘醉渡漳河。天垂曠野名都壯。路入中原戰壘多。細雨一蟬高岸柳。西風匹馬故宮禾。灰飛瓦解尋常事。誰管繁華委逝波。

曹操疑塚

分香賣履獨傷神。歌吹聲中總帳陳。到底不知埋骨地。却教臺上望何人。

鄴中咏古四首

洹水清流見麗譙。鄴中氣象太蕭條。詞華不過誇三國。人物誰能算北朝。冰井臺荒秋瑟瑟。香姜閣廢雨

飄飄齊磚魏瓦人爭托。想見當年土木妖。魏銅雀瓦色青內平印工人姓名皆八分書以爲硯貯水數日紋有白花曰錫花古磚大者方四尺上有盤花鳥獸紋千秋萬歲字其紀年非天保則興和又有磚筒承簷溜者花紋年號皆同內圓外方亦可爲硯按王荆公詩云陶甄往往成今手尙托虛名動後人則真品在宋時已不可得。

自從僭竊起當塗。虎視中原氣總粗。大抵奸雄皆好亂。居然割據亦稱都。車中不少彈箏客。案上頻繙聚米圖。十二渠成流澤遠。至今土壤號膏腴。

林慮平聲。山色尙蒼蒼。太尉登朝事可傷。豈有公孤能翊漢。早知廢立總由梁。勢成刻兔驕三輔。禍始金蛇恨永昌。慚媿上書收葬吏。猶傳郭亮配楊匡。

錦衣別築相州堂。使節移來自武康。公獨勤勞兼將相。誰能事業更文章。威名要取雄殊域。宦跡何嫌避故鄉。碑版兩朝尊顧命。豈徒一記重歐陽。

湯陰縣北村家

烟際露芽茨。田家正午炊。韭花秋逞味。棗實晚垂枝。放犢青蕪岸。漚麻綠水池。地偏稀客過。籬落有人窺。入大名界紀冰雹之異

朝行渡黎陽。四望如絕徼。又如入霜野。慘澹初經燒。古墓多白楊。連根拔當道。棗梨盡僵仆。墮實滿泥淖。村中禾黍空。天半烏鳶叫。客心慘不樂。經眼非意料。道逢白髮人。下馬亟慰勞。爲言前七日。陰氣變晴昊。

疾風西北來。電雷乃前導。須臾大雨雹。奮擊恣凌暴。爲拳爲芋魁。所向等飛礮。居民屋瓦裂。填塞及井竈。行者不及防。人傷馬傾倒。澆南滑之北。廿里陷冰窖。草木生其中。焦原同一燎。含悽問隣舍。旁有豐年稻。邑長豈不知。逡巡莫以告。我爲田父語。天變非人造。不聞平陽城。一震跡如掃。殭尸十萬戶。蔽野復誰弔。朝廷憫災傷。大下乞言詔。公卿滿臺閣。相視無寸效。被禍爾猶輕。區區胡足較。

滑縣

停鞭小立聽潺湲。魏滑分河在此間。自洛以東。百水皆會於此。唐沈亞之有魏滑分河錄。樹杪帆檣瓠子渡。城西風雨大伾山。野無秋草年仍歉。地近朝歌俗尙頑。誰與牛羊典芻牧。未應蒿目委時艱。

長垣道上戲示霜巖

前行忽引朱衣吏。夾道爭看擁似蜂。却咲相如緣底事。也隨車騎走臨邛。

從蘭陽渡黃河入大梁境

馬頭半月看烟鬢。行過燕關漸軼關。今日中流回首望。黃河截斷太行山。

閱陳留縣志雜題十絕句補其所不載

幡然臺外野雲黃。畝畝餘風重此鄉。不解後人偏好誕。每從田叟問空桑。伊尹生空桑。語出呂氏春秋。

漢祖初來厭豎儒。監門長揖互揶揄。入關全賴敖倉粟。計出高陽一酒徒。酈食其。陳留高陽人。今縣有高陽堡。卽其故里。

割肉恢諸父老旁。千秋銘記有中郎。羨他社宰封侯地。不改當初戶牖鄉。蔡邕素昏庫上里社銘云。惟斯庫里古陽武戶牖鄉。陳平由此社宰。佐高帝定天下。按史平初封戶牖侯。故云。

殺雞自作高堂饌。草具何妨對客供。一飯成名真有幸。天教季偉遇林宗。伯喈本意欲東奔。失計何人與訟冤。畢竟殺身緣一嘆。九原應悔出私門。

分茅幾姓列王侯。古郡相傳屬此州。若以報施論漢魏。後先亡國兩陳留。漢獻帝從陳留王入承大統。曹奂爲司馬所廢。封陳留王。

假道穿渠到小黃。五代通錄李璣曰。河南有外黃。下黃。漢書地里志。陳留有外黃。小黃縣。五代史改小黃爲下黃。訛矣。赤松祠下月茫茫。鎬池遺壁今還壁。

氣盡人間十二郎。事見大業開河記。

北狩蒼黃宋兩君。徵兵諸路咲紛紛。平時誰畫元豐策。輕汰畿東捧日軍。宋都汴。陳留爲畿輔要地。舊設

滅故靖康之禍。近無聲援。

養士恩深三百年。倒戈迎賊怪爭先。殘黎及記滄桑錄。死事人稀一尉傳。崇禎辛巳十二月。賊由襄鄧北來汴南州縣。召風迎降。陳留署

令某庸才也。不知所措。典史邵大濟。秦中人。竭力拒守。城陷不屬。全家投井死。

濁浪高於師曠城。見陳留風俗傳。人隨廬舍盡東傾。至今雨濕天陰候。過客猶聞鬼哭聲。崇禎壬午。決朱家寨水入大梁。浸淫及於陳留。

城內外水深丈餘。屋宇盡沒。邑無居人。

桐城王方日爲亡友蔣度臣刻詩集於汴中。後列同學姓名。余兄弟與焉。度臣之歿。宜有哀辭。宿

草之哭亦情所不能已也二首

不是無家柰別離。蓋棺事了始歸期。半生好客皆情累。一第成名亦數奇。篋底有金貧宜惜。人間無路老方知。最憐湖海元龍氣。收拾光芒入小詩。迴思腹痛平生語。謬托知音撫絕絃。長恐雲烟隨散滅。忽驚珠玉已流傳。九原可作應相慰。同調無多又自憐。不覺餘哀生感激。爲君展卷一潸然。

和霜巖縣齋秋雨八首

陳留井邑荒。風俗尙淳古。官舍雜民居。蕭蕭一環堵。移牀避屋漏。正值秋來雨。秋雨有時晴。茅茨亦易補。乘時無鉅細。百廢在一舉。

許子天下才。卑棲屈茲土。到官已十日。坐看魚生釜。雖稀傳事柳。尙打排衙鼓。我來況無事。小住因賢主。只合向空齋。攤書聽涼雨。

昨日牒文來。歡聲滿城郭。黃河一丈減。秋水漸歸壑。回頭梁宋郊。禾黍正可穫。豈有溝澮盈。決防助流惡。野人殊過計。倚杖候乾鵲。

荒庭無竹樹。草上墻頭生。誰知一穴穿。已帶秋蟲聲。老夫方隱几。鼻息如雷鳴。雨點忽到窗。颯然歸夢驚。此中有佳句。夢斷詩未成。

我友趙十郎。索居廩延城。趙子晦時宰延津。去此二百餘里。河塢一小邑。長吏管送迎。我思往相就。所畏泥中行。乃知行路難。中有躑躅情。

殘暑去逡巡。蠅聲猶未歇。蒼蠅何足云。壁有鈎尾蠟。孤燈明復暗。被螫或倉卒。土產多毒人。吁嗟慎膚髮。

陳留產全蠟故云。

河流去城遠。掘井不破塊。常時瓢飲難。汲自十里外。官庖惜民力。水厄亦有戒。天漿忽傾盆。餘澤走滂沛。瓶罌既滿貯。茶味卽沆瀣。絕勝調水符。勞心防狡獪。

木榻乘秋陰。徽蒸入布被。解衣背粘席。轉輾出奇計。燕葦著瓦盆。濛濛透霧氣。苦遭烟炙眼。聊免體被漬。身居燥濕間。那得兩遂意。

中秋喜晴

連晨苦雨悵淹留。地近梁園客勸游。夢裏無花誰勸酒。天邊得月且登樓。城圍老柳吹笳夕。露灑寒螿擊櫟秋。却記去年今夜會。滿堂絲竹醉湖州。憶去年鳳晨堂之集。

夸門行

秦師圍困邯鄲城。趙人乞援如乞盟。信陵重以烟姪故。坐視不救非人情。三千私客赴急難。致死一戰猶堪爭。今者無端傾國出。不以君命俄專征。宮中符竊嬖倖手。闔外力奪將軍兵。鐵椎碎首彼何罪。汝自徵

幸貪功成。誰爲此策大紕繆。公子幾陷無君名。生平下士頗折節。慚媿虛左親相迎。私恩不負負大義。二者較量孰重輕。先王正道日陵替。術士詭計方縱橫。不聞死事憫晉鄙。但見好客誇侯嬴。史遷本意喜任俠。公論久掩吾不平。千秋事往一感歎。弔古聊作夸門行。

汴梁雜詩八首

土岡起伏向平蕪。蕎麥花開侶雪鋪。舊日樓臺埋井底。秋來風雨暗城隅。鄒枚作客虛詞筆。高李論交剩

酒壚。

少陵與李供奉高常侍同時客遊梁宋間。故其昔遊詩有往與高李輩論交入酒壚之句。今城東南有三賢祠。莫怪遊梁無一事。已將名姓混屠沽。

鞏洛東來地勢窪。一條清汴走長蛇。霸圖難畫鴻溝界。恨事空椎博浪沙。博浪城在府北。衰草平原秋放牧。西風

古堞暮棲鴉。靈光一寺巍然在。大相國寺。踞地最高。壬午之禍。獨不爲沙土所埋。汴中樓閣存者。惟此而已。留取伽藍記夢華。

削除七國獨存梁。愛弟終因母后妨。禁網初寬到賓客。人才一變起詞章。平臺築後門常闢。東苑成來志稍荒。但取虛懷能下士。豪華原不累賢王。

梁朱宋趙遺墟指汴京。紛紛代禪事何輕。也知光義難爲弟。不及朱三尙有兄。將帥權傾皆易姓。英雄時至適成名。千秋疑案陳橋驛。一着黃袍遂罷兵。

歲幣輸來不計緡。無端齒冷爲亡唇。偷生虎穴甘南渡。忍死牛車痛北巡。翻覆兩家天假手。興衰一劫局更新。幽蘭堂畔誰相惜。只有從亡十九人。

勝國分藩本屬周。承平樂事數樊樓。星連北極雄繁會。地是中原沃衍州。樂府新聲翻百闋。書堂名蹟勒雙鉤。最憐禍較江陵烈。河伯摧殘甚鬱攸。

蝮穴將穿積勢成。洪流直灌大梁城。運移天險翻資盜。禍起庸夫好論兵。明季流賊圍汴。推官黃澍倡議決朱家寨水以灌賊營。賊覺而

遠避開封。翻成巨浸矣。不信龍蛇皆沴氣。可憐魚鱉盡蒼生。滄桑變後秦灰黑。誰見黃河十里清。

新標禹廟鎮河濱。師曠臺邊迹已陳。吹臺今更名禹王臺。獨向蒼茫時極目。誰當搖落不傷神。空倉雀鼠千村賦。故壘牛羊四戰塵。老傍人間多閱歷。漸無閒淚可沾巾。

宋門別陳叔毅二首

同作大梁客。情因去住殊。時叔毅舉家客汴城。累君爲地主。餞我赴歸途。對酒狂猶昔。謀身老漸迂。未妨吟思苦。頷

下賴多鬚。

全家猶旅食。別路阻清遊。相約同登吹臺爲兩阻。近約尙難必。歸期可自由。貯愁聽舊事。挈涕洒神州。令伯元倩先生崇禎末爲

開封司理。莫作長流落。風塵易白頭。

陳留後圃習射示孫周人許爾爲

縣齋秋日長。兀坐愁面壁。異書如荊州。欲借那易得。後園有棄地。糞壤經馬蹏。泓然見清池。老眼喜一滌。初看剪蓬艾。次第拾瓦礫。朝來箭道成。百步盡所歷。兩生頗好事。飯罷走相覓。邀我日同來。分朋控鳴鏑。

雖無皮畫鶴。縛草聊代的。引滿試射之。於中寓考績浮情。或倖中。詭遇本無適。古人一技精。往往互砥激。勿徒視游戲。儼若對強敵。我昔方盛年。從軍曾草檄。風前餓鴟叫。頭上飛霹靂。蹉跎萬念乖。漸怕矛頭淅。力衰安可強。衆醜供指摘。自咲諒無成。習勞猶運甓。子今心膽壯。作此太寂寂。斯言可類推。凡百慎剖析。

朱仙鎮岳忠武祠

平生感憤興亡際。往往無端供裂眦。晉之懷愍宋徽欽。失國偷生本同類。兩家子弟又庸下。南渡誰論復仇義。千秋乃有岳將軍。欲雪斯慚出奮臂。曾經讀史浮大白。況到提戈用武地。一條衣帶指黃河。倒捲狂瀾作餘勢。當時大業已垂成。談咲收京俄頃事。乞和語出金人口。二帝歸如反掌易。南內何妨奉上皇。中原未必虛神器。可憐計算不出此。奸相逢君有深意。朝廷不要兩宮還。那許疆場壞和議。乾坤震蕩功百戰。性命風波獄三字。湯陰故里虎林墳。幾處經過頻洒淚。豈如此地更悲涼。血裏征袍等閒棄。二百年來崇廟貌。祠創于成化戊戌兩行檜栢干霄翠。北風怒吼白日昏。猶有英雄不平氣。

與王方日

姚生寓舍晨排闥。一咲驚君起著衣。余初識君於同年姚別峯寓中半面相逢雖草草。兩心經別自依依。倦游客況秋風冷。末路交情酒伴稀。不料尙邀公子顧。累他紅粉避燈輝。方日夜過余寓適有女郎在座聞公子至避匿不出故戲及之

泮中遇蔡遠士次韻留別三首

與君少小生同里，嬾蔡知名二十年。今日汴中初識面，髮絲秋老菊花天。

買蟹宵來倒客囊，汴城無水味蟹尤難致。一枚例索錢五十文。一燈相對話蒼涼。舊京風物吾猶記，宋嫂魚羹薛嫂羊。

馬嘶門巷客將還，殘醉扶頭改別顏。多感故人相送意，略煩秦女唱陽關。時有秦姬在座。

韓岡送同年張逸峰之安慶

去年下第傷坎坷，君館髯姜漢西兼客我。順風三日不張帆，綠水名園停畫舸。一攀楊柳辭春陌，兩見榆槐

更歲火。那知此地忽相逢，客裏班荆當道左。大梁城東秋野闊，片片飛鴻向空墮。夜騎驕馬到韓岡，我倚

身強君亦頗。人間裙屐胡足道，絲吐春蠶自纏裹。天津公子氣雄豪，長劍短衣無不可。近聞西陲方有事，

廟算行將啓邊鎖。時閱邸抄，聞出師之報。吾曹猥以不羈身，五寸垂綵等遊情。君依官舍獲侍奉，時逸峯隨尊甫觀

我赴歸期尙難果。殘樽相屬且勿辭，黃花正綻霜前朶。

重陽日接胡茨村觀察書及見寄二律次韻奉答

含語相逢兩未申，匆匆悔作渡河人。敢期交臂心相許，及捧來書意果真。白雪愛吟千遍熟，黃花催換一

番新。眼前事事俱難料，不爲傷秋歎亦頻。

一序何當重左思，重煩傳語到臨歧。來書屬余作詩文序，故云。可知投劾休官地，未是移床遠客時。九日歸心憐我急，

十年恨事識君遲。不嫌寂寞遊梁跡，點綴行裝賴好詩。

將歸故里留別霜巖三首

百里衝頰邑。河流接小黃。鄉程貪漸近。官味看初嘗。家本傳儒術。名猶在舉場。此情吾諒汝。捧檄爲高堂。別後寬相憶。君才百事能。神明真不忝。蘊藉若無憑。世苦需經濟。官廉慎愛憎。似聞田父語。蓄見眼何曾。四海皆兄弟。相關得幾人。不愁官俸薄。翻計客囊貧。却饋非吾矯。論交到爾真。平生知己意。感動豈無神。

答趙蒙泉別後見寄之作

趙壹豈窮人。文章天下冠。成名陷羅網。識字召憂患。平生師友間。慷慨赴急難。一機駭初發。二事將并案。隻手探沸羹。孱軀分糜爛。欲知氣難奪。正賴神不亂。戴盆却望天。畫地詎宜狂。泊乎寃得白。重以讒被間。幸免輸鬼薪。誰堪讀城旦。先生鮮稽怒。一啖春冰泮。脫身桔槔中。去國等流竄。疲驢入京洛。旅食年頻換。囊中綠綺琴。焦尾實經爨。知音世不乏。聽者每三歎。捷徑有爭先。陳人尙魚貫。空持魯褒論。孰下干木判。遇我夙懷傾。招呼詩酒伴。貧交無強合。失意多聚散。老淚落河橋。離愁渺雲漢。殘秋滯梁宋。仰視南飛鴈。寄我別來詩。開函一腸斷。君心人盡諒。蹤跡聊羈絆。出語忌孤高。時情伺譏訕。

留別吳梅梁表兄

幾日重陽雨。雨晴天忽寒。北風醒別酒。落葉打征鞍。不計授衣晚。欲爲分袂難。他鄉老兄弟。情到勸加餐。大風晚至杞縣訪李明府不值

沙土晚濛濛。孤城萬木中。氣吞平野日。聲壯渡河風。結伴隨陽鳥。離程極轉蓬。不須煩地主。旅食報年豐。

歸德道中二首

海鴈橋邊路向東。霜消日氣午怡融。木棉吐子如脂白。野柿垂條似火紅。驢背人簪雙鬢菊。牛蹄塵漲四輪風。旗亭一醉誰同伴。獨把吟鞭過宋中。

寒烟衰草入疎蕪。雖水流同戰血枯。他日江淮論保障。至今祠廟具規模。城連耗土秋多鼠。樹倚神叢社少狐。惆悵繁臺歌管歇。角聲吹落孝王都。

商丘周宜菴明府貽牡丹名種戲成四絕句

戚里名園結構新。千株遠致洛中春。燕中苑圃爭購此花。今秋北去者。以商丘一縣計之。已至一千本。多情誰似河陽宰。留取名花贈野人。

珍重新寒九月初。歸程作伴太憐渠。渡江船上人爭看。桃葉桃根恐不如。瓦礫堆墻老圃家。燒餘一片變桑麻。問余臺榭今何處。也要移栽富貴花。包裹泥封護本根。隔年分種自梁園。得歸且作看花想。未必花時穩閉門。

永城縣陳太丘祠

賢人處末流。德器務廣大。先生得此意。名不黨籍挂。庸夫取同塵。君子重遠害。偶然出從政。初不計殿最。

曾爲茲邑長。治道去其太。豈必赫赫名。當前互驚恠。到今有餘慕。俎豆禮無殺。我來謁公祠。下馬肅瞻拜。題詩警俗吏。似爲求名戒。不見道旁碑。去官碑輒壞。

望碭山

萬乘東南巡。本厭天子氣。匹夫迺心動。走向此中避。雲氣隨真龍。人誰跡劉季。可憐秦皇愚。不及呂后智。英雄論成敗。孰者意料事。秋色中原來。蒼然入淮泗。蜿蜒忽橫亘。一束千里勢。豐沛袒右肩。濠梁舒左臂。古來雜王霸。要豈山所致。吾將訴真宰。鏟爾作平地。山色如死灰。嗚呼識天意。

南宿州卽事

符離城外騎驢女。愛着紅裙愛插花。十里迴車無避處。不辭相送到村家。

汴中無魚。今日至固鎮。盤餐得此。余方以爲喜。座有晉人。乃至廢食。云吾土有客水鄉者。所親必相戒勿食魚。恐傷骨鯁也。南北嗜好之不同如此。

各有鄉風。兩不知區區口腹。莫相疑。看他葱薤堆盤處。是我攢眉廢箸時。

臨淮曉渡飯於逆旅述老人所言

人影動浮橋。清流繞淮甸。月光水面澹。初日烟中見。中都地脈連。風物南方變。城灣鵝鴨鬧。客飯魚鱗便。逆旅八十翁。自云本武弁。前朝守陵戶。賦役除本縣。自從喪亂來。瓦落奉先殿。天家王氣盡。凍餓甘衰賤。

誓死不去鄉。依依豈他戀。曾供洒掃職。麥飯每私薦。孟冬時享近。又欲往營奠。言罷竟出門。回頭淚如霰。
過鳳陽城外二首

帳下居然識帝王。千秋閭墓表滁陽。時來將相皆同里。淚落英雄有故鄉。芒碭天青雲氣散。江淮月白水
聲涼。龍蛇變滅須臾事。猶指山名號鳳皇。

元老還朝起廢臣。

宜興再相起馬士英爲鳳陽總督

二陵收氣避黃巾。忽聞淮泗聲援地。已奉邯鄲假號人。南渡半年輸
弱晉。西來羣盜甚苻秦。青絲白馬他年恨。草木餘威在壽春。

池河驛

古驛通橋水一灣。數家烟火出榛菅。人過濠上初逢雁。地近滁州飽看山。小店青帘疎雨後。遙村紅樹夕
陽間。跨鞍便作匆匆去。誰信孤蹤是倦還。

度磨盤山滁濠分界處

只在羊腸鳥道間。不知行過兩州山。千家大柳烟中驛。一綫清流井底關。樵斧樹稀行客倦。茅亭茶熟老
僧閒。路難馬力尤須惜。莫遣鞭多比石頑。

清流關

低迷野氣中路斷。遇崖嶮。陡然拔千丈。直上匪由漸。行子中州來。巖關此爲險。其西道尤惡。石滑破馬膽。

步行到關門。一往生勇敢。長風捲林薄。敗葉撒雨點。豁達眼界開。晶瑩日光閃。少休得古寺。徐使神氣歛。想當割據初。外戶晝長揜。寧知暉鳳擒。猿鳥就籠檻。邇來幾易代。地僻設防減。僧房同啓閉。鎖鑰誰復檢。經過亦偶然。形勝窮一覽。

滁州

岡迴樹轉到城遙。甃石纔通路一條。細水流應落西礪。章左司有滁西礪詩好山青不盡南譙。名賢出守曾相繼。

異姓封王又一朝。爭說此邦風土好。至今生計穩漁樵。

舟發六合

馬煩車殆歷間關。轉愛江程一日閒。吳女布帆十二幅。畫船頭尾載花還。

大霧自儀真曉至京口

斗柄插秋江。夜行指西東。五更乍迷道。水氣昏霾蒙。小舟一葦如。漂蕩雲海中。焉能辨咫尺。所向疑皆窮。何物導我前。羣飛賴南鴻。稍知京口近。忽報金山鐘。旭日出未高。半天已先紅。須臾掃無跡。一望東南空。但見旗腳舒。平流起微風。畏途付噩夢。回首猶忡忡。

關吏行

大農按籍加關稅。小吏機乘搜瑣細。吳中支港夜不行。水柵村橋晨尙閉。歸人癡絕良可歎。枯蒲帶土包。

牡丹壓馱馱增驟價貴。入船船重關津難。有情對爾應惆悵。近日花綱多北上。獨携此本到江南。莫怪擲撇兩相向。

舟中紀事

十月之交冬令行。雷宜收聲乃發聲。嬰兒晝啼天女咲。羣蟄啓戶魚龍驚。初聞吳中夏大水。萬頃疇疇長蒲葦。又聞蔚州七月霜。盡殺稷菽秋無糧。雖云地氣異南北。何至天道違陰陽。野人未敢窺天意。目擊口傳非一事。他年誰考五行書。五行志災不志瑞。

雨中發常熟回望虞山

錢生^{王友}約看吾谷楓。輕裝短櫂來匆匆。夕陽城西嵐氣紫。正值萬樹交青紅。天工似嫌秋太濃。變態一洗歸空濛。湖波蒸雲作朝雨。用意不在丹黃中。大痴歿後無傳派。此段溪山復誰畫。老夫新句亦平平。要與詩家除粉繪。

吳江田家行

高田去水一尺許。低田下濕流沮洳。半扉潦退尙留痕。兩足泥深難覓路。土墻頽塌茅屋倒。時見牽船岸上住。家家網得太湖魚。米少魚多無換處。朝廷聞下寬大詔。今歲江南免田賦。野老猶供計畝租。官倉自貸輸糧戶。田家田家爾最苦。有鐵何煩鑄農具。半生衣食在江湖。賣犢揚帆從此去。